

A story by: Evidence Katiyo

Contact:0774278203

0717031924

Facebook: Evie Katiyo books and stories

Note: Some of the contents in this publication are fiction and emotional. That's life as you come across the good and the bad. It's a journey and nobody knows the destination. Stay tuned.

CHAPTER 1 KUDZI

Ndakamuka hangu makuseni semazuva ese ndichigadzirira kuti ndiende kuchikoro. Semunhu aizofamba mutunhu vakati kuti ndaikurumidza kumuka.

Ndakakasika kugadzirira zvekuti nenguva isipi ndakanga ndatopfeka nhumbi dzangu dzekuchikoro. Ndipo pandakabva ndaenda muimba yekurara iyo yakanga yakarara amai vangu. Musi uyu baba vangu vakanga vakasika kuenda kubasa saka vakanga vasipo.

Ndaida kuvaoneka asi vakazondimisa vachiti vaida kumbotaura neni. Ndakamboda kuramba ndichiti ndaizononoka kuchikoro asi vakabva vanditi vaizondiperekedza nemota.

Ndakazoona ndega kuti pakanga pasina kwekunzvengera ndichibva ndazongomira kuti ndinzwe mashoko aida kutaurwa naamai vangu.

Vakabva vatanga nekundiudza kuti vaida kuzoenda kuMarondera uko vaida kuzovhura chitoro paipera mwedzi

Ndakatovasimbisawo ndikati chitoro ichi chaizobudirira

uye chaizova chimwe chezvitoro zvakakurumbira munzvimbo iyoyo. Vachipedza kundiudza zvekuMarondera vakabva vatanga kundiudza nyaya yavakanga vandimisira.

"Mwana wangu ndati ndimbokurukurawo newe sezvo ndambowana mukana vakadai. Unogona kuita mwana mudiki zvako asi mashoko andinoda kutaura umachengete ugokura nawo." Ndakaramba ndakateerera ndichiedza kubatanidza zvaida kutaurwa naamai vangu.

"Mwana wangu hupenyu hwatinorarama uhwu hapana anoziva nguva kunze kwamusiki. Mumwe musi hamuzondioni panyika pano saka ndoda kukudzidzisa nepashoma pandinapo panozokuyambutsawo muupenyu." Amai vakambonyarara vachibva vambohotsira kwakuenderera mberi. Ndakashaya kuti pane zvavakanga vachiroteswa here kana kuti vaingotaurawo. Kubva paudiki hwangu vakanga vasati vambotaura neni mashoko akadaro.

"Hazvishamisi rimwe remazuva uchizochengetwa nemubereki asiri vako. Unofanirwa kuzvininipisa uchiziva hako kwavakananga. Hanzvadzi yako Shamiso anodawo mutariri. Kana akasatariswa newe haana mutariri." Ndakamboshaya kuti mashoko ese aya chii chaitora nzvimbo.

Mashoko aya akauya sechibhakera chematsenganzungu chandaitadza kuvhika. Ndakaedza kubatanidza mashoko ese aitaurwa apa asi ndakamashaira chirevo.

Ko mashoko aitaurwa naamai aya pane akanga avaudza here kuti nguva yavo yakanga yakwana? Ko nezera randanga ndiri ndaigonzi Shamiso anoda kutarirwa neni iwo baba varipo here? Mibvunzo yandaingozvibvunzawo asi isina mhinduro.

Ndakazongokandawo pfungwa yacho padivi apa ndakangoti Mwari ndivo vanoziva. Takazokurukura zvedu apo chiringazuva chakange choda kutsvuka chamirira kukwata.

Amai vangu vakabva vatora kii dzavo dzemota apo takabuda takatungamidzana takananga panze. Mota yakamutswa nekukasika tichibva tatopinda munzira. Yakanga iri Mazda 323 Familia ineruvara rwuchena. Mota iyi yakanga isina mwedzi yatengwa apo vakanga vaitengerwa nababa sechipo chezuva rekuberekwa ravakanga vachipemberera. Yakatyairwa mota zvekuti nenguva isipi ndakanga ndatosiiwa pachikoro.

Ndakazoswera hangu ndichidzidza asi pfungwa dzangu dzakanga dziri kure. Mashoko andakaudzwa naamai pahurukuro yatakanga taita ndiwo airamba achindinetsa. Ko kana zvaizomuka zvakachinja tosangana nemubereki ane moyo vakaoma taizodii?

Yese iyi mibvunzo yandaingozvibvunza asi mhinduro ndakanga ndisina. Ndangariro dzakazopedzwa nebhero rakarira rekupedza zvidzidzo. Mumwe nemumwe akabva angobuda akananga kumba kwavo. Neniwo ndakabuda ndakananga kumba kwedu ndichifamba zvinyoro nyoro.

Ndakasvika kumba ndichiona baba vangu vatodzoka asi pachiso chavo pakanga pasina mufaro. Pandakavasweresa ndakabva ndaona ndega kuti pakanga pasina kumira mushe. Vakazotaura pava paya apo nyaya yacho yaitosuwisa.

"Amai vako vaita tsaona paCountry club saka vaendeswa kuchipatara." Ndakanzwa mudumbu mangu muchirira ndichibva ndapindwa nechando. Mashoko andakanga ndanzwa airema uye ainetsa kugamuchira.

Shamiso akanga atori murima zvake achitamba mahumbwe neshamwari dzake. Takazobuda pava paya apo takanga toenda kuParirenyatwa kwavainzi ndokwavaiva. Baba vangu vakaivhetemesa mota yakananga kuchipatara kwaiva nemurwere.

Yakanga iri Ford ranger ine ruvara rwutsvuku. Nenguva isipi takanga tatosvika pachipatara. Takasvika tichitambirwa nenhau yaitosuwisa kudarika yatakanga tanzwa pakutanga.

Amai vangu vakanga vaonekana nenyika. Pavakaita tsaona vakarasikirwa neropa rakawanda pasina ambosvikawo nepo. Ndizvo zvakazoita kuti vaonekane nenyika vanachiremba vasati vabata basa ravo. Ndakamboita sendirikurota ndichinzwa nhau yairema kudai.

Ini zita rangu ndinonzi Kudzanai. Mumba medu ndini ndakanga ndiri dangwe ndichizoteverwa naShamiso uyo akanga arigotwe. Takanga tangoberekwa tiri vaviri chete.

Ndakanga ndichiita zvidzidzo zvangu ndiri giredhi 7 paCold Comfort junior school. Shamiso akanga aine makore 5 apo akanga achienda kukireshi. Aiuya achitorwa nemota mazuva ese pamwe nekudzoswa nayo.

Pahupenyu taive toverengwawo pane vanhu vasina chavanoshaya. Imba yakanga yatosimudzwa hombe muCold Comfort phase 1 umo makanga musati manyanyosimukira zvamo.

Baba vangu vaishanda semutyairi kuJ&J inova kambani yaizivikanwa nyika yose. Amai vangu vaisaenda kubasa asi vaitoronga zvekuvhura chitoro kuMarondera. Ndiro bhizimusi ravakanga vafunga kuzvitangirawo apo vaida kuzosimukira kubva ipapo.Ndiwo mararamire atakanga taita amai vangu vachiri vapenyu.

CHAPTER 2 BABA VAKUDZI

Ndakanga ndatobudawo mumba mangwanani ndaonekana nemudzimai vangu zvakanaka. Musi uyu ndaida kuzoenda kure saka ndakakasika kubuda ndichienda kubasa. Uyezve ndaizotyaira mota yangu mutunhu murefu ndakananga kuMsasa kunova ndiko kwaiva negaraji redu raJ&J.

Amai vaKudzi ndakanga ndavasiya vachiti vaizoda kuenda kuMarondera kwavaida kuzovhura chitoro. Vaida kumboongororawo nzvimbo yacho kuti yakanga yakamira sei pamwe nekuona muridzi wenzvimbo yacho yavaida kushandisa.

Mudzimai vangu ndakanga ndamusimbisa kuti ndaizomusimudzira pabhizimusi iri.

Sezvineiwo ndakasvika ndichinopinda mumota yandaizobuda nayo apo ndaida kuenda kuBeira kuMozambique. Ndakatyaira mota yangu yebasa kubva pagaraji redu repaMasasa ndichida kunobata mugwagwa unobatanidza Harare neMutare. Yakanga iri mota yerudzi rweFreightliner iri Century class.

Ndisati ndaenda kure mota yakabva yatanga kuramba kupinda magiya. Pandakaona zvadai ndakabva ndatomira nekuti hapana kure kwandaizoenda nemota yakadaro. Ndakafonera mukuru vangu wepabasa ndichimuudza zvakanga zvaitika pamota.

Nenguva isipi vanachiremba wemota vakanga vatosvika wavakuita basa ravo. Vakamboedza kubata basa ravo asi zvairamba. Ndipo pandakazotambira foni apo ndakaona nhamba dzandaisaziva. Ndichidaira ndakabva ndatambirwa nenzwi rechirume raitaura mashoko anotyisa.

Mudzimai wangu akanga aita tsaona paCountry club avakubuda muRuwa. Mashoko aya aiita kunge banga achindicheka pamoyo pangu.

"Ko chii chakanga chatora nzvimbo kusvika pakuzoita tsaona." Mubvunzo vandakazosara ndozvibvunza ndega parunhare pasisina arikutaura.

Ndakamhanya pagaraji sezvo pakanga pachiri pedyo. Handina kuda kutamba nenguva ndakangonanga kumukuru vangu ndichibva ndamuudza nyaya yandakanga ndichangobva kutambira. Ndichibva kutaura nyaya yangu ndakabva ndatenderwa kubuda. Ndakatora mota yangu ndokuivhetemesa zvekuti ne nguva isipi ndakanga ndatosvika pa country club. Ndakatozosaro svika pazara vanhu nechekare.

Ndakaenda kwaiva nevanhu kunova ndiko kwaiva nemota. Ndakaita kunge ndichachema ndakatarisa mota yandakanga ndisina mwedzi ndatenga yaparara kunge yakanga yava nemakore iripo. Ndichiri ndakatarisa mota iya foni yangu yakabva yarira zvekare apo ndakaona nhamba dziya dzakanga dzambondifonera. Ndabva ndaudzwa nemunhu uya akanga ambondifonera kuti mudzimai wangu akanga atakurwa kuenda kuchipatara kuParirenyatwa.

Mudzimai wangu akanga arohwa negonyeti iro raitevera kumashure kwake apo rakanga ratadza kumira. Mota yakaita zvekututwa ichinopinda musango ichibva yapidiguka katatu ichinomira nemavhiri zvekare. Mutyairi wegonyeti haana kumirira mhosva akabva atotiza. Ndiko kutaurwa kwaiitwa nyaya yacho nevakanga vaona chiitiko ichi.

Ndakazotyaira zvangu kuenda kumba apo ndaizomirira nguva dze5 kuti ndizonoona murwere vangu. Kudzi akazosvikawo kumba ndatova nekanguva ndasvika. Takazobuda hedu tiri vaviri apo takanga toenda kuchipatara kunoona mudzimai wangu.

Nenguva isipi takanga tatosvika kuParirenyatwa kwatakanga tarairwa. Ndipo patakasvika tichitambirwa nenyaya inosuwisa. Mudzimai wangu anonzi akanga arasikirwa neropa rakawanda pasina auya kuzomubatsira.

Pandakanzwa shoko rerufu ndakabva ndatopera simba kugara pasi chaiko. Ndakambofunga kuti zvimwe kurota ndichibva ndamboedza kumuka asi ndakanga ndakatomuka nechekare.

Kunyangwe zvangu ndaimbozviti ndiri munhu wemurume handicheme apa ndakatomboidonhedza misodzi yeshungu. Ko mudzimai wangu ndaizomuonerawo kupi iye aenda kunyika isingadzokwi. Kana ndaizotumira tsamba ndichimukwazisa yaisakwanisa kusvika.

Kwaiva kutonga kwashe asi moyo wangu vakanga vatova neronda rehupenyu hwese.

Naamai Kudzi takanga tagarisana kwemakore gumi nematatu tiri murudo. Kudzi ndiye aiva dangwe redu naShamiso uyo aiva gotwe. Pamakore ese aya mumba medu maingova nemufaro bedzi tichigara tichinzwanana. Ko ndaizomuonepi munhu akadaro muupenyu hwangu.

Ndakazofonera hama dzese ndichivaudza zvakanga zvaitika. Ndakazodzokerawo kumba ndichinoronga zvekuti ndifambise hurongwa hwemariro. Hama dzangu zhinji pamwe nedzemudzimai wangu vakatorara wava kumba vachindibatsira pahurongwa. Kunze kwakazoedza ndavakuziva kwataizonanga. Mudzimai wangu akanga ambotaura achiri mupenyu achiti ndinovigwa mumusha mandakaroorwa. Pane imwe nguva aiti pandinovigwa murume wangu anozovigwawo pedyo neni. Zvese izvi hama dzake dzaitozviziva. Kumusha ikoko takanga takavakawo imba yedu tiri vaviri saka ndimo maaizopinda.

Takazowirirana kuti mutumbi unouya wopinda mumba tomboita church service tozopfuurira kuenda kumusha uko vaizonovigwa. Zvese izvi taibatsirwa neNyaradzo funeral services uye ndiyo zvekare yaizotitakurira munhu wedu kuenda kumusha.

Masikati akazosvika tapedza service tagadzirira kuenda kumusha kuDande. Bhazi reNyaradzo rakatozoita diki apo takazovakumbira kuti vaunze rimwe sezvo vanhu vaiva mavhu nemarara.

Nenguva isipi takanga tatopinda mumugwagwa unobatanidza Harare neMazowe unova ndiwo mugwagwa vataishandisa. Taizofamba mutunhu murefu sezvo kwataienda kwaiva kure. Takazosvika paMukumbura border post tasarirwa nezvinhambwe zvishoma kuti tisvike kuChimbuwe kwataienda apo zuva rakanga roda kunopinda munaamai waro.

Kunze kwakazosarosviba tatova kuChimbuwe takutosvika pamusha pedu. Nenguva isipi takanga tatosvika. Takatambirwa nemhere apo vanhu vaichema zvinopisa tsitsi.

Zvokwadi vanhu vakanga varwadziwa nerufu rwemudzimai wangu. Takazorara husiku hwese tichiimba kusvika kuedze. Ndipo patakazotangisa hurongwa vamwe vachipupurawo mararamiro avakanga vaita nemushakabvu uyu. Pavanhu wese vakataura hapana akataura zvakaipa vaingonzwa wese aitaura achiti tarasikirwa. Takazoenda hedu kumakuva mushure mekuona mushakabvu kekupedzisira apo takanga toenda kunomuchengetedza muimba yekuzorora.

Apa ndipo pandakairidza mhere ndichiona bhokisi remudzimai wangu richidzika muvhu. Ko ndaizorarama sei asipo chido chemoyo wangu. Ndakazogara kumusha mamwe mazuva matatu kwakuzodzoka Harare.

CHAPTER 3 KUDZI

MAKATA ANE MINZWA

Rufu rwaamai wangu rwakandisiya ndisina kana remuromo. Ko taizozvigona sei zvehupenyu iwo amai vasipo? Ndakaona ndisingazogare mushe amai vangu vasipo.

Takagadzirira tikaenda kuDande kunova ndiko kwataizonovachengetera. Vanhu vakanga vari mavhu nemarara parufu rwamai vangu. Rufu urwu rwakarwadza vazhinji nekuti mai vangu vakanga vari munhu wevanhu.

Zvisinei takazovaviga zvedu panova ndipo pandakanyanyorwadziwa. Hazvisi nyore kuona mubereki vako achifushirwa muvhu zvotorova zvakadaro. Munhu ainyanya kundirwadza ndiShamiso kahanzvadzi kangu kadiki. Akanga achiri mudiki zvekuti aimboda rudo rwaamai vake. Aizovaonerawo kupi ivo vakanga vatevera madzitateguru awo.

Takazodzokera hedu kumba apo ndaizoda kuenda kuchikoro uye baba vaizoda kuenda kubasa. Mumba makamboita mazuva akati kuti musina kana mufaro. Shamiso ndiye aingochema asuwa kuona amai.

Ini ndakanga ndogona kuzviitira zvinhu zvangu asi Shamiso akanga asati. Zvaizooma panoenda baba kubasa ini ndiri kuchikoro. Zvisinei vakazoshevedza amainini munin'ina waamai kuti vapote vachititarira. Apa takamborerukirwawo asi ronda raisapora. Mazuva akazofamba apo ndakazonyorawo bvunzo dzangu dzegiredhi 7. Pakauya maresults ndakanga ndakunda zvaidadisa.

Ndakabva ndatowana nzvimbo paWestridge high school iyo yaiva muRidgeview Belvedere. Ndakabva ndatovimbiswa kuti kana ndaizoshanda nesimba ndaizosvika kure nekudzidza. Ndakavimbiswa kuti kana ndaizokunda paA level ndaizotsvaga yunivhesiti yandinoda muZimbabwe kana kunze kweZimbabwe. Izvi ndakazvitambira nemaoko maviri chaiwo saka ndakavimbisawo kuti ndichashanda nesimba.

Zvikoro zvakazosarovhurwa ndatononokerwa nekuenda pachikoro chitsva. Shamiso akazenge atsvagirwawo nzvimbo paCold Comfort apo akanga onotanga giredhi 1. Mainini ndiwo vaipota vachimuperekedza. Ndichisvika pachikoro chitsva ndakambomerera nekuti ndakanga ndisati ndamboona chikoro chakanaka kudaro. Ndakanyatsoona musiyano mukuru nekwandaidzidza.

Mainini awo vataigara navo vakanga vapinda murudo nemumwe muchinda ainzi Tonde. Mukufamba kwaiita mazuva vakazofungawo zvekuvaka imba yavo.

Izvi zvaireva kuti takanga tosara tisina anotarira apo baba vanenge vari kubasa. Izvi zvaisazomira mushe kunyanya pavanenge vaenda kure kwavanotora mazuva. Ndipo pavakazofunga zvekutora mumwe mudzimai.

BABA VAKUDZI

Kubva pandakabva kunhamo yemudzimai wangu ndakanga ndisina rugare mupfungwa dzangu. Ndakanga ndarasikirwa nechimwe chinhu pahupenyu chakakosha kudarika goridhe. Hapana pandaizoona mumwe munhu akadaro muhupenyu hwangu.

Munhu aindirwadza ndiShamiso nekuti akanga asati ambonyatsoonawo rudo rwaamai vake. Chimwe chakanga chonditemesa musoro ndechekuti vana vangu vaizotarirwa nani ndiri kubasa. Nguva zhinji ndaityaira kuenda kure uko ndaigona kuita mazuva ndiriko. Zvaireva kuti vana vaizoda mutariri pamazuva ese aya. Mainini munin'ina wemudzimai wangu ndiwo vakazombondiyamura apo vakazouya kuti vachengete vana. Apa pfungwa dzakambozororawo mbijana sezvo ndakanga ndoziva kuti vana vane anotarira.

Ndakambochovha chinguva ndichishanda, kunyangwe nzendo dzekure ndakanga ndisisatye kufamba. Nyaya yakazotanga apo Mainini vakanga voda kutorana nemurume wavo. Ndipo pandakazofunga imwe pfungwa yandakanga ndisina kumbobvira ndafunga. Ndakanga ndoona iri pfungwa yakanaka kuti nditsvage

mumwe mudzimai wekugarisana naye pamwe nekundibatsira kuchengeta vana.

Ndiri mukuronga pfungwa iyoyi ndakazosvika pakusangana nemumwe musikana akanga akanaka zvinonwisa mvura. Musikana uyu ndakakurukura naye kusvika ndakuziva kuti ainzi Lindiwe. Ndakazosvitsa nyaya yangu yerudo apo akamboti anoda nguva.

Mukukurukura kwatakaita ndakasvika pakuziva kuti Lindiwe akanga ane mwana mumwechete mukomana uyo akanga akaenzana nemwana wangu Shamiso. Akanga apihwa mimba ari kuchikoro achibva atizwa. Akazosvika pakukudzawo mwana vake apo akanga oita zvekuenda Jubheki neMozambique achihodha zvekutengesa.

Ndakamboita mazuva ndichinetsana naye achitsika madziro. Akanga achiri kutya kudzokorodzwa zvaakanga amboitwa achiri kuchikoro.

Mumwe musi ndakazoshamisika apo ndakaona mutambo vakachinja.

CHAPTER 4 BABA VAKUDZI

Ndakafonera Lindiwe ndichitomuudza kuti ndakanga ndisina kuenda kubasa musi uyu. Ndakashama ndichinzwa achiti ndiuye kuzomutora kuroadport achiti akanga abva kuSouth Africa kunohodha.

Ndakabva ndatosarudza kushandisa mukana iwoyo sezvo ndakanga ndiripakutsvaga rudo kubva kwaari. Ndakapinda mumota mangu ndichibva ndatyaira ndakananga mudhorobha. Nenguva isipi ndakanga ndava kutopinda muround about yedu yepaWarren park. Ndakazoita mufamba nyore kusvika mudhorobha sezvo kwakanga kusina mota dzakawanda. Hazvina kunditorera nguva kuti ndisvike paRoad port apo ndakabva ndatobata Lindiwe pafoni.

Akabva andiudza paakanga ari ndichibva ndaendapo apo ndakabva ndamuona. Ndakamubatsira kutakura zvinhu zvake kupinza mumota tichibva tasimuka hedu tavakupinda mudhorobha.

Ndaizonomusiya muKuwadzana maaigara ndozodzoka hangu kumba. Ndipo patakatanga kukurukura hedu apo ndakazoti rega ndimbozama zvekare ndinzwe kuti mwanasikana akanga azofungei nenyaya yangu.

Sezvineiwo Lindiwe akabva atondiudza kuti akanga andida kare kubva musi wekutanga. Ndakambozvitsunya ndikati ndini here ndakanga ndichinzwa mashoko akanaka kudai. "Ndakanga ndichida kunyatsoona kuti uri pachokwadi here nekuti handidi kuzodzokorodza zvandakaitwa ndichiri kuchikoro. Ndosaka ndakatora nguva refu ndichimbokuona kuti ndingavimbane newe here." Ndakapembera nechemumoyo ndichinzwa mashoko aya.

Ndakabva ndatomuvimbisa kuti mwana vake ndaizomuchengeta achibva andivimbisawo kuti aizochengeta wangu. Ndipo pakabva patotangira rwendo rwedu rwerudo.

Ndakazomusvitsa kumba kwake ndichibva ndamusiya ndakuènda kumba kwangu. Musi uyu ndakazotorara pakati pahwo husiku tichikurukura.

Mazuva akafamba ikawa mwedzi tichingofambidzana. Ndipo pandakanga ndoda kugarisana nemudzimai wangu. Ndaida kuti mazuva aya angoenderana nemazuva aizoenda amainini kumba kwavo.

Sezvineiwo zvinhu zvakafambawo sekuronga kwandakanga ndaita. Mainini vakaenda vachibva vanoroorwa zvikafamba mushe. Iniwo hazvina kunditorera mazuva maviri ndakabva ndatogadzirisa chivanhu ndichibva ndatorana nemudiwa wangu Lindiwe. Ndakatozoswera ndavanaye kumba.

KUDZI

Mazuva ekutanga ndakatombofarawo sezvo takanga taigirwa amai vaizotichengeta. Musi wekutanga baba vakatishevedza ini naShamiso apo taida kumbopinda muhurukuro. Ndipo pandakaona mumba muya matakanga tashevedzwa nababa muine mukadzi akanga arimo nemwana akanga ari zera raShamiso.

Takabva taziviswa kuti ndivo amai wedu vakanga vachazotitarira nekutichengeta. Baba vakabva vatizivisawo kuna Kuda uyo akanga awa munin'ina wangu kubva musi uyu.

Ini naShamiso takabva taziviswawo kuna amai wedu vatsva pamwe nekuna Kudakwashe.

Kubva apa taigarisana zvakanaka uye Shamiso akanga achibatwa zvakanaka. Kunyangwe baba vari kubasa ndakanga ndoziva kuti tinenge takachengeteka.

Kuda akanga azochinjwa kubva kwaaidzidza achibva atanga kudzidza pachikoro chimwechete naShamiso. Vaiperekedzwa makuseni ega ega apo vaizodzoka wega masikati. Iniwo kuchikoro ndaipota ndichienda kunosiwa nababa pavanoenda kubasa. Pavanenge vaenda kure ndipo pandaizoitawo zvemabhazi. Dambudziko rakazotanga mumwe musi baba vaenda kuMozambique.

CHAPTER 5

KUDZI

Ndakanyatsosvika pamba zvakanaka ndine mufaro semunhu akanga ari kubudirirawo muzvidzidzo zvake. Ndakasvika amai vari panze vachiyanura hembe dzakanga dzaoma. Ndakati rega ndivamhoresewo ndakafara asi ndakaona mutambo vandichinjira. Ndakapihwa demo rembama zvandisina kunzwisisa kuti zvafamba sei. Ndakamboshaya kuti ndiri kurota here kana kuti zvinhu zvakanga zvichiitika. Ndiri pakubatanidza ndakabva ndairidzwa imwe mbama.

"Ndidzo nguva dzekuuya kumba here idzodzo? Vanga uchiri kuitei unosvika pano nguva dzaenda." Shasha yakataura nenzwi rinehasha ichiita kudzana pasi pachiita mutsindo kunge padonhera nzou. Ndisati ndapindura ndakanga ndatokandirwa rimwe mumwe moto zvekare.

"Misikanzwa yawavakuda kutanga iyoyo handiidi unozvinzwa. Ndakanga ndichikutarisa mazuva ese ndichikuona zvangu ndakanyarara." Ndakashamisika nemashoko ese aya andakanga ndisina kutarisira kunzwa kubva kuna amai awa.

Ndipo pandakavaudza kuti ndakanga ndanonoka

MAKATA ANE MINZWA

kuwana kombi yekuuya kumba asi ndakanga ndatobatidza umwe moto. Ndakamaridzwa mamwe mambama matatu ndikaona nyeredzi.

"Unonyepa mwana iwewe, kana zvirizvo zvavakanga vakajaira kuitira amai vako neni tasiyana. Ini handisi amai vako saka handitomboda marara akadaro. Kasika kupinda mumba unotichinjira uko, kamwana kepfambi." Shoko rakapedzisira kutaurwa iro ndakarinzwa richiita kunge pfumo richindibaya pakati kati pemoyo.

Ndakazopinda mumba misodzi yoerera nematama ese. Ndizvo here zvandakanga ndichiudzwa naamai wangu vasati vafa? Mubvunzo vandaizvibvunza ndega hangu.

Kana akanga ari iwo mavambo kumberi kwaizomira sei? Uyezve Shamiso hanzvadzi yangu yaizorarama sei? Ko zviroto zvandakanga ndavimbiswa nababa zvaizobudirira here? Yese iyi mibvunzo yandaingozvibvunza mundangariro dzangu.

Ndakazopinda mumba ndichibva ndanobvisa yunifomu kwakubva ndapfeka mbatya dzangu dzepamba. Musi uyu ndakanga ndanonoka kusvika pamba asi zvakanga zvisiri zvembiri. Ndakanga ndangosvikawo zvekuma 5 ndichitoona amai vakagumbuka kusvika pekupedzisira.

Ndakanga ndanonoka kuwana kombi sezvo dzakawanda dzaingopfura dzakazara. Ndakazosvika pakunonoka kuwana mota yaizondisvitsa kumba. Zvaimboitika nguva zhinji asi musi uyu ndakashaya kuti vakanga vapindwa nei.

Musi uyu hatina kuzotandara tese zvataisiita semhuri. Ndakabva ndatonozvirarira hangu ndichifunga zvandaizosangana nazvo kumberi.

LINDIWE

Ndakanga ndasangana nababa vaKudzi apo vakanditakura ndichienda kuMozambique.
Mukukurukura tiri parwendo ndipo patakazosvika pakupanana nhamba dzefoni. Ndakasvika pakufonerwa ndavakupfimbwa nemuchinda uyu. Muchinda uyu kubva paakandipfimba ndaimuziva nezita rekuti Joel.

Ndakamboita nguva ndichimudzidza apo ndaimuudza kuti zvaisaita kupinda murudo naye. Akasvika pakundiudza kuti aiva nevana vaviri apo ini ndakamuudza kuti ndakanga ndine mumwechete.

Pese pataisangana aingoramba achindisimbisa kuti aitondida pamwechete nemwana wangu. Ipapo ndipo pandaibva ndamuudza kuti atsvage mumwe pachine nguva.

Mazuva akafamba ndikasvika pakugutsikana kuti munhu uyu akanga ari pachokwadi. Ndipo pandakazobvuma kuti zvakanga zvakanaka kufambidzana naye.

Hazvina kumbotora nguva akabva ati anoda kubvisa roora kumba kwedu. Nechimiro chandakanga ndinacho ndakashamisika kuti ndini here ndakanga ndonobvisirwa mari kumba kwedu.

Zvisinei takazotanga hedu kugarisana mumba tine mufaro. Sekuvimbisana kwatakanga taita vana vaJoel ndaivabata zvakaenzana nevangu uye pakanga pasina dambudziko. Chandaingoziva ndechekuti wese vana vangu uye hapana aizozvichinja izvozvo.

Mazuva zvaakafamba ndakatanga kuitawo shamwari munharaunda yandaigara iyoyo apo taikurukura dzakawanda. Ndipo pandakasvika pakusangana neimwe shamwari yandakawirirana nayo yaishevedzwa nezita rekuti Maidei kana kuti amai Rumbi.

Mumwe musi takanga takagara hedu naMaidei apo takanga tapedza mabasa emudzimba dzedu. Taikurukura hedu takagara pavharanda pangu apo mudariro maingopinda dzakasiyana siyana. Ndipo pakapindawo yekuchengeta kwandaiita vana vandaigara nawo pamwechete nemwana vangu.

"Ko nhai Lindiwe, ndokumbirawo kumbokubvunza mibvunzo mishoma kana uchinditendera." Semunhu aida kutonzwa mibvunzo yacho ndakabva ndamutendera kuti abvunze.

"Ndangoti ndibvunze hangu zvimwe ndini ndinokanganisa kuona, ko vana vaunoshingirira kuchengeta awa unoti vachakupa chiyamuro paupenyu here kana kuti uchangoita muyambutsi chete usingaende kunoenda vamwe." Mubvunzo vandakabvunzwa naamai Rumbi apa ndakaunzwa uchiita kupinda mubhonzo chaimo. Mubvunzo vakadai ndakanga ndisina kuutarisira panguva iyi asi ndaisazoshaya chekupindura.

"Shamwari vakuru vakati chirere chigokurerawo, saka ndakangoti rega ndirerewo zvimwe mangwana vanozondirerawo. Asi kana vakazondidadira zvavo ini pangu ndinenge ndapedza." Pandakataura mashoko aya Maidei akabva atanga kutondiseka zvake kuita kunge ndakanga ndataura zvinosetsa.

"Chimboita zvenyu, paunosiiwa pachena ndipo pauchaona kuti mwana wausina kugomera haabatwi sezai zvaurikuita izvi. Mwana asiri vako haanyengererwi anokudzinga pamba ipapo mangwana. Vatowana mukana iwoyu chitogara vagadzirisa kudivi remwana vako vaunoziva kuti achazokuchengeta mangwana." Ndakambonyarara kwechinguva ndichifungisisa mashoko akanga ataurwa naMaidei.

Pfungwa dzangu dzakabva dzatochinja ipapo zvekuti ndakanga ndotoona kunge ndirikutambisa nguva yangu kuchengeta vana wevamwe. Chokwadi zvaivawo nani kuchengeta vangu zvakanyanya vandinoziva kuti aizondisimudzira.

Takatora nguva apo takambokurukura dzimwe dzakawanda. Maidei akazooneka zuva rorereka. Apa Maidei akanga anyatsoreva paaiti ndisanyengerera mwana wandisina kugomera nekuti akanga asina ruyamuro kwandiri. Ndakazonanga hangu kunoyanura hembe ndavakumirira kuona kuti chikomana chinosvika nguvai.

CHAPTER 6

LINDIWE

Musi uyu ndakanga ndatochigadzirira zvekuti chaisvika ndakaguta nehasha. Yakanga yatova nguva yekuti mumwe nemumwe amire nemubereki vake sekurairwa kwandakanga ndaitwa naMaidei. Apa mhosva yake yakanga yatovapo kare sezvo nguva dzakanga dzaenda akanga asati asvika pamba kubva kuchikoro.

Ndiripakati pekuyanura hembe ndipo paakasvika hake Kudzi achitofamba kunge akapedza nhamo kare. Ndakabva ndanzwa kusvotwa hangu ndichiona mwana wemunhu achisvika achindisweresa kuti maswera sei amai kunge ndakanga ndiri amai vake inini. Chikoro chandakanga ndadzidziswa naMaidei chakanga chavakufanirwa kushanda apa yakanga isisiri nguva yekunyengerera mwana wemumwe mukadzi ini wangu ndinaye.

Yakanga yava nguva yekumuratidza kuti handisi amai vake kana achivada aivatevera kumarinda ikoko. Hongu paiva pamba pababa vake asi baba vacho akanga ari murume wangu zvekare saka ndini ndakanga ndichitonga panguva iyoyo.

Paakandisweresa ipapo ndakabva ndatomuridza mambama nekutomutuka ipapo. Akamboda kuti pamusasa pamunhondo ndichibva ndamuridza mamwe mambama matatu. Ndakabva ndatomukamanisa kuti aende kunochinja akanga otondisvota kuramba ndakamutarisa.

Ndakanyatsozviona kuti apa ndakanga ndabudirira uye ndaizoramba ndichivashungurudza kusvika zvanaka. Ndakabva ndatenda hangu Maidei nechemumoyo sezvo akanga andimutsa kubva kumavato. Chehusiku uhwu mukomana akatozorara asina mufaro akazvipeta kunge mukuwasha.

SHAMISO

Ndakanga ndichiri mwana hangu asi zvakanaka nezvakashata ndakanga ndavakuzviziva. Munhu akandiitira hutsinye ndaitozviziva nekuti pfungwa dzakanga dzavakushanda. Pakarohwa mukoma wangu Kudzi achangobva kuchikoro ndakanga ndakadongorera nepahwindo.

Ndakarwadziwa hangu pandakanzwa mukoma wangu vachitukirirwa zvekuti amai awa dai ndaiva nezvandaigona kuvaita ndaitombomiramira.

Ndakazongokuvarira mukati hangu asi shoko rekunzi mwana wepfambi ndaida kuzobvunza baba kuti rinorevei. Takazorara hedu asi Kudzi mukoma wangu akanga asina mufaro uye haana kumbouya kuzotandara nevamwe zvaaisiita.

Takarara hedu manheru aya tichimirira kuti kuedze tigoenda hedu kuchikoro. Ndakazonzwa ndomutswa kwakasviba ndikashaya kuti ndakanga ndichimutsirwei. Ndakatanga hangu kushama ny'ai apo ndakazoerekana ndogogodzwa musoro.

"Kutoshama hako ny'ai masikati ano unondipengera here mwana iwe." Ndakashaya kuti aipenga ndiyani iwo neni nekuti kwakanga kuchakasviba iwo vachiti atova masikati. Ndakatarisa chiringazuva changu chandaiva ndakatengerwa nababa vangu ndikaona dzitori half past 3. Vakabva vaenderera mberi nekupenga kwavo amai

vaKuda.

"Ndoda kunyatsokubatisa chokwadi nhasi mwanasikana, kurara hope kwaurikuita uku unenge une rugare. Haurare zvaunoda mumba mangu pane zvakawanda zvinoda kuitwa pano. Iwe naKudzi ndimi vashandi wepano." Ndakashaya kuti amai vakanga vane moyo vakanaka vakazochinja nguvai kuita mhuka kudai. Ndakangoti hangu nechemumoyo ndichabvunza baba kuti ndizvo zvavakasiya vataura here.

Ndakabva ndatonzi ita basa rese remumba kubva pakusuka nekutsvaira ndozowacha mbatya dzakanga dzakasviba ndisati ndaenda kuchikoro. Nehasha dzakanga dzina amai awa pakanga pasina marambiro. Ndakabva ndasarudza hangu kusuka ndiro ndisati ndaita zvimwe zvese.

Ndakanga ndisati ndambosuka asi ndaiona amai vangu pavaisuka. Ndiripakati pekusuka kudaro ndakaona amai vauya zvekare vari moto chiso chavo chichityisa kutarisa. Ndakaona ndodhonzwa nzeve vachibva vatanga kupopota.

"Urikutoita uchinonoka hako kunge zvirikupisa, ndoda kuti upedze izvozvi rega ndimbokuchangamutsa." Ndakazonzwa ndodirwa mvura yaitonhora kuita kunge yakanga yabva kunocherwa mugungwa chaimo. Ndakasuka ndiro dziya ndikapedza chando chakandibata zvekuti ndakademba amai wangu.

Ndakazotanga kutsvaira hangu sezvo kutsvaira ndaimbotsvairawo handina kumboshupika kunyangwe zvazvo ndakapedza ndichitukirirwa. Ndichipedza ndakabva ndariburitsirwa rino zigomo rembatya raitoda zuva rese kuti dzipere.

"Saka ndoenda kuchikoro nguvai." Ndini hangu ndakabvunza apo ndaitoziva kuti ndaizononoka kuchikoro.

Kubvunza ikoko ndakanga ndatodenha mago zvekuti nyaya yacho haina kuzopera mushe. Ndakamaridzwa mambama zvekuti panzvimbo penyeredzi ndakaona zuva kuchakasviba kudaro.

"Zvekuti unoenda kuchikoro nguvai ndezvako izvo, hauna kodzero yekundibvunza zvaurikuita izvozvo ndini muridzi wemba pano." Hapana zvimwe zvandakakwanisa kuita kunze kwekungoita zvandakanga ndarairwa.

Ndakanga ndisati ndambowacha saka zvanga zvakandiomera. Ndakaita kutorerwa shamu chaiyo ndichiita kurohwa kumusana ndichinzi mawachiro andirikuita haasiwo. Nguva dzekuenda kuchikoro dzakasvika pakuswedera ndichingowacha chete apo amai Kuda vakambobuda vachienda kuzvitoro.

Pandakaona vabuda ndakabva ndavanawo mukana wekuti ndizviponese ndisarohwe namudzidzisi ndichinzi ndanonoka. Ndakangopfeka dhirezi rangu rekuchikoro ndisina kugeza ndiye hutu ndakananga kuchikoro.

CHAPTER 7

LINDIWE

Chokwadi ndakanga ndisati ndamboona kuti kutonga pamba kunonakidza kudaro. Maidei akanga atondisvitsa pane chimwe chidanho chekuti ndakanga ndatova amai wemba chaiwo. Munhu wandaizobata sezai mwana wangu chete. Apa Kudzi ndakanga ndapedza naye kwakanga kwasara Shamiso ndaifanirwa kumbokavhundutsirawo.

Ndakanyatsomuka hangu kuchakasviba apa kwakanga kwoda kuedza zvekumapast 3. Ndipo pandakamutsa hangu mwanasikana ndichibva ndatanga kumushungurudza. Ndakabva ndatomutaurira kuti yakanga isiri nguva yerugare yaairara hope dzehumambo kunge apedza nhamo kare.

Ndakabva ndatomupa basa husiku ihwohwo ndichibva ndatomuudza kuti iye namukoma vake Kudzi vakanga

vatori vashandi pamba pangu. Ndaitoziva hangu kuti Shamiso akanga achiri kamwana uye basa randakamupa rese raimuremera asi nyaya yekuda kumubata kunge mwana wangu ndoyakanga isingaite aizondijairira.

Akadzisuka ndiro akatsvaira mumba ndichimutambudza nekumutuka. Panguva yekuwacha ndipo paakazoda kundiyemera hamheno kuti aiti ndaizozviterera here.

Aitoda kundiudza zvekuenda kuchikiro kwake hameno kuti aiti ndinebasa nazvo here. Ndakatomurovera izvozvo nekuti akanga asina mvumo yekundibvunza. Chisikana pachaiwacha ndipo pandakati rega ndimbosvika kuzvitoro.

Ndaida kumbotenga chingwa changu nemazai ndozvidyira hangu semunhu aiva pamudyandigere. Kuda akanga aenda kuchikoro naRumbi mwana waMaidei uyo akanga ati kurei saka ndaisava nechekumhanyira. Ndakanyatsoenda hangu ndichifamba samambo varikutenderera vachimboona nyika yavo. Ndakasvika hangu patuckshop paMutema ndichibva ndatenga chingwa nemazai angu pamwe nemukaka wacho.

Ndavakudzoka ndakabva ndangosvika hangu nepamba paMaidei uyo vandakaona avakupedza basa rese remumba. Ndakazotanga kutokurukura hangu naye ndichimuudza zvandakanga ndavaita vana wemutorwa. Ndakabva ndatomuudza kuti kutaura kuno Shamiso akanga kari kutowacha hembe.

Maidei akanga atowedzera kundisimbisa kuti ndirambe ndakadaro uye zvemoyo murefu zvakanga zvisingabatsire. Ndakaonekana hangu naMaidei ndavakuenda pamba pangu. Ndipo pandakasvika iri nzvimbo Shamiso achiti vakandiisepi.

Izvi zvaireva kuti Shamiso akanga aenda kuchikoro asina kupedza basa manje aizondiona paanodzoka. Apa akanga aenda ega futi yakanga iri mhosva iyoyo ndaizozvireva sei kana aizotsikwa nemota munzira. Ndakanga ndoda kumupinza chikoro chaicho aisazonditamba chitsotsi chaakanga anditamba.

Hasha dzandaiwa nadzo dzaitogona kubatidza magetsi enyika yese saka paisazobuda chakanaka. Ndakazopedzisa hangu kuwacha mbatya dziya asi nyaya yakanga isina kuperera ipapo. Ndakaswera zvangu pamba semazuva ese ndakamirira kuuya kwevakanga vari kuchikoro.

Munguva dzemasikati ndipo pandakazoona Shamiso achisvika pamba ainemwana wangu Kuda. Ndakabva ndatonzwa kusvotwa kuti akanga achifambirei nemwana wangu kunge asingagone kufamba ega.

Yakanga yatova mhosva iyoyo zvekare nekuti aizomudzidzisa musikanzwa. Ndakabva ndatotanga kubatidzira moto wacho panze ipapo.

"Ndiweka unozviti wakangwara manje vadzoka pano, ko basa randakutuma vasiya vapedza here?" Ndakaona chiso chemwanasikana chichishanduka apo mufaro wese vaakanga anawo vakabva vapera. Ndakabva ndatomuudza kuti pakanga pasina chikafu chake chemasikati nekuda kwezvaakanga aita.

SHAMISO

Apa ndakanga ndabudirira tsoro yangu uye mudzidzisi havana kundirova kuchikoro. Ndakaswera ndichidzidza nevamwe hangu apo taifara zvataisita mazuva ese. Ndichipedza zvidzidzo zvangu ndakabva ndatorana naKuda tavakuenda kumba.

Taitofara hedu kuti nguva dzekuenda kumba dzakwana zvekuti ndinebasa randasiya ndisina kupedza zvakanga zvasobuda mupfungwa kare. Tichisvika pamba takatoona amai vakagara pavharanda semunhu akanga asina zvekuita. Ndakabva ndatotangirirwa ndisati ndamboenda kure.

Hembe dzandakanga ndasiya dziya dzakanga dzondiparira. Imwe nyaya yakanga yondisunga

ndeyekuenda kuchikoro ndega zvandakanga ndisati mdamboita. Ndipo pandakati rega ndizvimiririrewo ndichibva ndavaudza kuti ndakanga ndichitya kurohwa namudzidzisi.

Kunyangwe ndakambozvimiririrawo moto vakaramba kudzima. Ndakabva ndatonzi chikafu changu pakanga pasina apa ndaitova nenzara. Ndakaswera nayo hangu nechemumoyo ndichingoti amai awa vakaoma chokwadi.

Kudzi akazosvika hake zuva rodoka achibva amboshungurudzwawo. Usiku uhwu takazorara tisina mufaro apo takadyiswa hedu tsunga amai nemwana wavo vachidya nenyama yehuku. Husiku hwacho handina kuona kuti hwafamba sei ndakazomuka kwachena. Ndichidongorera panze kuti ndione kana kwakanga kwanyatsochena ndakabva ndangoona mota yababa iripanze kureva kuti vakanga vadzoka kubva kubasa kwavo.

CHAPTER 8 BABA VAKUDZI

Ndakafamba rwendo rwangu rwekuMozambique

ndakasununguka sezvo ndaiziva kuti vana zvangu vane muchengeti. Rwaiva rwendo rwurefu asi semunhu akanga ajaira zvemusango ndakanga ndisingarwuverengi.

Ndakaswera ndichifamba ndichibva ndasvika hangu ndichisiya zvandakanga ndakatakura kwazvaifanirwa kuenda. Ndakazodzoka zuva rakatevera apo ndakasvika hangu husiku uye handina kumboita dambudziko munzira.

Semunhu akanga akaneta ndakatyaira hangu ndichibva ndauya kumba. Sezvo hwakanga hwava husiku ndakasvika vana wese varara saka ndaizovaona hangu kuseni. Lindiwe ndiye akabva atanga nekutondipira hake nyaya yekuti vana vangu vakanga vane musikanzwa.

Ndakashaya kuti yakanga yatanga riinhi misikanzwa ini ndaiziva kuti vana vangu vaiteerera uye vakanga vasina dambudziko nemunhu. Zvisinei handina kumbopikisa ndakangoti ndaizovaona kwachena. Ndaizoperekedza Kudzi kuchikoro makuseni saka ndiye vandaizokurukura naye ndichinzwa kuti vakanga vatanga kunetsa amai sei.

Zvisinei husiku hwakanga hwakareba hahwo asi hazvina kutadzisa kuti kunze kuchene. Ndakamuka hangu ndichibva ndagadzirira zvekuti ndigoenda kubasa. Ndichipedza kugadzirira ndakabva ndaenda hangu patafura yekudyira apo ndakaona vana vangu kusanganisira naKuda vachiuya kuzodyawo. Ndipo pandakaona kuti Kudzi naShamiso vakanga vasina mufaro uye vaitodya vachitya.

Nechemumoyo ndakangoti ndichabvunza hangu Kudzi ozondiudza kuti chii chirikutora nzvimbo. Ndichipedza kudya ndakabva ndasarudza kuperekedza Shamiso naKuda ndichinovasiya pachikoro pavo ndozoenderera mberi nerwendo rwangu naKudzi. PaCold Comfort primary paiva pedyo saka hatina kutora nguva refu.

Ndichibva paCold Comfort primary ndakabva ndatyaira mota ndakananga nenzira inoenda nekuWarren Park D apo ndaizonobudira kuRoundabout. Ndipo pandakatanga kukurukura naKudzi kuti ndinzwe zvakanga zvichiitika kumba.

"Ko nhai mwana wangu Kudzi, ndoda kuti umbondiudzwawo chokwadi usatye zvako kundiudza." Ndakambotura mafemo apo ndakazoenderera mberi.

"Ndoda kuti umbondiudzawo zvirikuitika kumba ndakanzwa amai vachiti murikuvanetsa makatanga riinhi musikanzwa yamavakuita." Ndakabva ndanyarara hangu ndamirira mhinduro iyo yakanga yavakutouya.

"Baba ndoda kukuudzai chokwadi kuti amai vanonyepa, ini naShamiso hatisi kumbovanetsa ndivo varikutotinetsa." Kudzi akambonyarara apo twumisodzi twakamboerera pamatama.

"Marimwezuro ndakarohwa ndichinzi ndanonoka kuuya kumba ndakuita misikanzwa asi ndakanga ndakamirira mota dzainetsa. Kuedza kutsanangura itori mhosva hameno kuti ndiyo misikanzwa yavanoreva here." Ndakambodzungudza musoro hangu ndikati ko kanyaya kacho zvakasina nemusoro wese.

"Saka ndiyo nyaya yacho chete inobva yaita kunge nyaya hombe kudaro." Apa ndakabvunza achibva aenderera mberi nezvimwe.

"Handina kupedza baba, nezuro Shamiso chaiye akamutswa kuchakasviba achinzi haurare hope dzehumambo mumba mangu kurara hope rugare." Pandakanzwa mashoko aya ndakaita kunge ndichabondera apo ndakanga ndasvika pamarobots epaWarren Park high.

"Akabva atonzi atange kuita basa rese kuma3 ikoko uye achirohwa nekudirwa mvura achinzi iye neni tirivashandi pamba pano." Ndakanzwa mashoko aya achiita kunge tsono achindibaya pakati kati pemoyo. Akabva aenderera Kudzi nemashoko ake.

"Nezuro vacho akatozoita zvekunzvenga kuenda kuchikoro anzi haaende asina kupedza kuwacha ikatozoita nyaya adzoka achibva aswera nenzara. Manheru acho takatozodya netsunga iwo vachidya nenyama. Asi ndinoda kumbobvunzawo chinhu chimwe chete kwamuri." Ndakamuti abvunze apo musoro vakanga wavakutokwata nehasha.

"Ko amai wedu vakanga vari pfambi here nekuti ini ndakatukwa kuti mwana wepfambi." Apa ndipo pandakazonyatsozarirwa nehasha zvekuti dai ndakanga ndiri bhora ndaiputika pasina ambondibata.

Zvandakatorana naLindiwe ndakanga ndisina kutarisira kuti vana vangu vashungurudzwe kudai. Ndaifanirwa kutozomuonesa chokwadi kuti kana asingade vana vangu agare aenda kumba kwavo.

Ndakazobatikana apo Kudzi akandibvunza zvekare kuti zvese zvandakanga ndakamuvimbisa zvaizobudirira here nekuda kwaamai awa vakanga vasina moyo wekurera. Apa ndakabva ndatomuudza kuti asatye nekuti ini baba vake ndakanga ndiripo kuti ndizvizadzise. Tiri kukurukura takazoerekana tasvika paBelvedere apo Kudzi akaburuka avakuenda pachikoro pavo.

KUDZI

Pandakangoziva kuti baba vauya chete ndakafara nechemumoyo nekuti ndakanga ndavakuzovaturira zvakanga zvichinetsa. Pandakaenda kunodya patafura apo pavaidyawo ndakatoenda nechiso chakasuva kuti

vazvione wega mamiriro azvakanga zvakaita uye vaitozondibvunza chete tavakuenda kuchikoro.

Takazobuda hedu ndakuenda kuchikoro apo takapfuura tichisiya Shamiso naKuda pavaidzidza. Tati fambe kubva pachikoro panaShamiso ndipo pakabva patanga nyaya. Apa ndakati rega ndinyatsotaura zvese zvakanga zviripamoyo zvaizova kwavari kuzvitambira kana kurega asi baba vaizviziva havo kuti handivanyeperi. Ndakaona vachishamisika apo ndakazoona vaguta nehasha zvekuti kutyaira mota vakanga vongoita zvekushingirira kuti hapana zvekuita.

Ndipo pandakati rega ndibvunzewo kuti zvavakanga vakandivimbisa zvaizobudirira here nekuti ndakanga ndoona kumberi kusina rwendo. Vakandivimbisa havo kuti hapana zvaizokona asi ini ndakangozviti ndichamirira kuona kunowira tsvimbo nedohwe.

Ndakazosara hangu paBelvedere apo ndakatanga kufamba ndichienda kuchikoro. Apa ndakanga ndonzwawo kuti ndarerukirwa sezvo ndakanga ndatushura bundu raiva pamoyo. Kana kudzidza kwacho musi uyu ndakanga ndakasununguka.

Tichipedza zvidzidzo ndakanomira pandaisimira mazuva ese ndavakudzoka kumba. Zvemusi uyu hameno kuti zvakabvawo nekupi ndakabva ndakasika kuwana mota. Ndakafara hangu ndikati ndaizosvikawo kumba kwakachena. Handina kutora nguva yakareba ndakanga ndatodzika mumota ndavakufamba kuenda kumba.

Ndipo pandakasvika amai vakafuta nehasha ndichibva ndatanga kugogodzwa musoro.

"Une zvavaudza baba vako kaiwe." Vakabvunza amai apo ndakati rega ndipindure ndichibva ndairidzwa mbama.

CHAPTER 9

LINDIWE

Nekurwadzisa kwandakanga ndaita vana awa ndakatozviziva kuti hapashaye anotaura. Kunyanya iye Kudzi aigara akaita bhurugwa nebhande nababa vake ndiye aitozotaura chete.

Pakauya baba vaKudzi husiku ndakanga ndisina kutarisira kuti vangakurumidza kudzoka kudaro. Zvisinei rwendo rwunenge rwuchizivikanwa nemuridzi warwo nekuti ndiye anorwufamba. Vachisvika baba vaKudzi ndipo patakatanga kukurukura apo ndakavaudza kuti vana wavo varikuita misikanzwa.

Ndakazonzwa wavakuti ndichataura navo mangwana ndikaziva kuti zvangu zvaita. Ndaiziva kuti ndikaroverera vanaKudzi chete ndaizogara ndichivaranga pamadiro sezvo baba vacho vaizondibyumidza.

Kunze kwakazoedza apo mudiwa wangu akamuka achigadzirira zvekubasa. Achipedza akazoenda patafura achibva atanga kudya apo vana vakazouyawo asi Kudzi naShamiso vaitodya vachitya. Katarisirwo kavakanga vachiitwa nababa vacho ndakabva ndaona ndega kuti pane mibvunzo iri muhana. Vachipedza kudya ndakazoona baba nevana wavo wese kusanganisira Kuda vakokorodzana.

Ndakasara hangu ndichibva ndatanga kuita mabasa angu epamba. Ndakazorangarira kuti baba vaKudzi vakanga vasina kutanga nyaya yandakanga ndavaudza ndiripo zvichireva kuti vaigona kuikurukura munzira.

Ndipo pandakazoronga kuti Kudzi achisvika chete ndogara ndamuvhundutsira kuti andiudze zvavakanga vakurukura munzira. Ndaida kunyatsoziva kuti nyaya yakanga isina kuzoroverera ini here uye kana yairoverera ini ndaigara ndaruka zano rangu.

Ndakazoita mamwe mabasa ese apo ndakazozorora hangu ndakumirira kusvika kwaKudzi. Shamiso ndakambomuvhundutsira hangu asi ndakatoona kuti akanga asina nyaya. Kudzi ndiye akanga afamba rwendo rwurefu saka paitoitwa hurukuro chete hapana pavaizofamba rwendo rwakareba kudaro vakanyarara.

Musi uyu Kudzi akazokasikawo kusvika ndikaziva kuti akanga akasika kuwana chekufambisa. Ndakabva ndatoona kuti kushandisa simba ndiko kwaizoita kuti ndiwane zvandaida. Ndakabva ndatanga nekutomugogodza mumusoro ndichimupa mhosva yekuti une zvavaudza baba vako. Paakada kupindura ndipo pandakabva ndamuridza mbama kuti achangamuke. Apa ndakanga ndapfeka chiso chebasa manje zvekuti kana iye mukomana akatozviona kuti haisisiri nguva yekuseka.

Ndakashamiswa ndichinzwa achiti hapana zvaakanga amboudza baba vake. Ndakambofuta nehasha zvekutadza kubuda pamukova pandakanga ndichangobva kupinda. Mwana uyu aida kundiita kasvava kasina zvakanoziva manje chokwadi chaizobuda chete.

"Unoda kutamba nenika mwana iwewe, urikutaura kuti manga makangonyarara munzira hauna zvavambovaudza. Manje kana uchiti vatopedza kundipindura hausati vatanga." Ndakataura ndichinotora mugoti muimba yekubikira ndichiuya navo kuna Kudzi. Ndakamuranga Kudzi asi haana kundipa minduro yakandigutsa ndipo pandakati rega ndisiyana

naye akanga asina nyaya.

Ndisina nguva ndasiya kurova Kudzi ndakabva ndanzwa mota yaitinhira panze. Ndakaitarisa nepahwindo ndichibva ndaona iri yababa vaKudzi avo vakanga wavakutofamba kuuya mumba. Ndipo pandakanga ndamirira kunzwa chokwadi chese kana ndakanga ndatengeswa ndotora matanho kubva ipapo.

Achipinda mudiwa wangu ndakamusweresa asi akanga asina kufara semazuva ese. Baba vaKudzi vakanga varimunhu akasununguka asi apa ndakaona musiyano wekufara kwavo nekusuva. Ndakabva ndaziva kuti pane zvakanga zvataurwa. Ndakavapa chikafu asi vakangonyobvora vachibva vasiya. Takazonorara pava paya.

BABA VAKUDZI

Musi uyu ndakazoswera ndichishanda hangu asi mumoyo mangu maitova nehondo. Pandaiti ndawana mubatsiri anondibatsira kutarira vana vangu ndipo pootanga kuvabata nekuseri kweruoko. Manje nekubatikana kwandakanga ndaita Lindiwe ndaizomuudza chokwadi chakazara ndiye aizosarudza kuti anoda vana vangu here kana kuti aizodzokera hake kumba kwavo.

Ndakanga ndisina basa raizobuda kuenda kure saka ndakakasika hangu kupedza ndichibva ndatyaira kuenda kumba. Ndaifamba hangu zviripakati nepakati semunhu asina kwaaimhanyira. Mushure menguva yakati kuti ndakazoona ndasvika pamba.

Ndakapinda mumba macho ndakachinja chiso kuti Lindiwe anyatsoona kugumbuka kwandakanga ndakaita. Ndaida kumuratidza kuti ndaisamunyengerera kana akashungurudza vana vangu nekuti ndivo vakanga vari zvese zvangu.

Kana sadza remusi iwoyo ndakangotsunya tsunya zvechirango ndichibva ndasiya ndaida kuti anyatsoona kuti masamba akasiyana uye ndakanga ndisiri pakuseka.

Ndakazonorara hangu apo Lindiwe akazotevera pava paya. Ndipo pandakabva ndati rega ndichitanga nyaya yangu ndinzwe chaitora nzvimbo. Ndakanyatsomuudza zvese zvandakanga ndaudzwa naKudzi hapana chandakasiya. Ndakaona akuda kuita tuhasha ndichibva ndamuudza kuti adzikame tionesane munezvakanaka.

Ndakaona akunyepedzera kuda kunomutsa Kudzi nehasha akabata shamhu ndichibva ndamuudza kuti ngatipedzerane tiri vaviri sevabereki. Ndakabva ndatomuonesa kuti kana aida zvekushungurudza vana vangu agare atuta twake oenda kwaakabva. Nguva dzakazofamba apo takazorara hedu.

CHAPTER 10

LINDIWE

Baba vaKudzi vakanga vasingataure taure asi apa ndakaona kutaura kwavo. Zvose zvavakanga vaudzwa nemwana wavo zvakanga zvichiroverera ini uye vaitaridza kuti vakanga vabatikana nemabatiro andakanga ndavakuita vana wavo. Ndakamboda kuita twuhasha asi ndakadzikamiswa zvekuti ndega ndakaona kuti zvekupaparika hazvibudirire.

Ndipo pandakanyatyoudzwa chokwadi kuti kana usingade vana vangu enda kumba kwenyu. Saka murume uyu aikoshesa vana vake kudarika inika? Mubvunzo vandaingozvibvunzawo mumoyo mangu asi ndichitya kuubvunza.

Ndakatanga kurangarira mashoko aMaidei achiti mwana wemumwe mukadzi haabatwe sezai ndonzwawo baba awa vachiti kana usingade vana vangu gara varongedza twako uende. Izvi zvaireva kuti ndaifanirwa kumbodzikama mbijana ndichifunga zvimwe. Zvisinei takavata hedu kunze kukaedza apo ndakamuka ndichigadzirira mudiwa wangu kuti aende kubasa. Ndakagadzirira vana zvese zvekuchikoro vachibva vazouya vachibatana nababa wavo patafura.

Pasina nguva vakanga vatobuda nevana wavo wese kusanganisira naKuda. Ndakaita basa rangu repamba ndichibva ndazorora hangu. Apa ndakanga ndofunga zano rekuti ndione zvekuita baba awa vasangoshushira vana wavo kuita kunge vanodyiwa.

Ndakagara hangu pavharanda apo ndakazoona Maidei achipinda muchivanze changu. Ndakaramba ndakamuyeva kusvika asvika pandaiva ndakagara. Ndipo patakabva tatanga kukurukura hedu seshamwari neshamwari.

"Ko nhai Lindiwe kubva vasuwa kudaro chii chirikuitika zvimwe ndingakubatsirawo seumwe wangu." Maidei akabvunza apo ndakati rega ndimuudze zvainetsa mumoyo mangu. Ndaiziva kuti aisazondishayira zano raizoita kuti ndiwane mufaro.

"Shamwari ndashaya kuti ndoitasei nevana awa kunyanya Kudzi anotoda kundishungurudza." Apa Maidei akamboseka zvekuti ndakapotsa ndamudzinga kuti adzokere kumba kwake.

"Iwe Lindiwe, ko inga ndakakuudza wani kuti mwana asiri vako haanyengererwe. Unongomutaridzaka kuti

aita mwana mudiki haungadhererwe nemwana vazuro uno uyu." Akambonyarara Maidei apo ndakati rega ndinyatsotaura chaipo pandaida.

"Shamwari ndakambovavhurumutsa mazuva apfuura aya asi pakauya baba wacho Kudzi akabva avaudza. Nezuro ndakaudzwa makukutu ndikanzi kana ndichiona ndisingade vana iwawo ndakasununguka kurongedza twangu ndiende." Ndakaona Maidei avakukwenya musoro achifunga.

"Nyaya yako iyi ndoisinganetse manje. Murume vako uyo anogadzirwa zvekuti anopedzisira akuteerera iwe chete. Iyoyo ndiyo nyaya isinganetsi manje." Akataura Maidei apo ndakabva ndaziva kwainanga nyaya.

"Saka tozvifambisa sei panyaya yako yaurikutaura, baba awa handivanzwisisi vanogona kungondifungira zvisizvo ndikasabudirira." Ndakataura apo ndaiziva kuti dzimwe nguva baba VaKudzi vaisazovimba neni.

Takazoronga naMaidei kuti taizotaimira paienda baba vaKudzi rwendo rwekure ndipo pataizoenda kuBudiriro kwaaiti kwaiva nasekuru vaiita zvinogara zvakadaro. Iwawo waiva chamangwiza panyaya dzezvinonetsa mumba izvi.

Zvisinei takazokurukura hedu dzimwe nyaya naMaidei apo akazoenda pava paya achindisiya ndavakusekerera mbijana. Kana zvataironga naMaidei zvaizobudirira ndini ndaizotoita jongwe repamusha uye hapana aizoti bufu. Ndini ndaizodzika mitemo mumba zvekuti chandataura ndicho chaitevedzerwa.

Shamiso naKuda vakazodzoka havo kuchikoro sezvo akanga ava masikati. Kudzi akazodzokawo rarereka apo ndakanyepedzera kumufarira asi mumoyo muine hondo. Mazuva akapindana hupenyu huchifama asi ndaingoti dai baba awa vambobudawo kuenda kure.

Mumwe musi ndipo pandakaudzwa nababa Kudzi kuti ndivagadzire zverwendo rwavo sezvo vaida kuzoenda kuZambia. Ndakarongedza nemufaro sezvo ndaiziva kuti kubuda kwababa awa zvangu zvinenge zvatoita. Makuseni vakabva vabuda vachiti vaizondifonera.

lyi yaiva tsika yababa awa kuti kana wavakusimuka vaifona kuti ndizive. Ini ndipo pandaibva ndabuda naMaidei kuenda kwasekuru vake vaakanga ambondiudza. Ndakazofonerwa kuma9 chaiko vachiti vakanga vatobuda uye vaizoita zvimazuva. Chandakanyanyokomekedzwa inyaya yevana awo vandainzi ndivabate zvakanaka.

Ndakangoseka hangu nechemumoyo ndikati muchadzikama henyu baba imi. Dzungu rese iroro raizopera ndabva kwasekuru. Munhu wepi aingokoshesa vana vake asingakoshese inini vaakapfimba. Ndichingopedza kutaura pafoni ndakabva ndatobata Maidei ndichimuti auye tiende.

Murume waMaidei akanga ari kuBotswana saka mwana aizomusiya ega uye akanga akura zvekuzviitira ega. Takagadzirira tichibva tapinda hedu parwendo. Maidei aiva nemota yake yerudzi rweToyota vitz saka ndaizongowedzera mafuta chete. Mota yakasimudzwa tichibva tatangisa rwendo rwedu rwekuBudiriro. Yakatsikwa mota zvekuti nenguva isipi ndakaona tasvika pamharadzano yemugwagwa weHighglen. Ndiwo mugwagwa vatakabva tatora unova ndiwo vaizotisvitsa kwataida kuenda. Tichibva pamarobots epaMarimba takafamba zvishoma apo ndakaona tavakukwidza makata epaflyover tichibva tazotora nzira yaienda kuBudiriro 5.

Yakatsikwa mota zvekuti nenguva isipi takanga tatosvika pamba pasekuru. Takambomirira vamwe waiva mberi kwedu avo vakanga vasina kunyanyowanda zvavo. Pava paya ndipo pakazosvika jana redu.

CHAPTER 11 LINDIWE

Chijana chedu chichingosvika takabva tapinda maiva nasekuru kuti vatange basa ravo. Maidei ndiye akabva avarondedzera nyaya yangu vachibva vatotanga basa ravo.

"Muzukuru nyaya yako ndainzwa uye haina kumbonyanyokura. Inoda kuti utevedzere zvese zvandichakuudza. Urikuzvinzwa here muzukuru?" Vakabvunza sekuru ndichibva ndadaira hongu. Vakambotora nguva vachitaura nechimwe chirudzi chandaisanzwa vachibva vazotanga zvekare kutaura neni.

"Muzukuru vakashinga moyo here?" Vakabvunza sekuru vaya vaishevedzwa kunzi sekuru Kashiri ndichibva ndati hongu.

Ndakaona wavakurongedza mimwe mishonga yaiita kunge hupfu ndichibva ndatambidzwa. Ndakapiwa umwe wandakanzi ndaizoisa muchikafu chemurume wangu uye aifanirwa kuteerera zvese zvandinenge ndatema pamba. Umwe vacho vakanga uri wekuuraya mwana anenge angoda kusimudza musoro kana kuvhurika meso pane zvandaizoita baba vaKudzi.

Ndakazopihwa nekahari kakanga kakasungwa nejira dzvuku pamusoro ako ndaizoshandisa kutaura zvandinoda izvo zvaibva zvaitika. Ndakanga ndisati ndamboita zvemishonga asi apa ndakanga ndatotsunga moyo kuti ndaizozvitangira ipapo. Mashoko ekupedzisira ndiwo akazondishaisa simba apo sekuru vakati vaizofanirwa kurara neni kusimbisa mishonga yese yavakanga vandipa.

Ndakambobata muromo ndichifunga kuti zvaizobuda here zvaitaurwa nasekuru. Kwakambopera kanguva apo ndakazozevezerwa munzeve naMaidei achiti ndibvume zvakanga zvichitaurwa nasekuru. Ndakazobvuma hangu apo vakati vaizosangana neni husiku hwemusi uyu.

Takazoswera hedu pamba apa sezvo taizoenda mangwana mushure mekunge sekuru vapedza basa ravo. Maidei ndiye aitondisimbisa kuti zvangu zvakanga zvatoita uye ndaisazotemeswa musoro nemumwe munhu zvekare.

Manheru achisvika ndini ndakabva ndanzi ndibike chikafu chataizodya. Ndichipedza takabva tadya hedu. Tapedza kudya ndakabva ndanogeza hangu kwakuzoratidzwa mataizorara. Sekuru vakazorara havo vachibata basa pandiri manheru zvekuti vaitoita kunge vanobudirwa neshavi. Kuchiedza ndakamuka ndakaneta apo ndakatombotanga ndageza muviri kuti ndimbodzosa simba.

Hatina kuzogara takabva tati rega tioneke tifambe achiri mangwanani. Sekuru vakabva vatondisimbisa kuti zvakanga zvaita uye ndaifanirwa kuzopota ndichivadongorera kuti varambe vachisimbisa mishonga yavakanga vatipa. Takavapa muripo wavo tichibva tapinda hedu munzira takananga kumba. Ndaitova nemufaro wakawedzera nekuti ndini ndaizotonga mumba umu.

Zvisinei ndakasvika vana vatoenda kuchikoro ndichibva ndaita hangu basa rangu repamba. Shamiso akazosvika masikati naKuda vachibva havo kuchikoro. Kudzi akazosvikawo pava paya apo kwakanga kwatodoka.

Hasha dzakabva dzatosimuka ipapo ndakuda kutotanga musindo. Ko munhu ndaigosvika riinhi ndichingomuudza kuti huya kumba nenguva. Ndakamuridza mbama ndichimubvunza kuti akanga anonokerei kubva kuchikoro. Mhinduro yaingoramba iri imwechete asi ini ndakanga ndisingateerere izvozvo.

Ndakangonotora mugoti ndichibva ndatotanga kumuranga. Apa ndakanga ndopedzera shungu kunditengesa kwaakanga amboita kunababa vake. Takazogara zvimazuva zvishoma ndichibva ndafonerwa nababa vaKudzi vachiti vaizosvika manheru.

Nguva zhinji baba vaKudzi vaiwanzosvika chinyararire asi apa ndakafara kunzwa vachindizivisa. Musi uyu ndakabva ndatenga huku iyo yandaizonyatsorunga zvekuti aitozoteerera inzwi rangu chete. Ndichibva kunotenga huku yangu ndakabva ndaigadzira kwakuzotangisa basa rangu rekubika.

Ndakanyatsotora nyama yababa vaKudzi ndichibva ndaibika payo yega sezvo yaizobikwa zvakasiyana neimwe. Ndakaikanga zvekuti kana iye mudiwa wangu aitozozviruma nekunakirwa. Ndakabva ndatora mushonga wandakanga ndapihwa nasekuru ndichibva ndauisa imomo. Ndichipedza kubika ndakapakura chikafu chacho ndichibva ndaenda kwaiva nehari yangu iya. Ndakabva ndatanga kutaura hangu zvandaida.

"Iwe Joel usiye zvako zvekuti unongoda vana vako chete ini nemwana wangu haundidi. Manje ndini ndichava pamusoro pako uye ndinenge ndichipa sarudzo dzezvese ndini. Kana vari vana vako pavakambovaitira madanha pakakwana yava nguva yanguwo nemwana wangu." Ndakataura mamwe mashoko mazhinji apo ndakazonyarara.

Ndakabva ndarongedza chikafu chiya ndichibva ndaenda hangu kunorara. Ndakasiya vana vachidya sezvo ini ndakanga ndadya kare. Hapana kuzotorawo nguva yakareba mudiwa wangu achibva asvika. Ndakafara ndichiona achisvika achitaura kuti aitova nenzara saka aitoda sadza asati aita chimwe chinhu.

Rakadyiwa sadza zvekuti ndakaona murume mekuru achiita kunanzvira zvigunwe. Zvokwadiwo ndakanga

ndabika zvemhando yepamusoro semunhu aibika zvinhu zvaizounza rudo rwakaraudzira mumba mangu.

"Uku ndiko kunonzi kubika mudzimai wangu, ukabika sezvavaita nhasi izvi kana ndege ndokutengera." Ndakangonyemwerera hangu apo baba vaKudzi vakanga vachiri kunanzvira muromo.

"Ko vakasara sei zvako nevana vaisanetsa here?" Vakabvunza baba vaKudzi apa ndakabva ndaona mukana wekuti nditaure zvandaida.

"Takambosara hedu mushe asi mwana wenyu Kudzi haatombonzwe zvake. Chinguri ndakamutsiura nyaya yekunonoka kubva kuchikoro haasati achinja motombondibatsirawo baba wemwana." Baba vaKudzi vakabva vambobatikana kwekanguva vachitaridza kuti vakanga vasiri kufara nekusateerera kwaKudzi.

"Usatye hako mudzimai wangu. Ndichamupinza muforo hangu ndirikuzviona akuenderera. Kana iwewo ndiro basa rako iroro rekuranga vana kana vachinetsa." Ndakanyemwerera hangu ndichiona kuti mushonga wasekuru vakanga vashanda. Takazovata hedu apo nguva dzakanga dzaenda.

CHAPTER 12

BABA VAKUDZI

Ndakafamba rwendo rwangu rwekuenda nekudzoka kuZambia zvakanaka kunyangwe zvazvo ndakamboponjerwa nevhiri munzira. Ndakamboita zvimazuva ndirimunzira sezvo mota yangu yaizoendesa zvinhu munzvimbo dzakasiyana uye yaidzoka yakatakura zvekare.

Lindiwe ndakasiya ndamukomekedza kuti asashungurudza vana vangu nekuti ndaisada navo. Zvisinei ndakazosvika pakudzoka hangu kurwendo rwandakanga ndaenda apo ndakafonera Lindiwe kuti ndaizosvika manheru. Ndichisvika pagaraji redu handina kutora nguva ndakabva ndananga kumba apo ndakasvika vana wese varara.

Ndakazongoti ndaizovaona hangu mangwana apo ndaizonzwa kuti vakanga vasingashungurudzwe here. Ndakasvikotambirwa nechikafu chakanga chakabikwa nehunyanzvi uye muhupenyu hwangu ndakanga ndisati ndambodya chikafu chinonaka kudaro. Ndakasara ndichinanzvira muto zvekuti ndakapotsa ndatonokokota mapoto acho nekunakirwa kwandakanga ndaitwa.

Ndichipedza ndipo pandakapa kutenda kumudzimai wangu uyo akanga andibikira zvinonaka. Ndakabva ndabvunzawo kuti akanga asara sei nevana uye

vakanga vasinganetsi here. Ndipo pandakanzwa kuti Kudzi akanga achinetsa uye akanga asati asiya tsika yake yekunonoka kubva kuchikoro.

Ndakaita hasha ndikati aizondiona Kudzi iyeye ndaizomupinza muforo. Ndakatanga kunzwa kuti kutsamwa kwese kwandakanda ndakaita nekuda kwaLindiwe ndakanga ndatomutadzira uye kuranga kwaakanga aita vana mumazuva apfuura akanga agona chose

Ndakabva ndatomusimbisa kuti kana vana vachinetsa rakanga riribasa rake kuvaranga. Ndakabva ndarara zvangu sezvo ndaiva ndoda kuzorora kuti ndiwane simba rekudzokera kubasa mangwana. Makuseni ndakamuka ndichiona ndakagadzirirwa tafura yekwamberi zvekuti ndega ndakapa kutenda. Ko madzimai akadai aimbowepi nguva yese iyi?

Kwaingowavo kuzvibvunza ndakayeva chikafu chandakanga ndagadzirirwa apa ndabva kugeza kamvura kanodziya. Ndakadya hangu nemufaro apo ndakazochitanga nyaya yangu vana wese vaungana. Ndipo pandakatanga kuvaudza wese kuti vateerere amai sezvavaiita amai wavo vachiri vapenyu.

Ndakanzwa Kudzi avakuda kusimudza musoro achitaura kuti vakanga vachibatwa zvisirizvo asi akabva aridzwa mbama naLindiwe. Ini hapana chandakakwanisa kupikisa asi ndakatosimbisa kuti varangwe kana vasingateerere. Kudzi ndakabva ndatomuudza kuti akaramba achiita tsika yake yekunonoka kudzoka kuchikoro taizonetsana.

KUDZI

Ndakatofarawo ndichiona baba vangu sezvo ndaizovaudzawo zviripamoyo pangu uye ndiwo wega vaindinzwisisa. Ndakanyatsomuka ndakafara hangu sezvo ndaiziva kuti wekuturira zvechemo zvangu akanga ari pedyo. Takagara hedu patafura tichibva tatanga kudya chikafu chedu chemangwanani.

Baba ndivo vakabva vatanga nyaya yavo apo vaitiraira kuti tisashungurudze amai uye tivateerere. Pavakanga vakananga ndakabva ndapaziva saka ndakabva ndati rega nditaurewo zvaiva pamoyo pangu.

Ndakazoona ndaridzwa mbama naamai ndikatadza kuziva kuti zvaimbofamba sei. Ndaifunga kuti baba vangu vachatsiurawo amai asi ndakaona nyaya yodzoka kwandiri. Ndakatanga kutotsiurwa nababa mbune vachinditi ndisiyane nenyaya yekunonoka kuchikoro.

Ndakashaya kuti ndiwo baba here vakanga vachimboseka kuti murikunetsana nekanyaya kasina basa. Ndakamboda kutaura kuti mota dzinenge dzichinetsa asi mukadzi wavo akabva andiridza imwe mbama zvekare. Apa ndakanga ndoudzwa kunzi haupinduri vanhu vakuru.

Ndakaita hasha zvekuita kunge rwaivhi arikujungwa jungwa netwuvana. Ko ndakanga ndatadzei ini ndaida kuedza kutsanangura zvandinosangana nazvo pandinobva kuchikoro. Pachokwadi kudai ndaikwanisa kuvarova amai awa ndaifa ndaedza manje ndakazodzoka ndoita mwana

Takazobuda hedu nababa apo pakanga pasina aitaura nemumwe. Kuda naShamiso vakasiiwa pachikoro pavo tichibva taenderera mberi nerwendo. Ndipo pandakati rega ndimbobvunzawo baba wangu tiritega ndinzwe kuti sei vakanga vasiri kunzwisisawo dambudziko randinosangana naro munzira ndakudzoka kubva kuchikoro. Ndakashamisika kutonzwa vachindipa mhosva yekuti ndinenge ndichitamba ndikashaya kuti zvirikufamba sei.

Ndakazosiiwa pandaisarira mazuva ese baba vachienderera mberi nerwendo. Ndaisiti kana ndakusara apa ndaisirwa mari yekudya kuchikoro asi apa ndakanzwa ndakubvunzwa kuti amai havana kukupa mari here? Ndakadzungudza musoro ndikati vakanga vasina apo ndazosara ndisina chandakanga ndapihwa.

Ndipo pandakachiona ndega kuti hupenyu hwakanga hwachinja chokwadi. Saka zvaireva kuti amai vaKuda ndivo vakanga wavakutonga pamba apa vachitonga nababa zvese.

Ndakatanga kufamba hangu ndichienda kuchikoro apo ndaizvibvunza mibvunzo yakawanda. Ko baba vakanga vangochinja hunhu kudai chii chaitika? Mumwe mubvunzo wandakazvibvunza hangu ndichifamba kuenda kuchikoro. Ko amai vaKuda pavakarara vasipo pamba paya vakanga vamboendepi? Mumwe mubvunzo vandakazvibvunza asi aipindura pakanga pasina. Ndakabva ndatosara nemhinduro yaindiudza kuti pane zvirikuitika chete.

Manje kana zvirizvo zvandaifungira zvaizofumuka chete. Imwe pfungwa yakauya mumusoro. Ndiri mundangariro kudaro ndakazoona ndasvika pachikoro.

CHAPTER 13

KUDZI

Ndakaswera hangu ndichidzidza asi pfungwa dzakanga dzirikure. Ndakanga ndoda kuziva kuti baba

MAKATA ANE MINZWA

vakanga vambopindwa nei kuchinja kwavakanga vaita hunhu kwaisanzwisisika. Ndakazozviudza hangu kuti ndaizoita tsvakurudzo yangu ndakanyarara.

Nguva dzekupedza chikoro dzichikwana ndakabva ndafamba hangu ndichienda kwandaikwirira makombi mazuva ese. Pakabva pangosvikawo kaToyota Wish kaitopinda muraini mangu ndichibva ndapinda imomo. Rwendo rwakandiitira nyore zvekuti pasina nguva ndakaona tapinda muround about yepaWarren Park.

Mota yakatsikwa tichinopinda muWarren park D apo takazoona tavakupfuura paMereki. Takabva tateremuka pamatero ayo aizotisvitsa pamugwagwa unoshandiswa nemota dzinoenda muKambuzuma.

Takakwidza mumwe mukwidza apo takazotora mugwagwa waipinda muCold Comfort. Yakatsikwa mota zvekuti ndakazoona tavakupinda mumaraini medu. Tichangoti fambe mbijana kubva pamutema takabva tatora nzira yekuruboshwe apo ndakazosiiwa paimba yechishanu panova ndipo pandaigara.

Sezvo mota yaiva yemumaraini yaizofambawo zvinhambwe zvishoma kunosvika payaigara. Ndakafamba ndichipinda muchivanze ndine mufaro vakaraudzira semwana akanga akasikawo kusvika pamba. Ndakatoona amai wedu wezita vakagara pachivanze vachiita havo semunhu akanga apedza

nhamo.

Pavakanditarisa ndichisvika pedyo chiso chavo chakabva chachinja. Ndakatoshamisika kuti sei chiso chacho chazochinja nekusvika kwangu. Pasina nguva ndakanga ndatopinda mumhosva ndisina kuzvitarisira.

"Urikuenderera nemisimanzwaka ndirikukuona."
Ndakatombovhunduka ndichinzwa ndichinzi ndakanga
ndichiri kuenderera mberi nemisikanzwa. Ndakashaya
kuti ndakanga ndapara ipi ini ndakanga
ndatokurumidzawo kubva kuchikoro zvavakanga
vachida.

"Ko munogoti ndirikuenderera mberi nemisikanzwa ndechipi chimwe chandatatadza inga wani nhasi ndakurumidza." Ndakaedzawo kuzvimiririra asi hapana chandakanga ndagona. Ndakatomharwa nembama ndichinzi ndakanga ndisina kodzero yekupindura munhu mukuru.

"Iwe usandipindure wanzwa, mota yavaburuka apo ndeyekupi inobva yakusvitsa pamba. Vatiza kuchikoro neshamwari dzakoka dzavasiya mumota imomo wondinyepera kuti nhasi vakasika. Manje ini handisi mwana mudiki wanzwa." Amai awa ndakatovashaira mupanda wekuvaisa nekuti vakanga vasingazive zvavanoda. Pandaiti ndagona ndakabva ndawedzera kutopihwa mhosva imwe zvekare.

Ndakatezenge ndakunzi ndakwira mota iyoyo mahara saka mari yakanga yasara yaitodiwa. Ndakamboedza kumira mira kuti ndakanga ndatobhadharawo mota asi ndaitoitwa murevi wenhema. Ndakatozosvika pakunzi pakanga pasina chikafu changu manheru iwayo ndaizodya mari yandakanga ndasara nayo.

Ndakangozviudza ndega kuti rega ndisiyane nazvo ndichibva ndatoenda hangu mumba mandairara kunoverenga. Ko ndakanga ndotofanirwa kushanda nesimbaka kuti ndizobudirirawo muhupenyu.

Pachokwadi ndakarara nayo nzara asi handina kumboita basa nazvo. Ndarara kudaro ndipo pandakatanga kurota dzimwe hope dzandakashaira chirevo. Ndakatanga kuona amai vangu vachifamba zvinyoro nyoro vachiuya kwandaiva. Vakasvika pandakanga ndiri vachibva vatanga kueredza misodzi.

Ndiripakurota kudaro ndakazoona kunge ndakanga ndakamira naShamiso hanzvadzi yangu. Vakatitarisa kudaro vakazoshamisa muromo wavo kuti vataure.

"Shingai zvenyu vana vangu nekuti kumberi kune zvikukutu. Muchakwira makata ane minzwa asi ndichange ndinemi." Vachipedza kutaura vakafuratira vachibva vatanga kuenda havo. Ndakavashevedza ndine zvandakanga ndichida kubvunza asi vakanditi handina nguva ndavakutomhanya. Panguva iyoyo

vakatanga kutomhanya vachienda apo vakazongonyangarika. Iniwo ndakazoita zvekupepuka ndichivashevedza apo kwakanga kwachena.

LINDIWE

Mazuva akafamba ndichirarama hangu kahupenyu kehumambo kasina marwadzo. Vana vakanetsa ndaingoudza baba vacho zvopedzerana. Kazhinji kacho vaibva vatonditi rovaka ndiro basa rako. Mwana wangu akanga otosimbawo kudarika vamwe vake sezvo ndaimugadzirira zvose zvaanoda.

Mazuva zvaaifamba vana vakasvika pakunyora bvunzo dzavo dzekupera kwegore. Ndipo paizoonekwa vakashanda nesimba gore rese. Musi wekunzi zvikoro zvavakuvharwa ndakaswera ndakafara ndakamirira kuzonzwa kuti zvaizomira sei pane wangu mwana.

Wangu mwana Kuda ndiye akabva atanga kusvika pamwe naShamiso uyo aiita kunge achabhururuka nekufara. Ko wangu mwana akanga asingafare sei wemumwe achipembera zvakadaro? Mubvunzo vandaingozvibvunzawo hangu apo Kuda naShamiso vakazosvika pedyo.

Ndakaita mudumbu ndichitarisa report book raKuda ndichiona rakatsvuka kuratidza kuti akanga asina

kubudirira. YaShamiso yakatozoita kuti ndimbotsvaga mapiritsi ekupodza marwadzo nekuti pakanga pasina chekushora.

Ndakazongoti zvipiko ndichikanda report book raShamiso kwakadaro uko zvekuti akazorinhonga ratoumburuka muvhu. Ko moyo vakanga vadzimbaka kuti mwana wemumwe akanga abudirira sei wangu achikundikana.

Kudzi akazosvikawo pava paya semunhu aifamba rwendo rwakati kurei. Ndiye akatozondikandisa mapfumo pasi nekuti akanda angori maA nemaB oga. Ndakazoerekana ndanehasha zvekuti ndakangotema Kudzi nereport book rake. Ndakazobuda ndoenda kwaMaidei kunotsvaga zano.

CHAPTER 14

LINDIWE

Ndakasvika Maidei akatogara hake panze achiyeva chivanze chake chakanga chine maruva anoyevedza. Takakwazisana ndichibva ndagara hangu paaiva apo takabva tatanga kukurukura. Ndipo pandakabva

ndaudza Maidei zvakanga zvichangobva kuitika. Hapana pandaizombofara ndichiona mwana wemumwe achibudirira wangu achikundikana.

"Saka iwe zvaunoti vapererwa asi urikukanganwa kuti hari yavakapihwa iya ine masimba ekuita chero zvavada. Chimwe chisinganetse ndongokupa muchetura vozviisira zvofa." Ndakanga ndisati ndambouraya muupenyu hwangu saka zvaitondiremera.

Maidei ndiye akazodzoka ondisimbisa achiti zvaive nani kuti ndiuraye vana awa ndozogara ndisingavaone zvachose panekuti ndigare ndichitemeswa musoro nezvinhu zvisina basa.

Takakurukura zvedu ndichibva ndazotambidzwa kapepa kakanga kaiswa mushonga wacho. Akabva andisimbisa kuti kana ndichida kubudirira pazano iroro ndaifanirwa kuswededza Kudzi naShamiso padhuze. Ndakaoneka hangu sahwira wangu ndichibva ndaenda kumba kwangu. Musi uyu ndakarara ndine mufaro zvekuti kana vana vaisiona chiso chakarema vakatomboshamisika.

Zvisinei ndakarara hope dzehumambo apo ndaiziva kuti zano rangu raisazopotsa. Kuchiedza ndakamuka ndine mufaro apo ndakaraira Kudzi naShamiso kuti vambozorora. Mazuva ese ndaivamutsa kuchakasviba vachishanda asi apa ndakavati chimbozororai sevanhu vakanga wava pazororo.

Ndakazoronga kuita tsoro yangu masikati asi ndaisazouraya wese kamwechete kuti pasazova neanofungidzira. Ndaida kutotanga naKudzi nekuti ndiye ainetsa Shamiso ndaizomupedzisa pava paya.

Ndakabuda hangu ndichibva ndaenda kuzvitoro zvaiva pedyo apo ndakanotenga huku. Ndaida kunyatsoikanga zvekuti kana Kudzi aizopupura asvika kumarinda kuti ndakafa ndanakirwa. Ndichitenga huku yangu ndakabva ndafamba ndichidzoka kumba.

Ndakanyatsotora nguva ndichibva ndakanga huku yangu zvandakanga ndisati ndamboita. Ndichipedza kubika chikafu ndakabva ndapakura hangu apo chikwata chaitotamba panze. Ndakabva ndanyatsotora mushonga uya ndichibva ndamwaya muchikafu chaKudzi apo moyo waifara kuti zvaita. Ndichipedza kupakura ndakabva ndashevedza vana kuti vauye kuzodya. Mumwe nemumwe akatora ndiro yake ndakagarira kuti pasazova neaitora ndiro isiri yake. Ndakazobuda hangu kuenda kunoona Maidei ndavakuziva kuti ndapedza basa.

KUDZI

Kubva pandakarota amai wangu takazochovha mazuva akati kuti tichingobatwa hedu nekuseri kweruoko. Kana baba vakanga vongotiitira hasha nepasina kufanira kana pataitaurawo zvichemo zvedu hapana akanga achatinzwa.

Mazuva akasvika pakuva mwedzi tichingorarama hedu kahupenyu kehuranda. Ko taigodii hedu huriwo hupenyu hwakanga huripo. Ndakashamisika mumwe musi ndauya ndichifarawo semunhu akanga abudirira kuchikoro. Ndakatoita kunge munhu apara mhosva Apo ndaizviti ndagona.

Ndakazoshamisika zuva rodoka ndichiona amai vane mufaro vandanga ndakapedzisira kuona kare.
Ndakamboedza kuda kubatanidza kuti vakanga vachifarirei asi ndakazvishaya. Zvisinei musi uyu takazorara zvakanaka pasina kunetsana. Kuchiedza vakabva vatizorodza vakati regai ndimboshandawo. Ndipo pandakanzwa kufara mumoyo mangu ndikati rugare rwuya rwazouya.

Musi uyu ini naShamiso takaswera zviso zvinemufaro sevanhu vakanga votarisirawo kurarama zvakanaka sezvo amai vakanga vadzora moyo. Musi uyu takabva tatotengerwa huku ichibva yabikwa zvekuti urikure vaimedza mate.

Vachingopedza kubika vakabva vatishevedza kuti tiuye kuzodya. Mudumbu ndakanga ndatogadzira nzvimbo sezvo maida kupinda chikafu chinonaka. Takatora mandiro edu amai vachibva vazobuda vachinoona shamwari yavo.

Takatungamidzana takananga kutafura yekudyira uku tatononokerwa nekudya chikafu chaiyevedza kutarisa ichi. Pandakanga ndavakusvika patafura ndakabva ndatsvedza ndichidonha pasi ndiro yandakanga ndakabata ichiwira pasi apo yakabva yatsemuka. Ndakatarisa nyama ichiita zvekukunguruka moyo ukarwadza asi pakanga pasina zvekuita. Semunhu akanga asina kudzidziswa kudya zvinenge zvawira pasi ndakabva ndatonhonga chikafu chiya chakanga charasika pasi kwakunorasa.

Ndakabva ndatotarisa mupoto ndichibva ndaona mutorine rimwe sadza nemuriwo ndichibva ndazvipakurira hangu. Ndakadya hangu nevamwe kusvika tapedza. Tichipedza kudya takabva tabatsirana hedu kusuka ndiro dzatakanga tadyira. Ndichipedza kubatsirana basa nevamwe vangu ndakabva ndamboenda kunotamba bhora neshamwari dzangu.

LINDIWE

Ndakasvika kumba kwaMaidei ndiri ndege chaiyo ndisingagoni kana kugarisika nemufaro. Ko ndakanga ndatoona ndabudiriraka pane zvandakanga ndaita. "Ko kwakanaka here kwaunobva vatadza kugarisika kudaro. Handisati ndamboona une mufaro sevaunawo nhasi taura tinzwe zvaunza mufaro." Akadaro Maidei atogadzirira kunzwa zvandakanga ndichifarira.

"Shamwari nyaya yataitaura nezuro iya ndazobudirira kuigadzirisa. Zvekuramba ndichinetswa nemwana wemutorwa zvapera manje." Pakamboita runyararo pandakapedza kutaura mashoko aya. Maidei ndiye akazopedza runyararo rwacho.

"Urikureva here kuti pakati paKudzi naShamiso pane atova chando. Kana urikurevesa vagona manje nekuti haungangorambi uchinetswa nevana vadiki vakadaro." Maidei akatotaura achisimbisa zvandakanga ndaita.

"Shamwari kutaura kuno pamwe Kudzi akutorutsa ndotosvika awa chando chete, zvake zvekuti anoziva chikoro achachiziva awa kumakuva." Ndakataura hangu Maidei achibva abvumira padenga achisimbisa zvandakanga ndataura.

Takaswera tichikurukura hedu dzimwe dzehupenyu apo Maidei aindisimbisa kuti ndigare ndasvinura nekuda kwemukana wandakanga ndinawo.

Akabva atondisimbisa kuti kana zvichibvira ndiise zvinhu zvese kubva kuimba neimwe midziyo yese muzita rangu. Kana ndapedza izvozvo ndaizofanirwa kuuraya murume ndosara hangu ndichiita mudyandigere papfuma yake.

Ndakabva ndatobvumira padenga hameno kuti ndaizobudirira here. Raiva basa rakati kurei kutaura nemunhu nyaya yakadaro. Ndakambobvunza Maidei kuti ndaizvikunda here achibva atondisimbisa kuti ndiro basa rehari yakanga yabva kwasekuru Kashiri.

Tichipedza hurukuro ndakaonekana naMaidei ndichibva ndapesanisa hangu makumbo ndakananga kumba. Nguva yangu yandaitarisira kuti Kudzi afe yakanga yakwana. Hazvina kunditorera nguva kusvika pamba sezvo ndaingobva pamba paMaidei ndongopinda pangu.

Ndakarohwa nehana pandakavhura musuwo ndichipinda mumba.

CHAPTER 15

KUDZI

Ndakadzoka kubhora zuva rarereka apo ndakanga ndoda kugadzirira zvekubatsirana naamai kubika. Apa ndakanga ndine mufaro usingatsananguriki semunhu akanga obatwa zvakanaka sezvo Mai vakanga varatidza kuti vachinja maitiro. Pasina nguva ndakaonawo amai vachivhura musuwo kupinda mumba matakanga tiri. Vachindiona vakaita kunge vachadonha nekuvhunduka asi vakangoita sepasina zvaitika. Ndakatombosara nemubvunzo mupfungwa dzangu semunhu akatadza kunzwisisa zvakanga zvaitika kuti munhu anovhunduka andiona.

Ndakabika sadza rangu ndichibva ndapakura kwakushevedza vamwe wese patafura. Sadza rava kudyiwa ndipo pandakati rega nditaure nyaya yendiro iya yakanga yadonha ikatsemuka. Semwana anga akarairwaka ndaisafanirwa kunyarara zvinhu zvinenge zvaitika.

Kutaura kwandakaita ndakaita kunge ndadira peturu mumoto vakanga uchibvira kare. Ndakazongoerekana ndiro yakanga ichidyirwa naamai yatova kumeso kwangu apa yakanga ichine sadza ririkupisa. Ndakatoshayawo kuti zvichiri zvekugumbukira ndiro here kana kuti pane zvimwe zvakatsamwirwa nechekare.

Ndakaona munhu achibuda panze achiita zvekuridza pasi zvinemutsindo ndikaziva kuti hapana chakanaka. Vakazodzoka vakabata waya yaiva yakarukirirwa yakaita zviminzwa vachibva vatanga kundirova nayo.

Chemusi uyu ndakati vakafa vakazorora havo nekuti marwadzo acho akanga asina kumira mushe. Ndakati dai ndaiva nesarudzo yekuramba kubarwa ndaingorambira hangu mudumbu maamai vangu ndorega kuona nhamo dzenyika idzi.

Amai vaKuda vakandirova newaya iya vasingatarise kuti vakanga vachirova payi. Ndakasara ndakachekeka muviri wese asi havana kuda kundisiya vanenge vaitoda kundiuraira ndiro iyoyo. Kuda naShamiso ndiwo vaingochema vachiti musiyei kani asi vaitotaura havo namatsi.

Ndakazoona vandisiya ndikaziva kuti shungu dzavo dzakanga dzapera. Ndakanga ndisina simba rekusimuka saka ndakamboramba ndakarara ndichiterera marwadzo. Pandaiti zvakanga zvapera ndakabva ndanzwa bhutsu ichindikava yaiita kunge yebhiza ichindisimudza mudenga ndichinorovera pasi zvekare.

"Tisimukire tione apo usade kunyepedzera kurara ipapo kunge usingagone kumuka. Ukaita zvekutamba uchiputsa midziyo yangu ndokuuraya wanzwa." Ndaiita kunzwa inzwi ravo richiita maungira munzeve dzangu.

Vakandikava zvekare sezvavakanga vambondiita zvekuti ndakanzwa mbabvu dzichiita kunge dzatyoka. Panguva yandaichema marwadzo ndakarara ndakazongonzwa musuwo uchivhurwa pachibva papinda varume vaviri nemukadzi mumwechete vakapfeka hembe dzechipurisa.

LINDIWE

Hapana chinhu chinorwadza sekuti unenge uchifara kuti tsoro yangu yabudirira yobva yavhiringwa nezvinhu zvidiki diki. Ndizvo zvakaitika patsoro yandakanga ndaronga. Ndakavhunduka ndikanzwa moyo uchikwata nehasha pandakaona Kudzi ari mupenyu achitobika sadza.

Ndakaita kunge ndichadonha nekuvhunduka asi ndakazongozviratidza kunge pasina zvaitika. Ndakazopinda muimba yangu yekurara ndichibva ndanogara pamubhedha pangu ndichifunga zvakadzama.

"Ko ndakanganisa papi tsoro zvayaramba kubuda? Inga ndaisa wani mushonga." Mibvunzo yaingouyawo mumusoro asi yakanga isina anopindura.

"Mwana uyu ane mushonga chete, sei apotswa nemusungo uyu ini ndasiya atora ndiro yake avakuda kudya." Imwe pfungwa yakangouyawo mumusoro mangu. Imwe pfungwa yakabva yanditi aiuwanepi mushonga mwana mudiki akadaro. Zvimwe Maidei ndiye akanga andipa mushonga usingashande.

Ndakazongozviudza kuti ndaizotsvaga chikonzero chacho kusvika ndazvibata. Kunyangwe zvazvo zvemushonga zvakanga zvaramba ndaizozama zvimwe aisambopabuda muvhu ndaitomudonhedza chete.

Pava paya ndipo pandakauya kuzoshevedzwa kunzi sadza rakanga raibva. Ndakanobatana nevana patafura tichibva tatanga kudya hedu. Ndakanga ndisingatauri kana nemunhu ndaitova nehondo mumoyo zvekuti yaitoda mauto akasimba kuti ipere.

Ndipo pandakanzwa Kudzi achinditi akanga adonha nendiro yandakanga ndamupakurira sadza masikati. Hasha dzakatozowedzera paakandiudza kuti akanga arasa nesadza rakanga ririmo achibva apakura rimwe iro raakazodya.

Ndakanzwa muviri wese uchiita kubvunda musoro uchipisa zvekuti ndakazoerekana ndiro yandaidyira yatova kumeso kwaKudzi. Ndakanzwa mwana wemunhu achishinyira nemarwadzo sezvo sadza raiva mundiro umu raitopisa.

Ndakubuda panze ndichiridza pasi zvekuti paitoita kunge pachatsemuka. Pasina nguva ndakanga ndatodzoka ndakabata waya yangu yaiva yakarukirirwa ine zviminzwa zvinobaya iyo yaimboshandiswa nababa vaKudzi kurova nyoka inenge yapinda pamba.

Apa ndakanga ndoda kurova yanguwo nyoka yaitogara

mumba nechekare yaindishaisa mufaro. Ndakamurova Kudzi zvekuti ndakanyatsonzwa kuti shungu dzapera. Akamboda kuramba akarara ndichibva ndatowedzera nekumukava apo ndakanga ndatopfeka mweya wehugandanga.

Ndiripakati pekumurova ndakazongoona musuwo uchivhurwa apo pakabva papinda mapurisa. Ndakavhunduka nekuti vanhu awa vaisangouya bedzi pane anenge atovaudza.

"Amai masungwa murikubatwa nemhosva yekushungurudza vana izvo zvinopokana nemutemo wenyika." Ndakangofinyamisa kumeso kwangu kunge ndaiona munhu anonhuwa ndichibva ndatobvapo ndakananga kuimba yangu yekurara.

CHAPTER 16 SHAMISO

Ndakarwadziwa ndichiona mukoma wangu vachirohwa kunge nyoka yapinda mumba. Ndaiva mudiki hangu asi musiyano wekuponda nekuranga ndakanga ndava kuuziva. Ndakambovaudza kuti vachimurega asi vakatoenderera mberi.

Kuda mwana wavo akasvika pakunzwira mukoma tsitsi asi hapana aizviteerera. Mukoma wakarohwa kusvika pakuchekeka muviri wese apo vakasara vasina Simba rekumuka. Paiitika zvese izvi ndakakwanisa kuenda parunhare rwemumba sezvo ndakanga ndakambodzidziswa kurwushandisa naamai vachiri vapenyu.

Ndakavhura bhuku raiva nenhamba dzevanhu ndichibva ndangosangana nenhamba yemapurisa. Handina kuda kutambisa nguva ndakabva ndatofonera mapurisa ndichivaudza zvakanga zvichiitika nenzvimbo yandakanga ndiri. Ndakabva ndatoziviswa kuti kwakanga kwavakutotumirwa mapurisa kumba.

Moyo wangu vakanga wofara kuti mhandu iya yakanga ichitishungurudza yakanga yavakuzopinda muchizarira. Zvisinei hapana kutora nguva yakareba ndakaona musuwo uchivhurwa pachibva papinda mapurisa matatu. Amai pavakaudzwa kuti masungwa vakangosunga kumeso kwavo vachibva vatofamba vakananga kuimba yavo yekurara.

Vakambotora chinguva variko vachibva vazodzoka vachifambisa. Ndakaona wavakutaurirana nemapurisa aya Apo vaiita sevakanga wowirirana. Vachipedza kutaurirana mapurisa aya akafuratira achibva adzokera. Ndakazoshamisika kuti mapurisa aya akanga apihwa chii chaizvo zvekusvika pafuratira vachisiya nyaya

yakarema yavakanga vafambira.

Vachingoonekana nemapurisa vakadzoka vachibva vakava Kudzi uyo akanga azogara. Ndakaona mwanakomana achinowira kwakadaro achiteverwa neimwe shangu zvekare. Ndakazongoerekana misodzi yoerera mumaziso mangu ndoshaya kuti ndonyatsoudza ani mapurisa zvaakanga akundikana.

LINDIWE

Ndichisvika muimba yangu yekurara ndakabva ndangonanga pakahari kangu kaya. Ndakanga ndiri mumashure menguva saka ndaifanirwa kuita zvandaida nekukasika. Ndakabva ndatanga kutaura zvandaida pahari iya sezvo ndaida kupofomadza pfungwa dzemapurisa akanga andishanyira aya.

Ndichipedza ndakangodzosera hari iya payaigara ndichibva ndadzokera kwaiva nemapurisa aya. Apa ndakanga ndapfeka chiso chebasa manje ndisina nguva yekuseka.

"Saka manga mati chii nenyaya yamanga mafambira? Ndotadza kuranga mwana here kana akanganisa." Pandakataura mashoko aya ndakaona mumwe wemapurisa aya akusekerera achibva apindurawo.

"Haisiriyo nyaya yacho amai, kuranga ndiko chaiko

mwana ngaarangwe kana achinge akanganisa. Ko ndiko kuti vakure vachizivaka matoita zvakanaka." Akataura mupurisa uya ndichibva ndasekerera hangu sezvo zvandaida zvakanga zvaita.

"Kana mukadaro takuwirirana manje kwete dzungu ramanga masvika naro ini handinzwarwo." Ndakataura mashoko aya asi ndakanga ndosekerera.

"Aiwa amai munongozviziva wani kuti kukanganisa kunowanikwa muvanhu zvisinei regai tiende hedu." Nemashoko iwayo vakabva vatofuratira vachienda.

Zano rangu rakanga rabudirira asi ndakazowedzera kushungurudza Kudzi sezvo ndaitova nehasha. Ndichipedza naKudzi ndakabva ndadzokera kumba kwaMaidei. Kwakanga kwasviba asi apa ndakati handingamborari ndisina kuona Maidei. Sezvo murume vake akanga akabuda nebasa nguva dzekuenda ikoko dzakanga dzisina basa. Ndakasvika ndichibva ndatoudza mumwe wangu nyaya yakanga iripo kuti ambondipawo zano.

"Kwakanaka here kwaunobva vauya vakafuta seshato kudai, asi tsoro yako yaramba kubata." Mashoko aya akambokwidza hasha dzangu asi ndakazozvidzora.

"Shamwari pese apa ndirikuti tsoro yabudirira izvo munhu adonhedza ndiro kwakurasa chikafu chacho. Manje ndamurova haasi kutogona kumuka izvozvi. Apa hameno andikwenyerawo mapurisa manje ndamadzinga nehari yangu." Ndakataura mashoko aya apo Maidei akanga akateerera.

"Asi mwana uya anenge ane midzi chete, manje iwe vochitoshandisa hari yako iya votora pfungwa dzake dzoenda pane mwana vako iye ongopenga unenge vatopedza basa." Ndakanyatsobatanidza mashoko akanga achitaurwa naMaidei ndichibva ndaona kuti ndini ndakanga ndichitambisa nguva.

Handina kuzogara ndakabva ndaonekana nemumwe wangu ndichienda kumba. Apa aisazombopabuda nekuti ndakanga ndorwa ndichishandisa hondo isingaoneke.

Ndakasvika mumba mangu ndichibva ndaenda kunorara. Ndakazomuka pakati pahwo usiku ndichibva ndangonanga paiva nehari. Ndakataura zvese zvandaida ndichibva ndadzokera kunorara.

CHAPTER 17

KUDZI

Musi uyu ndakazosvika pakurara ndiri mumarwadzo uye chikafu chacho handina kuzombochidya.

MAKATA ANE MINZWA

Ndakangozviudza hangu kuti ingori nguva chete ndichasimudzirwawo rimwe gore. Ndakambotora nguva ndisati ndakotsira apo ndaimbonyatsofungisisa mafambiro aizoita hupenyu hwangu.

Zvandakanga ndavakurarama hupenyu hwehuranda kudai ndakanga ndichisina tarisiro yekuitawo chimwe chinhu chihombe chinoyemurika. Kana zvese zvandakanga ndavimbiswa nababa vangu dzakanga dzangova ndangariro. Ndaizongotamba inenge ichirira asi ndaitombofanirwa kushanda nesimba kuchikoro kuti zvindifambire.

Ndakazosvika pakubatwa nehope ndiri mundangariro kudaro ndichibva ndatokotsira. Sekuziva kwedu kana munhu akotsira anenge atova kuneimwe nyika. Ndiyo nyika yekuti unokwanisa kubhururuka kunge shiri kana kutosvika nzvimbo yausati vambosvika.

Ndakaona ndirimunzvimbo yandisina kunzwisisa zvekare apo ndaitofamba hangu. Kunze kwakanga kuchipisa kudarika moto wekugehena apo ndainzi ndinofanirwa kufamba rwendo rwurefu kunosvika kwandaida kunzi ndisvike. Ndakaramba ndichifamba asi rwendo rwakanga rwakarema. Ndipo pandakazosangana naamai wangu zvekare.

"Shingirira zvako mwana wangu kumberi kune chiedza. Panguva ino ungafamba hako murima asi rangarira kuti hakuna rwendo rwusina magumo." Vakataura amai vangu apo misodzi yaiva pamatama. Ndipo pandakati rega nditaurewo semunhu aiva neshungu pamoyo.

"Ndosvika riinhi zvakangodaro nhai amai? Marwadzo acho andinyanyira handichina simba rekuti ndirambe ndine nharo." Ndakataura mashoko aya apo ndakaona misodzi yaamai wangu yatowedzera.

"Shingirira mwana wangu, rwendo rwuchiripo uye hausati vaona nhamo. Tarira uone zvirikumberi kwako." Ndakatarira kumberi kwandairairwa ndichibva ndaona amai vaKuda vakamira vakanditarira. Meso avo akanga akatsvuka kuita kunge marasha arimumoto vakabata pfumo mumaoko. Ndakaona pfumo riya richisimudzwa apo ndakati rega nditizire kuna amai vangu.

Ndipo pandakaona iri nzvimbo amai vangu vakanga vanyangarika. Yakanga yava hondo yekuzvimiririra saka ndakabva ndatanga kumhanya. Amai vaKuda havana kumira kutevera pfumo ravo rakagadzirira kupotserwa.

Ndakaramba ndichimhanya amai vaKuda vachitevera chete. Ndakazosvika paiva nematombo anotsvedza apo ndakabva ndadonha ndichibva ndambokunguruka. Pfumo riya ndipo parakabva rapotserwa richibva randirova pagumbo. Ndakabva ndapepuka pakarepo.

Marwadzo andakatanga kunzwa ndapepuka akanga asina kumira mushe. Ndaishaya kana pekubata nekuti

hapana pakanga pasingarwadze. Ndakambofunga kuti hembe dzandakapfeka dzirikurema ndichibva ndambodzibvisa. Ndakaona pasina musiyano marwadzo akaramba aripo. Ndakasvika pakudzipfeka zvekare ndatoona kuti hapana zvambochinja.

Ndakakungura chandakaberekerwa hangu nekuti kutambudzika kwakadai kwaisajairika. Saka ndizvozvika zvandaiudzwa naamai vangu kuhope kuti handisati ndaona nhamo. Ndakashaya kana simba rekumuka makumbo acho aitoita kunge ari mumoto. Ndakamboedza kufambisa mutsipa wangu asi zvakaramba ndaitova panguva yakaoma. Ndipo pandakazoona ndatova mundangariro apo ndaiedza kubatanidza zvandakanga ndarota nezvandakanga ndiri panguva iyi.

Amai Kuda vakati havana zvavarikubata here zvirikuuya kuzondirwisa ndakarara? Ko sei ndavarota vachindimhanyisa nepfumo parandibaya ndipo pandamuka ndiri zvandiri izvi? Mibvunzo yandaingozvibvunza ndakarara paya ndisina tarisiro yekumuka zvekare. Kana ndaizomuka pandakanga ndiri apa ndaizoti Mwari ngavakudzwe. Kana ndaizofa ndakadaro vaizondirangarirawo segamba rakarwa rimire kunyangwe rakazokundikana.

Ndakazonzwa kuvhurwa kwemusuwo apo ndakanzwa kutaura kweinzwi raShamiso. Akaona ndisingakwanisi

kupfakanyika achibva aswedera padhuze. Ndakaona misodzi yake yava kuerera apo akaona chimiro chandaiva nacho.

"Chii mukoma, murikurwara here? Baba vakauya hamuna kumbouya kuzovaona." Ndakabva ndamuudza zvandakanga ndichinzwa apo misodzi yake yakabva yawedzera kubuda. Akabva abuda apo akati arikunoudza baba. Pava paya ndakazoona achiuya akatungamidzana nababa.

BABA VAKUDZI

Ndakabva kubasa ndakaneta apo ndaisatomboda zvehurukuro. Ndipo pandakasvika ndichiudzwa kanyaya kasina musoro kekuti Kudzi akanga aputsa ndiro. Ko basa rake raiva rekumurangaka akanga ava kundiudzirei. Ndakazomuudza kuti asandiudze nyaya dzisina basa ndoda kuzorora asi ndakanga ndatobatidza moto.

"Ndakuona ndiwe unokurudzira vana vako zvisizvo iwewe. Ukada kutaura zvauri kutaura izvozvo tinonetsana nekuti indiro yangu yaputswa. Wavakuda kumera muswe manje ndoudambura." Ndakazokumbira ruregerero nekuti zvaisazopera mushe.

Aisatombondinzwirawo tsitsi kuti ndasvika kunze

kwava kuedza aida kutondipa zvichemo kuma2 ikoko. Ndakazomuvimbisa kuti ndichatenga ndiro yacho apo akanditi ndotenga dzawanda. Kuchiedza ndakamuka ndiripamba hangu semunhu aimboda zororo.

Ndakambotenderera pamusha pangu pamwe nekuona vana vangu kuti varisei. Shamiso akazobva pandiri achiti anoda kumutsa mukoma vake avo vakanga vanonoka kumuka. Ndakabva ndasara ndinaKuda hangu. Pava paya ndipo pandakaona Shamiso achiuya achimhanya asi aisafara. Misodzi yaitoerera kureva kuti pakanga pasina kumira mushe.

"Chiiko nhai Shamiso? Taura tinzwe zvanetsa." Ndakamubvunza apo akabva ataura zvaiita kuti aeredze misodzi.

"Mukoma varwara havasi kugona kumuka vavakuda kutofa." Akabva awedzera kuchema apo ndisina chandakazotaura. Ndakangonanga kuimba yaKudzi yekurara ndichibva ndaona mashura akanga ariko.

Chokwadi mwanakomana akanga aripedyo nerufu.
Ndipo pandakati rega ndishevedze mudiwa wangu
andibatsire kumutakura achibva ati aisakwanisa.
Ndakazomutakura ndega apo ndakanomuisa mumota.
Ndisati ndasimudza mota ndakabva ndanzwa inzwi
raamai Kuda richiti zvamurimi mupedzere mari
pachitunha.

CHAPTER 18

BABA VAKUDZI

Semunhu airemekedza mudzimai vake ndakangoti ndazvinzwa ndichatsvaga kusingadyi mari yakawanda. Mudzimai wangu ndaimuda uye ndaisada kumugumbura. Chese chaaitaura ndaingotenderana nacho nekuti akatsamwa ndakanga ndisingamugoni.

Ndakazomutsa mota yangu ndichibva ndatanga rwendo. Nenguva isipi ndakanga ndatopinda munzira inonanga kuMbare apo ndakanga ndonanga paHarare hospital. Ndakaivhetemesa mota kudarika zvemazuva ese apo ndakazoona ndava munzira inonanga kuchipatara.

Nenguva isipi ndakanga ndatosvika pachipatara apo vanachiremba vakabva vatanga basa ravo. Raiva basa guru apo vaiedza kutsvaga pane dambudziko. Iniwo ndakanga ndangobatira hana mumaoko ndichiti zvino achararama here.

Ndakazoona mumwe vanachiremba wekunditambira pandakasvika achifamba achiuya pandakanga ndakagara ndakamirira kunzwa kuti zvakamira sei. Ndakatarisa chiso chake icho chairatidza kuti akanga asina mufaro. Nenguva isipi akanga asvika pandaiva ndakagara. "Pane zvirikufamba here chiremba, Mwana wangu ava sei?" Ndakabvunza ndatomirira kunzwa mhinduro yachiremba.

"Hapana zvirikufamba baba, tichiri mubishi kutsvaga kuti dambudziko ririkubva papi asi hapana chatati tawana." Ndakanzwa muviri wangu uchipinda chando apo kunze kwaipisa. Kana chirwere chainzi chirikushaikwa pakanga pachine tarisiro yehupenyu here? Mubvunzo wandaingozvibvunza hangu ndakamira nachiremba uya.

Chiremba vakabva vandiraira kuti ndimboenda hangu ndozopota ndichitarisa kuti vanenga wavapapi zvimwe ndaigona kuona avanani. Ndakabuda pachipatara paya apo ndakabva ndananga kumba. Ndakanga ndisina kana simba mota ndaitoityaira zvekushingirira. Ndakazosvika hangu pamba apa ndakaona mudzimai wangu aripanze akagara pavharanda.

"Titambire vabva kwachiremba pane zvafamba here kana kuti atova mariro." Mamwe mabvunziro aizoita Lindiwe akanga asingaite kungoti ndaizomuremekedza chete.

"Mungabva mandibvunza muchidaro here nhai mai wemwana. Pane kuti mucheme neni murikutotarisira kuti pave nerufu." Ndakataura mashoko aya ndabatikana apo ndakanga ndatobatidza mumwe moto. "Saka unoti achararama here mwana iyeye? Hapachina hupenyu paya iwe unaitawo semunhu mukuru ane dzinoshanda kwete kuswera uchishupika nezvinhu zvisina basa. Dai wanga urimumwe munhu vatotanga kupihwa mari dzechema muvavakidzani umu zvisazonetsa musi wemariro." Ndakashaya kana remuromo ndichinzwa mashoko aya.

Ndakada kupindura ndichibva ndanzi ndinyarare uye ndakanga ndisina mvumo yekupindura kana achitaura. Ko ndivoka vakanga vari amai wemba ndaigodii. Ndakazopinda mumba ndichibva ndambogara hangu ndichizorora. Ndaida kuzodzokera kuchipatara panodoka zuva ndonzwa kuti zvinenge zvamira sei. Sekuziva kwedu nguva dzinomhanya saka nguva dzandakanga ndakamirira dzakabva dzakwana.

Ndakamutsa mota yangu ndichibva ndambodzoka mumba ndichioneka mudzimai wangu. Ndichimuudza ndakazotoita kunge ndaitaura zvinosemesa. Ndakabva ndatorambidzwa kuenda apo airamba achisimbisa kuti handaitadziswa kugarisika nemunhu angomirira kupinda murinda.

Chemusi uyu handina kutozokuenda kuchipatara apo ndakazongorara husiku ihwohwo ndisingazivi zvaitora nzvimbo. Ndakazomuka hangu kwaedza apo ndakabva ndatambira foni. Mumwe vanachiremba vakanga vachirapa Kudzi ndiye akanga achifona.

Ndakafara kuita kunge gudo ranhonga ndichinzwa kuti hutano hwaKudzi hwakanga hwavanani. Ndakabva ndatopinda mumota ndisina wandaudza ndikananga kuchipatara. Handina kutora nguva ndakanga ndatovako. Pava paya takazopinda maakanga achirapirwa apo ndakaona aita zvekugara.

Chiso chake chakanga changwarirawo zvekuti tarisiro yehupenyu yakanga yavapo. Takambokurukura zvishoma naChiremba apo ndakabva ndatenderwa kumutakura semunhu akanga asimba.

KUDZI

Ndichizvitaura zvingaita kunge dambe asi ndakanga ndiri panguva yakaoma. Marwadzo akanga ari pandiri aitokunda ngoma kurira. Ndakambokumbira samatenga kuti vanditore havo asi handina kuwana mhinduro. Ndakatakurwa ndichibva ndaenda kuchipatara kunoonekwa nanaChiremba.

Rakanga riri basa apo vanaChiremba vaimira mira kuti ndipone. Ndakatenda Mwari nekundipa vanaChiremba vane rudo nyangwe ndakanga ndichiri mumarwadzo.

Vakabata basa vanaChiremba apo ndaingoshinyira nemarwadzo. Pane mumwe Chiremba airatidza kuti aitova mutumwa waMwari chaiye ndiye airamba achindisimbisa kuti ndichapora chete. Zvemusi uyu vanozosiya vandipa mapiritsi apo vanotauritana kuti vaizouya vachitangira pavakanga vasiira.

Ndakazokotsira apo ndakanzwa maziso avakurema nehope. Nenguva isipi ndakanga ndatova kunyika iya yakasiyana nenyika yedu yevapenyu iyi. Ndiyo yatinodaidza kuti nyika yezviroto. Ndakaona ndiri munzvimbo iya zvekare apa ndakanga ndichienderera mberi nerwendo rwangu.

Kunze kwaipisa apo ndakati rega ndimbotsvaga mvura mutsime repedyo. Ndakabva ndatoona tsime racho rakapwa risina chinhu.Ndichibva patsime paya ndavakuti rega ndishingirire ndiende mberi nerwendo ndipo pandakaona amai vangu zvekare kumberi. Ndipo pandakatanga kunzwa nyama kurwadza ndichibva ndarangarira kuti ndanga ndambobaiwa nepfumo. Amai vangu vakaswedera pedyo vachibva vatanga kutaura.

"Zvingarema hazvo mwana wangu asi ndinewe.
Ungarwadziswa hako asi nguva ichikwana yandichauya kuzorwisa vanokutambudza kana ndatenderwa. Rega ndirape gumbo rako uenderere mberi nerwendo." Ndipo pavanobvisa chinhu chitema pagumbo rangu chandakashaya kuti chii. Pakarepo ndakabva ndapepuka ndichiedza kubatanidza zvaitora nzvimbo.

CHAPTER 19

KUDZI

Ndakazvibvunza mibvunzo yakawanda panguva iyoyo asi hapana kana mumwechete wandakawanira mhinduro. Ndaida kuziva kuti ipfumo rudzii rinobaya richisiya chinhu chitema parabaya. Uyezve munhu akanga akaribata anova amai Kuda zvakanga zvine chirevo chipi? Mibvunzo yandaingozvibvunza ndakarara pamubhedha wemuchipatara.

Pava paya ndipo pandakanzwa kuti marwadzo akanga aenda. Saka zvairevaka kuti amai wangu vakanga vandirapa kuhope ndichibva ndamuka ndakapora. Saka vaya vaitaura kuti vakafa vanenge vachitiona vaireva idi. Dzaingova ndangariro apo ndakanga ndotogona kumuka nekuita zvese zvinotarisirwa kuitwa nemunhu.

Manje zvaitaura amai Kuda paya vachiti musapedzere mari kuchitunha vakanga vairasa. Ndainge ndakateerera vachitaura havo kudaro kunababa. Iwo baba vakanga vatova murwere wepfungwa chaiye vaida kumboonekwa nekuti pane pamwe pandaitoona kuti varikuitwa mwana mudiki nemunhukadzi.

Ndipo pandaizodzoka ndozvibvunza mibvunzo yakawanda yandaizoshaira mhinduro.

Ndakazongozviudza kuti ndicharwa ndimire ndirigamba muhondo handife isati yapera. Kana ndaizotorwa nenyika ndisina kuziva chokwadi vaindiona. Ndaimuka chipoko chekuti vaisapagara pamba ipapo. Ndaida kunyatsoziva chaitora nzvimbo pana baba wedu kusvika pakuchinja hunhu kudaro.

Ndiripakufunga kudaro ndakazoona musuwo vavhurwa apo ndakaona pachipinda murume aiva nezvichena. Ndakabva ndaziva kuti ndiChiremba vakanga vauya kuzondidongorera. Akanyemwerera achiona ndakafara apo ndakazomuudza kuti marwadzo akanga apera. Ndakazombogara kwechinguva apo baba vangu vakabva vazopinda.

Vakapembera zvekuita kunge vachabata denga. Ndizvo zvimwe zvandaishaira mhinduro kuti sei vaipembera apa asi kana amai varipo tinenge titori mujeri. Ndakazongozviudza kuti moyo wangu chimbodzikama. Ndakazotakurwa apo ndakanga ndasimba zvekuenda kumba.

Yakatyairwa mota apo tisina kutora nguva kusvika kumba. Ndakatombofunga kuti ndirikurota ndichiona ndadzoka zvekare pamba paya. Mai Kuda ndiwo vaitoita kunge ziso richabuda vachida kuona kuti murikubuda ani mumota. Ndakazoona vatswinzwinya vachibva vasvinura zvekare vachiona ndichiburuka mumota apo ndichifamba zvandinoda.

LINDIWE

Pachokwadi chaipo Kudzi aimbondikandisa mapfumo pasi. Ndaishaya kuti chii chaizvo chaimbonyatsoitika paari zvekuti aindikurira tsoro dzangu dzese. Paya ndakamuisira mushonga muchikafu ndiro ikaputsika akararama. Apa ndamurwisa nehondo isingaonekwi ndichida pfungwa dzake asi zvaramba.

Ndaitarisira kuti munhu amuke njere dzakarasika asi akatomuka achirwara nezvimwe. Zvisinei ndakatoti kurwara kwaaita ikoko zvakanaka nekuti nezvandaiona haaimbodzoka kunyika yevapenyu. Aizonokurukura naamai vake kumarinda achivaudza kuti nyika yakanga yakaoma.

Paiitika zvese izvi Maidei ndaipota ndichimuudza apo aitondisimbisa kuti zvakanga zvatoita. Kana aizofa taishevedza sekuru Kashiri parufu rwacho ndivo vaiziva zvavaizoita njere dzake dzoenda paMwana wangu. Zvese izvi ndaiona zvakanaka saka ndaingoti dai zvikadaro.

Ndakazoshamisika ndichiona munamato wangu usina kudairwa pakauya baba vaKudzi kubva kuchipatara. Ndakatoona Kudzi achiburuka mumota achiita kunge asina kumbobvira arwara. Ndakashaya kana remuromo ndakanga ndakundwa zvokwadi. Handina chandakataura ndakabva ndangonanga kumba kwaMaidei. Apa ndakanga ndakatofuta nehasha ndisingagone kana kuburitsa mazwi. Semazuva ese Maidei akanga akagara panze akayeva chivanze chake. Akabva atotanga kutaura ndisati ndasvika paakanga akagara.

"Mafambiro aurikuita shamwari yangu ndeemumhu asina mufaro. Chii chanetsa zvekare pamunhu anga achifamba zvakanaka." Zvokwadi akanga awona kuti pane zvirikundinetsa. Ndakabva ndati rega ndimuudze zvakanga zvichangobva kutora nzvimbo.

"Shamwari Kudzi ndirikushaya kuti ndonyatsoitasei naye, pese patiri kuronga zvemariro ake tirikuzvinyepera. Kutaura kuno atodzoka nababa vake variko kumba apa kutozoburuka mumota achifamba zvaanoda kuti ndinyatsomuona." Ndichitaura mashoko aya Maidei akambotora nguva akanyarara. Zvairatidza kuti aiedza kufungisisa nezvazvo asi aishaya kuti otangira papi.

"Shamwari yangu apa hapana kumira mushe. Munhu vatiri kutamba naye akatooma ukaita zvekutamba unovata muvhu zvachose uchiedza kumurwisa."
Mashoko aMaidei aya aitotyisa. Akandiremera kumatambira mumoyo mangu.

"Saka todii manje nekuti mazuva arikufamba." Apa ndakanga ndamirira kunzwa zano kubva kuna Maidei. "Shamwari apa tingaedza hedu kuita zvinhu zvakawanda asi mhinduro yedu ine kwainobva uye ndiko kwatinofanirwa kuti tiende." Akataura Maidei apo ndakanga ndamirira kunzwa kuti ndekupi.

"Mhinduro yacho inobva kupi Maidei? Nyatsotauraka ndinzwisise." Ndakamubvunza nekuti akanga awa kunonoka kundiudza.

"Nyaya iripo shamwari ndeyekudzokera kwasekuru Kashiri mushonga usimbiswe. Votogara vakagadzirira paya panobuda murume vako nebasa tobva taenda." Ndakambotora nguva ndakanyarara ndichinyatsofungisisa pamusoro pemashoko andakanga ndichangobva kunzwa.

"Apa Maidei vareva idi nekuti ndiwo vakandipa masimba ese andinawo aya. Saka zvinoreva kuti kana tikaenda kwavari vanotipa gwara chairo rekufamba naro." Ndakataura apo Maidei akagutsurira musoro kureva kuti takanga tichiwirirana panyaya iyi.

Nyaya yakanga yava kwandiri kuti ndizoronga zuva rekuti tiende ikoko. Kuti zvibudirire ndaifanirwa kuenda panobuda murume wangu nebasa. Ndakazoonekana naMaidei wangu ndichibva ndaenda kumba. Ndipo pandakasvika baba wekwangu vachiti vakange wavamutobuda sezvo vakanga vafonerwa kuti vauye kubasa.

CHAPTER 20

LINDIWE

Pandakanzwa baba wekwangu vachiti vakanga vafonerwa kubasa ndakati zvangu zvanaka. Ndakazowedzera kufara pandakanzwa vachiti vaienda kuMozambique asi vane zvinhu zvavaizomirira ikoko. Izvi zvaireva kuti tsoro dzangu dzaibuda nekuti basa rese raida kuitwa nababa awa raigona kutora svondo rese.

Ndakagadzira zvese zvavaida apo vakabva vaoneka kuti vatangise rwendo. Ndakavaperekedza kusvika pamota yavo apo vakabva vapinda mukati kuti vaimutse. Nenguva isipi vakabva vatobuda apo ndakamboramba ndakatarisa mota yavo kusvika ndisisaione.

Ndakanga ndavakuziva kuti zverwendo rwangu zvaita nekuti ndakanga ndasara ndega. Ndakabva ndatodzokera kumba kwaMaidei apo ndakanomuudza zvakanga zvichangobva kutora nzvimbo.

Takatozokurukura dzimwewo nyaya kusvika usiku apo ndakazodzokera kumba ndisisaone nzira. Ndakasvika Kudzi abika ndikatoshamisika kuti akanga asimba zvekugona kubika chikafu. Manje zvatakanga tavakuda kuita apa akanga asingazvikunde. Kana aizoikurira hondo iyi ndaibva ndasiyana naye zvachose ndonomutengera ndege itsva. Ndakadya hangu ndichibva ndaenda kunorara. Kurara kwacho kwaingova kwezita pfungwa dzakanga dzitori kure kure. Ndakanga ndava kutoronga zvemberi sezvo Maidei akanga akambondiudza kuti ndisvinure.

Pachokwadi chaipo ndaifanirwa kuti ndisvinure nekuti nguva yaigona kuzopera pasina chandaita. Ndakazorangarira kuti ndakanga ndakatamura mwana vake mudumbu kunyangwe zvazvo akanga achine mwedzi mishoma arimo. Hameno kuti akanga ari vake here kana kuti sekuru Kashiri asi chandaiziva ndechekuti ndinogara naye saka ndiye akanga ari muridzi wemwana iyeye.

Ndiye mwana wandaizoshandisa kutora hupfumi hwemurume uyu ndaingoti aise zvese muzita remwana. Ndaizofanirwa kuona kuti Kuda ane zvakewo zvaanowana pamugove wepfuma iyoyi. Ndaizoona kuti ndozvifambisa sei nekufamba kwenguva.

Ndiri mundangariro kudaro ndakazongobiwa nehope apo ndinoshanyira nyika yezviroto. Ndipo pandakabva ndasangana nemumwe mukadzi akanga akapfeka zvichena achiuya kwandiri. Chiso chake chaisanyatsotarisika nekuti chakanga chichipenya. Ndakazoona asvika pandaiva achibva atanga kutaura achieredza misodzi

"Saka ndizvo zvavatofunga here zvekushungurudza vana vasina mhosva newe. Unofunga kuti ucharamba unaro here simba iroro." Munhu uyu aitondishura manje haazive kuti ndaitova nenharo nyangwe nekuhope kwacho.

"Mukadzi iwewe une mamhepo chete, saka unotoda kuti ndiitire vana vandisina kubereka tsiye nyoro kuti ndavakulenga here. Vanondikanganwa mangwana ava handina kana basa navo." Ndakapindura ndichiudza mukadzi uya.

"Ndizvo hazvo asi ndati ndipfuure ndichikuyambira sezvo ndine kwandiri kutoenda. Mufaro vako uchava wenguva diki asi ugare uchiziva kuti kumberi kune moto. Uchazvidemba mangwana uye uchakungura chavakaberekerwa." Mukadzi uyu aitova nemamhepo chete. Aida kutondityisa hake kuda kunditadzisa mudyandigere wangu. Manje ndakanga ndisingadzori tsvimbo nekuti gudo rabata kumeso.
Ndakazongopepuka apo ndakaona kunze kwavakuda kuchena.

Ndakazorara zvekare zvishoma ndichibva ndazomuka pava paya. Semunhu akanga anerwendo rwakakosha ndakakasika kugadzirira. Ndaifanirwa kusvika kwasekuru Kashiri nenguva sezvo vaiwandirwa. Paya basa raibatwa nekuti vamwe vainzi vaitokwira ndege kubva mhiri kwemakungwa kuti vabatsirwe. Ndichipedza kugadzirira rwendo rwangu ndakabva ndaenda kumba kwaMaidei kuti ndinoona kana akanga apedza zvese. Ndakaona apedza zvese nekugeza mota iyo yakanga yatarisa nzira yakagadzirira kutanga rwendo. Ndozvandaidira Maidei kana mukaronga chinhu chaibudirira uye aigona kubata nguva.

Iye vacho akanga atopfeka hembe dzerwendo achibva atondiudza kuti akanga amirira ini. Handina kuda kutambisa nguva ndakangonotora twangu ndichibva ndaraira Kudzi kuti agosara nevana zvakanaka. Ndakabva ndatomuudza kuti kana pasina zvandibata ndinodzoka zuva rinotevera. Ndakanga ndakamuvenga hangu Kudzi asi dzimwe nguva tainzwanana.

Nenguva isipi ndakazoona ndagara mumota yaMaidei apo takanga tatotanga rwendo. Vakanga uri mufambo apo tinozoona tapinda muBudiriro. Takachovha chinhambwe apo ndakazoona tasvika pamusha pasekuru Kashiri. Semazuva ese pakanga panevanhu vaida kubatsirwa asi vakanga vasina kunyanyowanda.

Takamirira apo jana redu rakazosvikawo. Sezvo zvaisava zvitsva kwandiri takabva tapinda muimba yasekuru yekurapira varwere. Maidei ndiye akabva atanga kutsanangura zvakanga zvichitora nzvimbo achiudza sekuru Kashiri. Vakambonyarara zvishoma apo vakazonditarisa mumaziso. Vakabva vandiudza kuti vaizoda kuvata neni mazuva maviri.

CHAPTER 21

LINDIWE

Sekuru awa vanenge vakanga votoda nezvangu chete asi chikuru kwaiva kuwana zvandirikuda. Mazuva maviri akanga asina kundiomera asi ndaida kunzwa kuti zvaizofamba sei.

"Saka zvinozofamba sei kana muchinge mapedza kuvata neni mazuva maviri acho. Ndoda kuti munyatsonditsanangurira sekuru." Ndakabvunza ndichida kunyatsonzwisisa kuti zvaizofamba sei.

"Nyaya iri apa yakakura muzukuru. Ndoda kutsvaga nzira yekuvharira amai wevana awa varikukushungurudza nhasi nekuti havasi kumira kuvarwira vari kumarinda ikoko. Zvese zvaurikuita zvichibondera ndiwo varikukonzeresa. Saka ndikaita zvandinoda kuita newe mazuva maviri ndipo pandichawana mhinduro pamwe nekusimbisa masimba ako." Vakataura sekuru ndichibva ndanzwisisa.

"Zvamataura ndazvinzwa sekuru, ndichaita sekureva kwamaita kunyangwe mukati ngatiwedzerei mazuva ndinongozvitambira zvakadaro. Chandinongoda kuti zvibudirire chete sekuru." Ndakataura ndichibvumira nhau yasekuru padenga.

"Muzukuru usatya zvako nekuti pano pachipatara. Kungoti marapirwo atinoitwa ndiwo anosiyana chete asi chikuru ndechekuti unenge wayambuka. Chinozongodiwa ndechekupota uchiuya kuzosimbisa mushonga mwedzi wega wega." Ndakagutsurira musoro ndichitenderana nezvaitaurwa nasekuru.

Takazoswera pamba paya apo paiuya vanhu vazhinji vachibatsirwa vachienda. Zvokwadi muzinda uyu vaibaywa basa nekuti paisagara pasina vanhu. Vamwe ndiwo vaiuya kuzotenda nezvakasiyana siyana vanenge vabudirira pahupenyu hwavo.

Zvisinei takazosvika nguva dzemanheru apo sekuru vakabva vavhara muzinda. Ndakabva ndarairwa kuti ndibike kudya kwemanheru sezvandakamboita musi uya. Ndichipedza kubika takabva tadya hedu pamwechete nemhuri yasekuru. Tichipedza kudya ndakabva ndaratidzwa imba yataizorara apo Maidei akaratidzwa yakewo.

Sekuru vakazouya vakabata basa ravo apo vasina kuzorora kusvika kuedze. Kuchiedza ndakambomuka mdakarara semunhu aida zororo mbijana. Ndakazomuka racheka nyika ndichiona sekuru vatotanga kubatsira vanhu. Kaisava kamuzinda kembiri asi zvaizobuda ipapo ndizvo zvaiva zvikuru. Sezvineiwo nguva dzakafamba kusvika zuva radoka zvekare.

Sekuru vakazobata basa ravo kekupedzisira apo vaizomuka vachiwana mhinduro. Kuchiedza ndakamuka ndine mufaro ndichiziva kuti sekuru vakanga wava kuzopedzisa basa racho semunhu anenge awana mhinduro. Takangobuda mumba muya takananga kumuzinda apo sekuru vakabva vatotanga basa.

"Muzukuru kwandavakuita ndiko kunonzi kupendera basa. Ndavakuda kushevedza mweya waamai wevana varikukunetsa nhasi ndobva ndauvharira muchizarira. Zvatichaita ndezvekuti uchandiudza mutupo waamai awa pamwe nezita ravo tovashevedza vouya pano." Apa ndipo pakazondiomera manje nekuti hapana kana chandaiziva panezvese zvaidiwa. Zvaida kukasika kufunga saka ndakabva ndatosimudza foni ichienda kunababa vaKudzi. Nhamba yavo yaibatika nyangwe vasiti muZimbabwe. Pasina nguva yakabva yatodairwa.

"Ko mudiwa wangu ndokumbirawoka zita remukadzi vako wekushaika uya." Ndakataura ndakamirira kunzwa mhinduro.

"Ko zita remunhu akafa nemutupo vake unozvidii, ane hukama newe here unoda kuzvishandisei." Baba vaKudzi vaitoda kundijairira chete. Dzimwe nguva vaiita kunge pfungwa dzinombovhurika sezvavakanga wavakuda kuita apa. Manje ini basa pavari ndakanga ndakapedza kare.

"Iwe ndipe zvandirikuda mhani sei uchida kunditambisira nguva. Ukada kudaro uchanetsana neni manje tinopedzerana paunodzoka." Kutaura kwandakaita ndichidai ndaiziva kuti ndinenge ndatopedza basa nekuti ndiwo mamwe mashandiro aiita mushonga wacho zvaibva zvamupa kutya.

"Ndiregererewo mudzimai wangu kukanganisa kunowanikwa. Ndanga ndisina kutarisira kukupindura kudaro asi handizivi chandibata. Rega ndikuudze zvaurikuda zvacho. Mudzimai wangu zita rake ainzi Rumbidzai uye mutupo vake ari Machuma, kana unezvimwe zvaunoda kubvunza unongondifonera." Ndakazodambura runhare mushure mekunge ndawana mhinduro yandaida.

Ndakazoudza sekuru sekutaurirwa kwandakanga ndaitwa nababa wekwangu. Sekuru vakabva vanyora zita riya pabepa vachibva variisa mukahari kavo kandisiba kuona kuti kaiva nei mukati. Vadaro ndakanzwa wavakutaura nechimwe chirudzi icho chandakatadza kunzwisisa kuti chinotaurwa kupi.

Vakaramba vachishevedzera kwekanguva apo ndakazoona vatora rimwe bhodhoro dzvuku vachibva varivhura muvharo. Ndakaona varitendeka kumadokero uko kwandakazoona mucherechedzo wemunhukadzi aifamba achibva ikoko.

CHAPTER 22

LINDIWE

Ndakanyatsotarisa chimiro chemukadzi uya ndichibva ndaona akafanana nemumwe mukadzi vandakamboona pamufananidzo. Akasvika achimira paiva nebhodhoro riya achibva atanga kueredza misodzi. Sekuru vakaramba vachishevedzera nechirudzi chavo chiya apo mukadzi uyu aingoramba akamira paiva nebhodhoro paya.

Mukadzi uya ndakaona adzungudza musoro achibva anyangarika. Sekuru vakambonyarara zvishoma vanenge vakanga vachiedza kubatanidza kuti vakanga vapotsa papi kuti munhu adzokere asina kuita zvavanga vachimuudza.

Ndakazoona vatora zvimwe zvimushonga izvo zvavakabatidza moto vachibva vatanga kuzvipfungaidza. Zvainhuwa zvichikachidza asi pakanga pasina zvekuita chandaida kubatsirwa. Ndakazonzwa wavakuenderera mberi nechirudzi chavo chiya apo mukadzi uya akabva adzoka zvekare.

Akasvika achimira pabhodhoro riya apo sekuru vakazoita kushevedzera nehasha. Ndakazoona mukadzi uya apinda mubhodhoro raiva nasekuru.

Achingopinda vakabva vavhara bhodhoro riya vachibva vanditambidza. Ndakabata bhodhoro riya mumaoko apo ndakanga ndamirira kunzwa mashoko anotevera kubva kuna sekuru.

"Muzukuru bhodhoro randakupa iri urichengetedze pakanaka. Hapana anofanirwa kuona bhodhoro iri nekuti rikangoonekwa pako papera. Ndichakupa girazi richaita kuti upote uchiona zvirikufungwa nemunhu vogara vazvivhara. Ndichakupa netsono zvekare yekuti ukwanise kubaya paunoda pamunhu anenge ari pagirazi iyeye. Shoko randinoramba ndichikuudza nderekuti chengetedza zvinhu izvozvo nekuti zvikangoonekwa pako papera." Vakataura sekuru apo vainditambidza girazi netsono yacho yaiva neruvara rwutsvuku.

Vakazonditi ndakanga ndakasununguka kubvunza pandakanga ndisina kunzwisisa apo ndakavaudza kuti ndakanga ndanzwisisa zvese. Ndakazovapa kamuripo kavakanga vareva ndichibva ndaoneka.

Takatungamidzana naMaidei takananga kumota apo takanga tagadzirira kutanga rwendo. Sevanhu vakanga vanenguva vasingazive kumba mota yakanga ichivhetemeswa zvekunge taitova munzira kuenda kudenga. Nenguva isipi takanga tatopinda kuCold Comfort. Mota yakazotyairwa kwechinhambwe apo takazosvika pamba.

Ndisati ndaburuka Maidei akabva ambodzima mota yake apo akanga ane zvaaida kundiudza. Apa ndakanyatsoteya nzeve nekuti Maidei aisangodzima mota.

"Ndavakuda kukuudza chinhu chimwechete kuti zvinhu zvako zvichengeteke. Vana vauri kugara navo awa havana hunhu vanogona kungosvika pazvinhu zvako vakazviputsa saka unofanirwa kuona zvekuita." Apa akanga areva idi kunyanya Kudzi ndakanga ndisingamunzwisise. Saka akanga orevei Maidei paaiti ndione zvekuita?

"Saka vati ndoitasei Maidei, kana ndikavauraya izvozvi kuchiri kuseni ndaimboda njere dzavo." Ndakabvunza Maidei ndavakuda zano kuti ndoitasei.

"Iyo hainetsi shamwari, vana awa vane kumusha unongovaendesa ikoko. Chimwe chazvakanakira zvekare kana ukada kumuita zvaunoda ari ikoko hapana anombokufungira. Ukaita saizvozvo unogara usina marwadzo pamoyo." Ndizvo zvandaidira Maidei pfungwa dzake dzaikasika kufunga.

"Ipapo Maidei vareva idi, nyaya yavapo ndeyekuti vana awa ndichavaendesa kumusha zvikoro zvisati zvavhurwa vobva vanodzidza ikoko. Zvandichaita ndinoitira kuno chinenge chaitika ikoko vanozvionera ikoko." Ndakataura ndichisimbisa nyaya yaLindiwe.

Ndakazoburuka mumota muya nekabhegi kangu kaiva nezvinhu zvandakanga ndapiwa kwasekuru. Apa Maidei akanga andifungisa zvimwe zvinhu zvandisina kumbobvira ndafunga. Baba wekwangu vachiuya ndaitozovaudza nyaya iyi uye vaizoteerera zvandinenge ndaaudza. Ndini ndakanga ndiri jongwe repamusha saka hapana aipikisa chandinenge ndataura.

Ndakapinda mumba mangu ndichibva ndangonanga kuimba yekurara. Ndakaisa bhodhoro rangu paigara hari iya sezvo paripo pandaivimba napo kuti hapana anosvika. Mazuva akafamba apo ndaingoshungurudzana nenhapwa dzangu apo vaimbondisiririsa dzimwe nguva. Asi kunyangwe zvakadaro yakanga isiri nguva yekunzwirana tsitsi.

Mumwe musi ndakanga ndakagara ndichidziya hangu kamushana kuitapira sezvo zuva rakanga richangobuda. Ndipo pandakabva ndanzwa nhare yangu ichirira apo aiva mudiwa wangu aifona. Ndakadaira nhare iya apo takambokurukura kusuwana kwatakanga taita.

Akazondibvunza kuti zita nemutupo zvandaida zviya zvakashanda here kwandaizvida. Ndakabva ndatodaira hongu ko aiziva here kuti zvinoda kushandei. Ndizvo zvandaidira mushonga ndaiva nesimba rekuita zvandinoda nemunhu panguva yandinoda. Ndipo paakazondiudza kuti aiva munzira uye aisvika husiku. Tichipedza kutaura ndakabva ndadimbura nhare yangu.

CHAPTER 23

BABA VAKUDZI

Ndakapedza rwendo rwangu ndine mufaro semunhu akanga afamba zvakanaka. Rwendo rwacho rwanga rwakanaka mota haina kumbobvira yaita dambudziko munzira. Ndakasvikosiya mota yebasa ndichibva ndatora yangu ndakananga kumba.

Nguva dzakanga dzafamba apo munzira makanga munemota shoma zvekuti rwendo rwakandirerukira. Senguva dzangu zhinji ndakasvika vana vangu varara. Ndakadya kudya kwangu kwemanheru ndichibva ndanorara. Ndiyo yakanga yavanguva yekubvunza kana mhuri yakanga yasara zvakanaka. Mudzimai aingopupurawo kuti vana vakanga vasara zvakanaka asi pana Kudzi misikanzwa yakanga isingaperi.

Ndakangomuudzawo kuti basa rake nderekuranga saka aifanirwa kupedzerana neanenge anetsa neshamhu. Tiri pakuita hurukuro dzedu ndipo pakabva pataura mudzimai wangu kuti aiva nenyaya.

"Baba wemwana ndinenyaya asi haina kukura zvayo, nyaya iyi inongoda moyo wenyu chete nekunzwisisa kwenyu." Akataura mudzimai wangu apo ndakamuti aenderere mberi. "Baba wemwana munenge murikuzvionawo kuti kunze kwashata zvinhu hazvina kumira mushe. Mari irikushaya simba zuva rimwe nerimwe uye zvinhu zvinokwira mazuva ese. Baba wemwana pane zvandanga ndafunga." Akataura mudzimai wangu apo ndakati rega ndinzwe zvizere.

"Vanga vafungeiko chido chemoyo wangu, taura tinzwe tione kuti tozvifambisa sei kana zvichigadzirisika tobva tazvigadzirisa." Ndakabvunza ndavakuda kunzwa kuti nyaya yaakanga afunga yakanga yakamira sei.

"Ndanga ndafunga kuti zvinhu zvisati zvaoma kudai totora Kudzi naShamiso tovaendesa kumusha vonodzidza ikoko pazvinooma tinenge tisina mutoro vakakura. "Ndakambonyarara kwekanguva ndichifungisisa zvakanga zvichangobva kutaurwa nemudzimai uyu. Ndaisada zvekuti vana vangu vaende kumusha ndaida kuti vagare hupenyu hwemuHarare ndichivaitira zvavanoda kuti vagare vachifara. Pfungwa yekuti vaende kunogara kumusha yakanga irikure neni.

"Kumusha zvinozoita here nhai mai wevana?
Ndinotoshuvira kuti vana vangu vadzidze muHarare
ndichivaitirawo zvese. Kana iri mari usandityire
yekubhadhara chikoro chavo nyangwe zviome sei
haimbofa yakashaikwa." Apa ndipo pandakanga
ndadenha mago manje. Lindiwe akanga atochinja chiso
panguva diki iyoyo.

"Ndodambudziko raunaro chete iroro unoda kuisa vana vako pamberi. Ndirikuedza kurerutsa zvinhu iwe hauteereri uri murume akambonyatsoitasei asingagone kushandisa pfungwa dzake. Kutadza kufungawo kuti apa zvataurwa ndizvo. Ukaramba uchiita kahunhu kako kekukoshesa vana usingakoshese zvandinotaura tavakunetsana manje." Ndakanyatsoona kuti mudzimai agumbuka uyu saka ndaifanirwa kumudzora.

Mai wevana inga wani kukanganisa kunowanikwa ndiregererewo. Zvese zvavaronga hapana chakaipa ngatiitei saizvozvo asi tinofanirwa kuzviita zvikoro zvisati zvavhurwa." Lindiwe akanyemwerera zvekuti runako rwake rwese rwakabva rwabuda.

"Ndosaka ndichikudai baba wemwana munokasika kunzwisisa. Zvakungoda kuitwa nekukasika chete kuti tisazomhanya mhanya." Akapindura apo ndaimuudza kuti zvese zvakangonaka.

"Saka Kuda anoitasei? Achaendawo kumusha nevamweka tongosara tiri vaviri hedu tisina chinotivhiringa uye zvikaoma tiri vaviri tinomboshingirira. Saka zvakanaka tikavaendesa wese kumusha ikoko." Chiso chaLindiwe hachina kunononoka kuchinja zvekare. Ndizvo zvaakanga ari ukamuudza zvisizvo aigumbuka ipapo ipapo. Dzimwe nguva vaitozoita seucharohwa akaita kunge shato kuri kufuta nehasha.

"Iwe Joel unotoda kundijairira, unoti mwana wangu anga akura zvekuti aende kumusha here. Hapana kwaanoenda anotoda kumboitirwawo madanha zvavaimboitira vako. Uyu haangambopedzi mari ari mumwechete." Ndakazobvuma hangu kuti zviitwe saizvozvo nekuti mudzimai wangu ndaimuda ndaisada kumugumbura.

Takazoronga kuti vana ava taizovaendesa svondo rinotevera apo ndinenge ndabva kuMozambique kwandaida kuzoenda nebasa. Tapedza kuronga zvese izvi takabva taonekana mumwe nemumwe avakuenda kunyika yezviroto. Ini ndakanga ndakatoneta zvangu saka handina kunonoka kuenda kunyika yezviroto.

Ndipo pandakatanga kufamba muneimwe nzvimbo yandakanga ndisati ndambofamba. Ndakakwanisa kunzwa izwi remukadzi wangu wekare achichema asi ndaisamuona kuti arikupi. Akaramba achichema apo ndakazonzwa izwi rake richitaura.

"Vatoshinga here kutambudza ropa rako nemutorwa, dai ndanga ndisiri muchizarira ndanyatsokuratidza nzira kwayo kwete yaurikufamba iyi asi uchayeuka bako vanaiwa." Ndakaita zvekuvhunduka ndichipepuka pandakanzwa Mashoko aya. Hongu dzaiva hope asi mashoko andakanzwa apa akandityisa. Ndakamboda kuudza Lindiwe hope idzi asi ndakatya. Ndakazongoerekana hope dzandibata zvekare.

CHAPTER 24

KUDZI

Mazuva akaramba achifamba apo takanga tavakuda kuvhura zvikoro. Ndaizovaratidza chete kuti zvechikoro izvi ndozvangu. Mumwe musi baba vakasvika ari masikati vachibva kubasa kwavo. Ndipo pavakabva vandishevedza ini naShamiso. Takaenda sekudanwa kwatakanga taitwa apo takaona vakagara naamai vaKuda.

Takamirira kunzwa zvaida kutaurwa apo takabva tanzi taizoenda kumusha mangwana acho. Kamoyo kakambofara kuti tavakumbonoona ambuya sezvo takanga tava nenguva tisingavazivi. Takanga tasarirwa nesvondo kumberi saka taizopedza shungu dzese dzekuvaona.

Chimwezve ndechekuti ndaimbofurwawo nemhepo nekuti amai vatakanga takaigirwa nababa wedu yaiva mhuka chaiyo. Chaingosuwisa ndechekuti sekuru wangu handina kumbobvira ndavaona sezvo vakaonekana nenyika ndisati ndavapo. Zvisinei takabvumirana nazvo apo takazorairwa kuti taizomuka tichigadzirira. Rwendo urwu ndaizonakidzwa narwo uye vaizochiona pandinodzoka Harare.

Sezvineiwo nguva dzaibhururuka apo husiku hwakauya hukapfuura. Ndipo patakamuka tichiona zuva idzva apo takatanga kurongedzerwa twedu. Tichipedza kurongedza twedu takabva tangotakura mikwende takananga kumota. Nenguva isipi takanga tatogara mumota apo takanga tonanga Dande.

Mota yakavhetemeswa ichipinda mudhorobho apo mairira kumumhanzi kainzwika kure kure. Tichipinda mudhorobho mota yakabva yatyairwa ichinopinda mumugwagwa unobatanidza Mazowe neHarare. Apa rwendo rwakanga rwanyatsotanga manje nekuti takanga tapinda munzira yekumusha. Mota yakatyairwa kwechinhambwe apo takaona tapfuura Mazowe tavakudongorera Bindura.

Tichibuda muBindura pakamboita mumwe mufambo vakakura tisati tapinda muMadziva. Rwendo rwakanga rwuchiripo sezvo kwatakanga tichienda kwaiva kure. Chikuru ndechekuti ndaingoziva kuti tichasvika chete. Ndakazoona tava paMkumbura panova ndipo pane muganhu vakaganhura nzvimbo iyi neMozambique apo takanga tava pedyo.

Takazochovha rwendo apo ndakazoona tapfuura paChimbuwe Mission. Apa ndipo pataishevedzera kuti tasvika kumba. Taizofamba hedu kamwe kamufambo kubva ipapo. Sezvo chinhu chese chine magumo takazosvikawo pamusha pedu.

Ambuya vakauya kuzotitambira vachiridza mhururu pamwe nekuimba kuri kufarira vazukuru wavo. Iniwo naShamiso takanga tisisazive kuvaona taitova nemufaro usingaverengeki. Takabva tatourairwa huku musi uyu apo mbuya vakanyatsoibika zvemhando yepamusoro.

Sezvo kunze kwakanga kwazosviba takadya kudya kwedu kwemanheru. Tichipedza kudya ambuya vakabva vatanga kutitaurira ngano. Pfungwa dzangu dzakambowana zororo apo ndainyatsonzwa kuti hapana anondishungurudza ndiri pana ambuya wangu.

Nguva dzakasvika pakufamba apa tese takazenge tava kuremerwa maziso nehope. Ambuya vakabva vandiratidza kwandaizorara apo Shamiso vaizonorara naye. Ndakabva ndarara zvangu dzehumambo ndichiziva kuti musi uyu ndaiva nezororo mupfungwa.

Ndakazoona ndapinda zvekare munyika yezviroto. Ndaifamba munzvimbo iya yandaisimbofamba apo kunze kwaipisa kuita kunge moto. Pasi paipisa uchiti ukapatsika vaiita kunge vatsika moto.

Ndipo pandakazonzwa kuchema asi ndaisaona munhu wacho. Ndakacheuka cheuka apo ndakashaya kuti munhu aichema uyu arikupi. Ndakaramba ndichicheuka ndichishaya munhu asi chandaiziva ndechekuti inzwi raamai vangu.

Saka vakanga vachichema varikupi? Mubvunzo vandakanga ndava kuzvibvunza ndiri pakudzungaira ndichitsvaga kwaibva izwi. Ndakazosvika panechimwe chimba icho chandakanzwa kuti ndimo maibva inzwi raichema. Paiva nekahwindo kadiki saka ndipo pandakabva ndakongorera napo. Ndakaona zvokwadi amai vangu vakamira paya vachichema.

"Ko munochemeiko nhai amai? Ndakunzwai kubva kwese kwandanga ndichifamba uko." Ndakabvunza apo amai vangu vakabva vatanga kutaura.

"Ndaida kukutungamirai parwendo rwenyu rweupenyu vana vangu kusvika masvika pandaida mweya wangu vobva vazorora. Manje muvengi azvidzivisa andivharira muchizarira." Vakataura vachibva vatanga kuchema zvekare.

"Saka tichaitasei zvatakanga takatarisa imi kuti mugotichengetedza." Ndakavabvunza amai vachibva vatanga kutaura.

"Shingirira mwana wangu ushingise naShamiso, muchafamba rwendo rwunorwadza zvamusati mamboona asi rambai makashinga. Iniwo muno handisi kuzorora ndichiri mubishi kurwisana neakandivharira muchizarira kuti ndibude. Musi wandinobuda uchaona hako zvichaitika." Nemashoko aya ndakabva ndapepuka kubva kuzviroto.

CHAPTER 25 KUDZI

Muviri wangu wese vakanga une dikita sezvo kwandaibva kwaipisa. Ndakambotanga ndapukuta dikita randaiva naro ndichibva ndatanga kubatanidza zvandakanga ndichangobva kuona kuhope. Ndakanga ndoda kunyatsoziva kuti chii chaitora nzvimbo asi pekutangira ndipo painetsa.

Ndakangozviudza kuti rimwe zuva ndaizozvibata chete. Ko akanga avharira amai wangu muchizarira ndiani? Mumwe mubvunzo vandakazvibvunza zvekare apo ndaiedza kubatanidza vanhu vandinofungira. Asi amai vaKuda nehutsinye hwavo vanenge ndivo chete, paya pavakambobuda vakaita mazuva vasipo vaiendepi? Mubvunzo vandakazvibvunza asi pakanga pasina mhinduro.

Kubva pakauya amai awa baba wedu vakabva vatochinja hunhu wavakutofarira mukadzi iyeye kutodarika isu vana weropa ravo chii chaizvo chaitora nzvimbo? Mumwe mubvunzo wandakazvibvunza zvekare asi pakanga pasina mhinduro. Manje ndaizozvitsvaga chete pandinodzokera kuHarare. Ndakanga ndatozvipira kutsvaga chokwadi chazvaiitika.

Ndakazomutsva kubva mundangariro dzangu nemachongwe andakanzwa achitanga kukukuridza kureva kuti kwakanga kwaedza. Apa ndaisazotadza kuzorora mbijana saka ndakabva ndambotsvaga hope. Ndakazomuka zuva ratobuda apo vamwe vakanga vasomuka kudhara. Ndakakwazisa ambuya vangu nemufaro apo takazogadzirirwa kudya kwekuseni.

Ndakazoenda kumombe nemukomana aifudzira Gogo uyo ainzi Tawanda. Muchinda uyu aigara zvinhambwe zvishoma kubva pamusha pedu apa. Kumombe kwainakidza tichidya hedu michero yemisango apo ndakasangana nedzimwe shamwari itsva ikoko.

Ndakazodzoka racheka nyika apo ndakanga ndava nenzara. Ndakasvika chikafu chavapo ndichibva ndadya. Ndipo pandakaona baba vangu nemukadzi wavo vakachena chena zvekuratidza kuti vakanga wavakuda kudzokera.

Ndakazobatikana ndavakunzwa kunzi takanga tavakuzogara kumusha tichidzidza paChimbuwe mission apo pakanga patowanikwa nzvimbo yechikoro. Ndakabva ndapera simba zvekuti kana rekupindura kuti ndazvinzwa handina kuriwana. Ndakatarisa Shamiso ndikaona misodzi yake ichierera apo ndakanzwa kunge ndabaiwa pamoyo nepfumo. Ndakanga ndasuva kumusha asi ndaisatarisira kubva ndanogara ikoko zvachose

Manje zvazvakanga zvadai zvaizofamba sei? Ndaizohurarama here hupenyu hwandaishuwira? Ko zviya zvandaivimbiswa nababa vangu paya zvakanga zvichazobuda here? Mibvunzo yandaingozvibvunza ndega apo pakamboita runyararo ndisina kupindura zvakanga zvataurwa nababa.

Ndakazongozviudza kuti rega ndione zvinoitika kumberi zvimwe kune chiedza. Ndakabva ndaudza moyo wangu kuti udzikame nekuti zvavaida ndakanga ndisina. Ndaida zveHarare asi ndakanga ndisisadiwe ikoko saka ndaifanirwa kudzikama. Ndakazongopindura kuti ndazvinzwa apo misodzi yangu yakanga yazobudawo kusvika kumuromo.

Ndakangotarisa amai vaKuda neziso rekuvaudza kuti misodzi yangu haibude zvenhando. Mumoyo mangu ndakanga ndatova nehondo kungoti ndaisaziva kuti ndoitangira papi uye riinhi. Mayunifomu akanga atotengwa kare mari yabhadharwa taizoendawo nevamwe musi wekuvhura.

Tapedza kuonekana vakabva vabuda apo vakatanga kufamba vakananga kumota. Ndakaramba ndakamira muchivanze ndakatarisa mota iya apo ndakazorega ndisisaiona. Ndakazobva pachivanze paya apo ndakatanga kufamba ndichienda mumba. Amai vakanga vareva idi pavakandiudza kuhope kuti ndiwo mavambo enhamo.

Zvinhu zvaindibata hazvo asi panechinhu chimwechete chandaizofarira. Ambuya vaizotibata zvakanaka sevazukuru wavo zvichireva kuti takanga taburitswa mumusungo waFarao. Ndakazongozviudza kuti ndizvo zvatovapo hapana chichambochinja.

Svondo rakazopera tiriko kumusha apo mazuva akanga achifamba ndipo pakazosvikawo zuva ratakanga takamirira kuti tiende kuchikoro. Ndakanga ndatova neshamwari dzaidzidza ikoko nechekare saka rwendo harwuna kumbonetsa. Shamiso akanga awana nzvimbo ipapo zvekare sezvo paiva nepuraimari nesekondari.

Tafamba mufambo murefu ndipo patakabva tasvika pachikoro. Zvokwadi chaiva chikoro chihombe nyangwe zvazvo chakanga chakasarira kumashure. Tichisvika takatanga nekumbotenderera apo taimboratidzwa mamiriro akanga akaita chikoro chedu. Mushure mekutenderera takazoita ungano apo takanga tamirira kunzwa zvaizotevera. Ndipo pataiziviswa zvakawanda pamwe nekuziva vadzidzisi vaidzidzisa pachikoro apa.

Takazoratidzwa mataizodzidzira apo takaswera tavamuzvidzidzo. Mazuva akafamba akava mwedzi apo ndakanga ndazojaira hupenyu hwekumusha. Mumwe musi ndichifamba munzira ndipo pandakatanga kunzwa musoro nedzungu. Ndakashaya kuti chii chakanga chavakutora nzvimbo uye handizivi zvakazoitika kumberi

CHAPTER 26

LINDIWE

Rwaiva rwendo rwurefu kubva kuDande kusvika kuHarare. Pfungwa dzangu dzakanga dzava nezororo kunyangwe zvazvo ndakanga ndisati ndapedza basa. Ndakanga ndavakuverenga kuti mhandu dzaenda kwasara kudzirwisa dziri ikoko ndoziva kuti ndasara nemwana vangu Kuda pamwe neakanga ari mudumbu.

Mota yakatyairawa kunopinda muHarare apo takazotora mugwagwa unonanga kumba. Kunze kwakanga kwasviba apo takanga taneta nerwendo. Zvakanga zvisiri nyore kutora nguva yakareba kudaro vakagara usati vasvika kwaunoenda.

Zvisinei hapana rwendo rwusina magumo saka ndakazoona tasvika pamba. Kuda akanga achigara kwaMaidei saka ndaizomutora makuseni sezvo akanga akachengeteka. Ndakabika kudya kwedu kwemanheru apo takabva tarara.

Ndipo pandakaona ndapinda zvekare munyika iya yatinogaropinda mazuva ese takarara. Ndiyo nyika yezviroto isingagarwi zvachose asi unongomupinda usiku vobuda kuseni. Nzvimbo yacho yandakanga ndiri ndakatadza kuiziva.

Ndakaona mumwe murume akanga achembera asi handina kumuziva. Akafamba kusvika pandaiva apo airatidza kuti akagumbuka zvisingaite. Akanditarisa mumaziso kwekanguva apo akabva azotanga kutaura nyaya yake.

"Inguva chete asi uchaona zvako. Ugare uchiziva shona inotaurwa nevakuru kuti pabva gondo panomhara zizi kuti ndeyechokwadi. Chimboita uchiri mukana vako asi vatenderwa kuzviita nguva diki chete. Uchamaona hako magumo acho uye uchademba. Ndaenda ini usare zvakanaka." Akataura murume uya achibva anyangarika.

Ndakabva ndatongomuka ndichivhunduka apo ndakanga ndadikitira. Ndakagara pamubhedha pangu ndavakuedza kubatanidza zvaitora nzvimbo. Idzi dzinenge dzaitova hope dzechando semunhu akanga anyanyotonhorwawo nacho munzira tichibva kumusha. Ndakazongozvisimbisa hangu kuti hapana chaizoitika ndaizozvirwirawo kana zvashata.

Ndakabva ndatorara dzehumambo ndichibva ndakanganwa nhamo dzese. Ko ndini ndakanga ndichitonga ndine chinzvimbo chababa murume vangu aitoteerera ini. Ndakanga ndine simba rehumambo uye hapana aizonditorera simba iroro. Hwaiva husiku hurefu apo ndakazoona kunze kwachena. Yakanga yava nguva yekumuka ndichiita mabasa angu ese epamba.

Ndakagadzirira baba wekwangu avo vaida kuenda kubasa. Ndichipedza takagara tikanwa svutugadzike apo taikurukura pamusoro paKudakwashe. Ndaida kuti abve paCold Comfort pakanga pakasarira. Sarudzo yangu yakanga yava paHerentals primary iyo yaiva pedyo nepamba.

Aingofamba chinhambwe chisingasviki maminitsi mashanu aibva atosvika pachikoro. Baba vaKudzi vakamboda kuramba ramba vachiti tinenge tavakuburitsa mari yakawandaka sezvandakanga ndambovaudza pavana wavo. Ndakabva ndati rega ndivapindure mashoko vamboenda kubasa vakachangamuka.

"Asi baba imi hamufungi, mwana mumwechete angabva apedza mari yese mumba here. Vako mwana Kudzi akambodzidza kunodhura wani ko wangu ndiye adini. Ukaramba uchindijairira zvauri kuita izvozvo tichanetsana. Ikozvino pandinotaura haufanirwi kupindura nekuti une dambudziko ndini ndicharonga zvinhu zvese mumba iwe chako kutsvaga mari." Ndakanga ndatogumbuka kuita kunge moto wadirwa peturu.

Ndakaona murume mukuru apeta muswe ndikaziva kuti ndabaya dede nemukanwa. Kana simba rekuti andipindure pakanga pasisina. Akazongokwanisa kukumbira ruregerero chete. Takazotenderana kuti Kuda aizoenda paHerentals apo akanga avakupinda mugwaro rechipiri. Tichipedza kunwa tii ndakaperekedza murume vangu kumota. Nechemumoyo ndaingomuti uchafamba hako netsoka ndirini ndakufamba nemota iyoyo. Kana ndada ndaizviita hangu nekuti simba racho ndakanga ndinaro.

Mota yakamutswa apo baba vaKudzi vakaisimudza ichibuda muchivanze. Nenguva isipi yakanga yatotarira nzira yekunanga kubasa apo ndakaitarira kusvika ndisisaiona. Ndakazoita basa rangu rese ndichibva ndanoona Maidei. Ndakatora mwana wangu apo ndaimuudza pandakanga ndava.

Iye aingondisimbisawo kuti kana zvazoita zvese zvava muzita mangu murume aifanirwa kuenda muvhu. Zvikoro zvakazosvika pakuvhurwa apo Kuda akatanga kuenda kuHerentals kwandakanga ndawana nzvimbo yake. Akasvika pakuita mwedzi achiendako apo ndakazofunga kuita basa rangu.

Ndakaenda pagirazi rangu apo ndakatanga kuona Kudzi achifamba. Aitoratidza kuti zvese zvakamunakira haana marwadzo mupfungwa. Manje akanga airasa rwendo rwuno ndakanga ndapihwa simba rechikuriri. Ndakatora tsono ndichibva ndabaya musoro apo ndakabva ndatoona achiubata kureva kuti vakanga varwadza. Ndakasekerera hangu apo ndakatora hari ndichidaidzira kuti pfungwa idzi dzava dzemwana wangu.

CHAPTER 27

LINDIWE

Ndichipedza kutaura mashoko aya pahari yangu ndakabva ndatarisa zvekare pagirazi riya. Ndakaona mwanakomana uya oramba akangobata musoro vake apo akazotanga kuseka ega pasina amutaudza. Ndakasekerera hangu ndikati nechemumoyo rwendo rwuno ndapihwa simba rekuvakurira.

Ndakambotenderera imba yese ndichipembera apo ndaifarira kuti ndafamba nhanho imwechete. Kwakanga kwasara Shamiso kadiki kacho zvekuti njere dzemwana wangu dzaibva dzawedzera. Shamiso ndaingomurwarisa nechirwere chemusoro chete ndoziva kuti basa ndinenge ndabata.

Basa iri raida kumbotonhorerwa mbijana ndichitenda vadzimu vasekuru Kashiri vakanga vandikundisa ndikabudirira. Ndakangobuda ndakananga kuchitoro kwaMutema kuti ndimboona zvekuita.

Ndichisvika paya ndakabva ndatenga chinwiwa changu chefanta iyo yandaifarira samare. Ndichibvako ndakabva ndadzoka kumba. Ndaiti ndikadira chinwiwa changu mugirazi ndikadzvuta mbichana ndaibva ndamboenda panze kunodira pasi kutenda vadzimu.

Ndakanwa chigubhu chese apo ndakanyatsonzwa kuti ndatonhorerwa uye vadzimu vasekuru vakanga vafara. Ndakabva ndabuda ndakananga kumba kwaMaidei. Nenguva isipi ndakanga ndatosvika pamba pake apo ndakaona achiona chivhiti vhiti. Ndipo pandakamukwazisa achibva atanga kutonditaudza ndisati ndagara pasi.

"Mufaro waunawo nhasi kwakanaka here nhai shamwari yangu. Tipe tinzwe chaunza mufaro uyu tifare tese." Maidei akanga atozviona kuti mufaro wandakanga ndinawo ndaitoda kupinda mudenga rechinomwe.

"Shamwari zvatakanga tafambira zviya tabudirira. Kutaura kuno mumwe munhu ari pamarwadzo zvangu zvatofamba." Ndakataura ndichitadza kunyatsogadzikana ndaitoda kubhururuka seshiri.

"Chimbomira kutamba neni Lindiwe. Unoreva here kuri kutaura kwatiri kuita pana atorerwa njere. Iti ndirikutamba Lindiwe." Maidei aifunga kuti ndirikutamba aisaziya kuti ndirikurevesa.

Pakarepo nhare yakabva yarira apo ndakaona ichibva kumusha kunambuya. Ndakaidaira nhare iya apo ndakabva ndatanga kutaura ndakanyatsomira padhuze naMaidei. Ndipo pandakabva ndaudzwa kuti Kudzi akanga avakupenga.

Maidei akabata muromo achinzwa kuti chakanga chiri chokwadi. Zvainetsa kutenda nekwatakanga tabva tichironga tsoro ichibondera. Apa zvakanga zvazobudirira saka zvainetsa kutenda. Pakamboita runyararo hapana aiziva zvaifunga mumwe.

"Saka vafungei manje nekuti apa tatofamba nhanho tavakufanirwa kufamba kuenda mberi. Ziva kuti basa richiripo uye rwendo rwacho rwakakura." Akataura Maidei apo aida kunzwa zvandaironga kumberi.

"Apa ndombozorora asi pamberi apo ndichambobata Shamiso ndomurwarisa ndowandudza pfungwa dzemwana wangu. Murume wangu ndichambomupa nguva sezvavakandiudza paya kana zvese zvandinoda kuti aite zvapera ndobva ndamuuraya. Kana zvese zvaita ndobva ndaziva kuti pfuma yava yangu nevana vaangu. Ava vana wemutorwa ndinozovapfuudza kana kana vangu vapedza chikoro." Ndakataura apo Maidei ainyemwerera kureva kuti ndakanga ndabaya dede nemukanwa.

"Ipapo vagona kutaura nekuti zvinoda kungwara ngwara. Ukaita zvekutamba unozoushaya mukana iwoyo saka itogara vaushandisa." Chokwadi Maidei airevesa zvaida kungwara nguva ichiripo. Ndaifanirwa kumhanya pachine nguva nekuti handiziva zvaizoitika mberi. Takazokurukura hedu dzimwe nyaya naMaidei kusvika zuva radoka apo takazoonekana.

SHAMISO

Kupenga kwaKudzi kwakangotanga sekuseka ndikashaya kuti chii chakanga chichitora nzvimbo. Musi uyu akabva kuchikoro ega apo ndakanga ndatungamira kare. Ndakatogara nambuya ndipo pandakaona mumwe mukomana aidzidza pachikoro pedu achiuya achimhanya. Mamhanyiro aakanga achiita ndakamashaira chirevo aitoita kunge arikuda kudonha.

"Kwakanaka here nhai muzukuru zvaunouya uchimhanya zvakadaro." Vakabvunza ambuya vangu apo mukomana uya aingofemeruka kuratidza kuti kwaakanga abva kwaipisa.

"Chimbotangai mandipa mvura ndinwe ndozonyatsotaura zvakanaka." Kwaakanga abva kunenge kwakanga kusina kumira mushe. Ndakaenda mumba kunotora mvura sekurairwa kwandakanga ndaitwa naambuya. Ndakapa mukomana uya achibva anwa mvura iya. Achipedza akabva apinda munyaya yake.

"Ambuya zvamunondiona ndiripano kwandabva hakuna kumira mushe. Muchindiona ndichitaura kudai zvandaona zvinotyisa. Mwanakomana wenyu vamunogara naye pano arasika njere." Pakamboita runyararo pasina ataura.

CHAPTER 28 SHAMISO

Zvainetsa kutenda nekuti Kudzi vacho akanga abva pamba ari mutano uye ndakanga ndamusiya kuchikoro ari mutano. Ambuya vakazotaura pava paya apo vakanga vachigere kunzwisisa zvaitaurwa nemukomana uyu.

"Mukomana nyatsataura nyaya yako tinzwe, unorevei kana uchiti Kudzi arasika njere. Chimbomira kutamba nepfungwa dzangu ndava munhu mukuru ufunge." Vakataura ambuya apo vaisanyatsonzwisisa zvaitaurwa nemukomana uyu.

"Ndirikurevesa ambuya, ndanga ndichitobva kuchikoro ndichibva ndaona Kudzi achifamba achiseka ega munzira. Pandasvika paari ndikamushevedza andituka mashoko andisingakwanisi kukutaurirai. Ndamboda kumubata kuti ndiuye naye asi ane simba rakawandisa ndazvitadza. Kutaura kuno hazvina kumira mushe ambuya huyai muone." Mukomana uya akabva asimuka pamwe maambuya vachibuda muchivanze.

Ini handina kuda kumirawo semunhu aida kuona zvaiitika. Ndakabva ndateverawo kumashure sezvo ndaida kuona kuti ichokwadi here. Takambofamba karwendo kakati kuti tisati tasangana naye. Takaramba tichifamba nenzira apo takazomuona azara huruva muviri wese. Anenga akanga atomboumburuka muvhu nekuti ndirwo ruvara rwakanga rwatovapo. Misodzi yangu yakatanga kuerera ndikanzwa kunge ndaidzurwa moyo wangu kubva pavaigara.

Ambuya vakada kumubata kuti tiende naye kumba achibva avapotsera bhegi rake rekuchikoro.
Vakambodzoka kumashure mbijana vachigadzirira kuti vamubate zvekare. Chokwadi zvandaiona mumeso angu apa zvaitokunda ngoma kurira.

"Ndisiye wanzwa, ukada kutamba neni ndinokuuraya izvozvi. Pane arikundishevedza ndakuenda hangu musandibata. Anenge andibata ndinomuuraya izvozvi." Kudzi akanga atochinja kuita mhuka chaiyo. Ndakatadza kuzvitenda kuti ndiye akanga achitaura mashoko aya. Ambuya vakada kubata vachibva vasundwa kwakadaro uko.

"Ndati usandibate wanzwa, ndoda kutoenda kudhorobha ndirikudiwa izvozvi. Hanzi ndiuye kusango nekuti miti yacho handichaiona. Ndirikutodaira foni izvozvi udzai baba vangu kuti ngavauye tisangane munzira." Zvaitaurwa zvacho zvakanga zvisina kana zvazvinoreva. Ukaedza kubatanidza kuti aitii vaigona kuzotopedzisira wava kupengawo.

Ambuya vakabva vachaya nhare apo ndakanzwa vachitaura naamai Kuda. Vakabva vavaudza kuti mwana arasika njere kuno asi runhare rwacho harwuna kutora nguva rwunenge rwakanga rwapera mari. Zvinhu zvacho zvakanga zvatova manyama amire nerongo chaiwo apo mbuya vakanga vapererwa.

Pakazongopfuurawo varume vatatu avo vaitofambawo nenzira. Apa paisada kunyara saka ambuya vakabva vakumbira varume vaya kuti vatibatsirewo padambudziko rataiva naro. Varume vaya vakabvuma apo vakanga vatogadzirira kubata Kudzi. Iye kudzi vacho akatanga kumhanya achitiza varume vaya avo vakabva vatanga kumutevera.

"Ndakuudzai kuti ndisiyei kare hamudi kundinzwa, sadza rangu rakatondimirira kumberi imi murikuda kundidzivisa kunoona zvandirikuda kuona. Hamuone here kuti ndapihwa basa ndiko kwandinoda kuenda." Apa Kudzi aitaura achiita zvekupopota achienda. Zvokwadi pakanga pasina kumira mushe. Mashoko acho aitaurwa aisava kana nechirevo.

Varume waya vakatevera kuti vamubate apo akaramba achimhanya. Akanga atova shamwari yemhepo zvekuti mhepo yacho ndiyo yakanga yava kutopinzwa chikoro naye. Varume vaya ndakaona vamira vakabata muchiuno ndikaziva kuti vakanga vakanda mapfumo pasi.

Saka takanga tichaita sei zvinhu zvazvakanga zvamira zvakadaro. Ambuya vakasvika pane varume vaya vakavatenda nechido chavakanga varatidza kunyangwe zvazvo zvakaramba. Varume vaya vakazoenda apo takazosara nenhamo yedu tega. Apa Kudzi takanga tisisamuone mamhanyiro aakanga aita achibva apa akanga asiri ezera rake.

Nhare yaambuya yakabva yarira zvekare apo vakatarisa kuti vaone aifona. Ndakanzwa wavakutaura kuti ndibaba vaifona apo vakabva vaidaira. Vakatanga kukurukura apo vakabva vapinza nyaya yaKudzi akanga arasika njere mudariro.

"Kuno hakuna kumira mushe baba vaKudzi, mwana wenyu arasika njere izvozvi atoenda nesango." Vakataura ambuya pafoni paya apo vakanga vamirira mhinduro kubva kune rumwe rutivi. Vakataurirana kwekanguva apo runhare rwakazodambuka.

"Baba vako vari munzira kuenda kuZambia apa vanga wavakusvika kuborder saka vati wavakutaura nevakuru webasa vadzoke. Manje hameno kuti ndiriinhi wavachasvika." Vakataura ambuya apo zvinhu zvacho zvaitopedza simba. Baba ndiwo vaitotarisirwa kuti tiite maonera pamwe apa vakanga vari kure. Takazotanga kufamba hedu naambuya wangu apo pakanga pasina ane zano. Tavakusvika pamba takaona Kudzi achidzoka kwataiva ari mhepo chaiyo.

CHAPTER 29 SHAMISO

Mamhanyiro aakanga achiita aitotyisa zvekuti taitotya kusvika padhuze naye. Akasvika achimira pana ambuya achibva atanga kutaura.

"Iwewe chimbosiyana neupenyu hwangu, zvaurikuita zvekuswera uchinditevera handisi kuzvida.
Ndambokuudza paya kuti ukaramba uchinditeverera ndichakuuraya." Akataura Kudzi apo chiso chacho chaitotyisa kutarisa. Ambuya avo vakanga vachiudzwa mashoko aya vakashaya kana remuromo.

"Ambori aniko iyeye arikutambudza muzukuru wangu kudai, ambori ani iyeye?" Ambuya vakabvunza vachiita zvekushevedzera.

"Izvozvo zvaurikubvunza itori imwe nyaya, zita rangu ndinonzi Chigaramusango ndini muridzi wemasango. Ndimo mune midzimu yangu mukaona ndaendamo musanditevera." Chokwadi zvakanga zvatoipa zvavakutokunda ngoma kurira. Ndakaona misodzi yava kuerera mumaziso ambuya vangu sezvo zano pakanga pasisina. Kudzi akazobva pamba apo akatanga kufamba achitaura nyaya ega.

BABA VAKUDZI

Ndakabuda hangu kuseni ndichienda kubasa zvandaingoita mazuva ese. Ndakatyaira mota ndichipinda mudhorobha apo ndakazopfuurira ndichienda kuMsasa. Nenguva isipi ndakanga ndatosvika pagaraji pedu apo ndakasvika ndakamirirwa nebasa.

Ndaifanirwa kuenda kuZambia nebasa apo ndaizoita zvimazuva ndiri munzira. Mota yangu yakatanga yaongororwa isati yatanga rwendo kuti ndisazosangana nedambudziko. Ichipedza kuongororwa nanachiremba ndakamba ndatoimutsa kuti itange rwendo. Ndakamboisiya ichizara mweya semota hombe kuti ndinyatsotanga rwendo zvakanaka.

Ndaona kuti yazara mweya ndakabva ndatanga rwendo. Ndakaivhetemesa mota sezvo ndaiva nerwendo rwurefu. Ndakaityaira mota apo ndakazoona ndava munzira inonanga nekumuganhu weChirundu. Rwendo rwacho rwakanga rwakakura apo ndakazoona ndavakusvika kuChirundu.

Ndipo pandakabva ndatanga kubaya baya nhare yangu apo ndakanga ndambomira padivi ndichizorora. Ndiri pakubaya baya nhare kudaro ndakabva ndafunga amai wangu apo ndakabva ndatovafonera. Yaiva tsika yangu kuti kana ndavafunga ndaivafonera. Ndakazosuwa apo ndakataura naamai wangu vachindiudza kuti pakanga pasina kumira mushe. Mwanakomana wangu Kudzi akanga arasika njere saka pakanga pasina kumira mushe. Nekwandakanga ndiri ndakabva ndatopera simba. Ndaifanirwa kuona zvekuita nekukasika nekuti ndaisaziva kuti arikupenga kusvika papi.

Ndaifanirwa kuenda kumusha ikoko nekukasika ndonoita maonerapamwe naamai vangu tichironga kuti toitasei. Ndakavavimbisa kuti ndaizouya mushure mekunge ndataura nevakuru wangu webasa. Ndichipedza kutaura naamai wangu ndakabva ndatofonera vakuru wangu kubasa. Ichingodairwa ndakabva ndataura nyaya yangu yezvakanga zvaitika kumusha.

Ndakazosununguka apo ndakanzwa kuti pane mota yedu yaibva kuZambia ikoko saka taizongochinjana mota nemutyairi wacho ndobva ndadzoka nayo Harare. Ndichipedza kutaura nevakuru vangu ndakabva ndambogara mumota mangu ndichinyatsofungisisa zvenyaya yakanga ichangobva kuitika.

Chii chaicho chakanga chambotora nzvimbo? Mubvunzo wandaingozvibvunza ndakagara mumota muya. Angava ani iyeye akonzeresa zvinhu zvakadaro pamwana wangu? Ndaingoramba ndichizvibvunza mibvunzo asi ndaishaya mhinduro. Ndakazongobiwa nemhepo ndirimo mundangariro dzangu. Ndipo pandakabva ndapinda munyika yezviroto. Ndiri kurota kudaro ndaitofamba muneimwe nzvimbo apo ndakabva ndasangana nababa vangu. Ndakavatarisa chiso chavo ndichibva ndaona vasina mufaro.

Takaramba takatarisana kumeso pasina akanga achitaura nemumwe. Pava paya ndipo pavakazoshama muromo kuti vataure.

"Mwana wangu uri parumananzombe asi hausi kuzviona, urikuzviti une rugare asi une nhamo huru." Ndakashaya kuti mashoko ababa vangu akanga achirevei. Pachokwadiwo hapana chandaishaya pakurarama uye chese chandinoda ndaingochiwana nekuti mari yakanga iripo. Saka nhamo yandakanga ndinayo yakanga iri yei? Mubvunzo wandakangozvibvunza ndisati ndataura mashoko andaida kutaura kunababa vangu.

Ndipo pandakati rega ndibvunze baba vanyatsondiudza pakanga pakananga nyaya yavo. Ndaida kuziva kuti parumanazombe pandakanga ndiri ndepapi ndotangira ipapo kuzvibatsira. Pandakada kuti nditaure ndipo pandakaona baba vangu vachinyangarika apo ndakashaya kuti vaendepi. Ndakazopeputswa kuhope nemota yandakanga ndakamirira iyo yakanga yasvika.

CHAPTER 30 BABA VAKUDZI

Ndakaburuka mumota mangu ndichibva ndanokwazisana nemutyairi wemota iya. Takambokurukura zvishoma apo ndakabva ndatanga kugamba ndichienda kumota yake yaakanga auya nayo iye achienda kuneyangu. Muchinda uya akabva atosimudza mota achibva pandakanga ndiri paya akananga kuZambia.

Nyangwe neniwo pakanga pasisina chekumirira saka mdakabva ndasimudzawo mota yandakanga ndasirwa. Iyi yakanga iri yerudzi rwefreightliner ir columbia ndiko kusiyana kwayakanga yakaita neyangu chete asi zvimwe zvese zvaiva zvimwechete.

Ndakatanga ndichifamba hangu pore pore apo ndaimboedza kubatanidza zvandakanga ndabva kurota. Paya ndakanga ndangogumira mumupeputswa saka ndakanga ndisina kumbofunga nezvazvo.

Mashoko andakanga ndanzwa kuhope akandisiya ndine mubvunzo sezvo ndakanga ndoda kuziva. Manje munhu aitaura neni wacho kuhope akabva angoenda asina kupedza kutaura. Ndaizowana kupi mhinduro iye munhu anga ainayo asingaoneki. Ndakaenderera mberi nerwendo rwangu apo ndakazenge ndaisa pfungwa iyi padivi. Nyaya yemwana wangu ndiyo yakanga yava mudariro apo ndakanga ndavakufunga kuti ndotangira papi. Ndakazofunga hangu kuti zvimwe ndizvo zvairehwa nababa kuti ndiri parumananzombe asi handisi kuzviona. Asi izvi ndaizviona wani kuda panezvimwe zvakanga zvakavanzika.

Saka ndaizotangira papi ndasvika kumusha ikoko? Mubvunzo vandakangozvibvunza apo zvainetsa kuziva kuti chivanhu here kana kuti kungorwarawo. Ndakazongozviudza kuti ndozozviona ndava ikoko nekuti musoro vaigona kutsemuka. Ndakaityaira mota husiku hwese apo ndaimboita ndichizorora kuti ndisazokonzera njodzi munzira nekuda kwekuneta.

Kunze kwakazoedza ndavakuda kupinda muHarare. Nenguva isipi ndakanga ndavakutosvika kugaraji redu iro raiva kuMasasa. Handina kuzotora nguva ndakanga ndatomisa mota payaifanirwa kumiswa sezvo yakanga isina chayakatakura.

Handina kuda kutambisa nguva ndakangonanga kumahofisi evakuru vangu kuti ndivaudze zvandakanga ndavakuita ndichibva pabasa. Ndaizotyaira mota kuenda kumba apo ndaibva ndazoenda kumusha. Kumba kwacho ndaisada kusvika ndichimira nekuti ndakanga ndanonoka nechekare. Ndichibva kumahofisi evakuru ndakabva ndananga kumota yangu yekumba apo ndakaimutsa kuti nditange rwendo. Hapana dambudziko rayakanga inaro saka ndakabva ndatosimuka pabasa apa ndichipinda munzira inonanga kumba. Rwaiva rwendo apo ndakazoona ndava mudhorobha.

Makanga musina mota dzakawanda saka handina kutora nguva ndirimo ndakanga ndatova mumugwagwa unobatanidza Harare neBulawayo. Ndakaityaira mota apo ndakazoona ndavakudarika paround about yepaWarren park. Ndichibva muWarren park ndakabva ndakwidza kamukwidza kainotisvitsa panechitoro cheN.Richards. Kubva paN.Richards ndaizotyaira mbichana apo ndaizotora kamwe kanzira ndisati ndakwidza makata epaflyover.

Ndakaityaira mota kubva kuya apo ndakazoona ndavakunopinda muraini medu. Nenguva isipi ndakanga ndavapamba apo nguva dzakanga dzava kuma10. Mudzimai wangu akanga apedza basa rese remumba akagara pavharanda achiyeva chivanze.

Ndakaburuka mumota mangu apo chiso changu chakanga chisina mufaro. Ko mufaro wacho ndaigouwana kupi ndichiziva kuti mwana wangu akanga ari musango. Lindiwe akamboramba akanditarisa kumeso apo takanga takwazisana. Ndipo paakazoshama muromo kuti ataure. "Ko kwamunogouya makasuwa kudaro maitwasei nhai baba wemwana. Zvinhu zvinotaurwaka kwete kusvika makasuwa kudaro mongonyarara." Apa mudzimai wangu akanga ataura idi nekuti kuramba ndakanyarara hapana zvakwaizondibatsira. Takapinda mumba tichibva tagara pasi apo ndakabva ndatanga kutsanangura nyaya yangu.

"Mudzimai wangu kutaura kwandiri kuita zvinhu hazvina kumira mushe, Kudzi arikurasika njere kumusha uko kutaura kuno handizive kuti aripapi. Ndirikutoona kunge akaenda nasango nekuti mataurirwo azvaiitwa aitotyisa kubata." Ndakambonyarara kwechinguva apo ndakazoenderera mberi.

"Apa ndinehope dzandarotawo ndashaya kuti zvarevei, ndarota baba vang vachinditi ndiri parumananzombe asi hanisi kuzviona. Vakanditi ndarikuzviti ndakagarika asi ndirimunhamo zvinhu zvacho ndazvishairwawo pazvo vabva vangonyangarika vasina kunyatsondiudza." Lindiwe akamboseka achibya azotaura.

"Baba wemwana manga matonhorwaka mavakurota hope dzechando. Hope dzamarota hadzina kana musoro musashungurudzwe nadzo. Saka nyaya yaKudzi manga mafungei." Mudzimai wangu paakandibvunza kudai ndakabva ndamuudza kuti ndavakutoenda kumusha. Ndakaona achisunga kumeso kuratidza kusawirirana nazvo.

CHAPTER 31 BABA VAKUDZI

Akaramba akasunga chiso kudaro izvo zvaitondiudza kuti aisawirirana nezvandakanga ndaronga. Pava paya ndipo paakazotaura.

"Saka unoti kana ukaendako pane pazvichachinja here? Hapana chinochinja anongoramba achipenga. Chitoshanda nezviripo votoziva kuti wava nebenzi rako. Zvimwe unogona kuti arikupenga idzo dziri mbanje dzaanoswera achibhema neshamwari dzake." Mashoko aLindiwe aindirwadza nekuti ndaigona kungonofambira nyaya dzacho mwana wangu akapora.

"Asika mudiwa wangu zvanga zvakakosha kuti ndisvikeko ndinyatsoona zvirikuitika. Dzimwe nyaya togona kudzifambira kune vanorapa zvechivanhu mwana akapora." Ndakataura apo ndakanga ndatodenha mago.

"Murume iwewe wavakuda kupinda memwenje mudziva. Asi vakatokanganwa kuti ndakakuti haupikise zvandinenge ndataura. Hapana kwauri kuzoenda nekuti hazvibatsire kuburitsa mari yakawanda kuenda kunoona benzi pasina chaunogadzirisa." Lindiwe akanga avakubvira kunge moto wepeturu.

Ndakabva ndanyatsoona ndega kuti hapana kwandinoenda. Mudzimai wangu ndaimuda chaizvo saka ndaisada kumugumbura. Ndosaka ndaiti akandirambidza chinhu ndaibva ndaregera. Chemusi uyu ndakazoswera ndichidzungaira hangu ndiri pamba.

LINDIWE

Basa rakanga rafamba saka raisada anorikanganisa.

Hope dzakauya dzichitaurwa nababa vaKudzi ndakanyatsodzibata ndichibva ndaona dzirikuda kufumura mabasa angu. Ndakanyatsoona kuti murume wangu anogona kuzosimudza musoro ndichibva ndagara ndamunyepera kuti ihope dzechando idzo.

Pachokwadiwo akanga ari parumananzombe asi aisafanirwa kuzvitsvaga nekuti zvizofumura ini. Patakanga tavakuda kupesana ndipo pekuda kuenda kumusha kunemwana aipenga. Kuenda kwaaida kuita kumusha kwaizotokonzeresa zvakanyanya nekuti vaitozofamba chete vachida kuti mwana abatsirwe.

Akamboda kushingirira asi ndakaramba ndakaramba ndakatsikawo madziro ndichimuudza kuti hapana kwaanoenda. Ndaiziva kuti ndikamukwidzira izwi anobva adzikama. Zvechokwadiwo akabva adzikama zvekuti vaitombozvibvunza kuti ndibaba wemusha here ava.

Ndakazoswera ndichiita mamwe mabasa angu epamba apo baba vaKudzi vaigeza mbatya nekune rumwe rutivi. Ndaimbopota ndichinodziona kuti dzirikuchena here nekuti ndaisada zvembatya dzinosara dzakasviba. Paaisiya pakasviba ndaimboita ndichigogodza musoro iwoyo kuti achangamuke.

Foni yababa vaKudzi yakazorira zvekare apo dzaiva nhamba dzekumba zvekare. Ndakamira padhuze naye kuti ndinzwe zvavakanga vachitaura. Ndipo pavakaudzwa nababa vaKudzi kuti ndarambidzwa apo ndakanzwa izwi rinehasha richibva kunerumwe rutivi. Foni yacho yakanga yaiswa pekuti munhu ari padivi kana arikure mbichana ainzwa zvekare. Ndipo pandainzwa izwi raamai wacho vachipopota.

"Mwana iwewe unenge vakadyiswa chete, chokwadi ungarambidzwa kuuya kudambudziko nemukadzi saka unozviti baba papi. Kamukadzi kako kanenge katori kamunin'ina kasatani nekuti haungataure zvekuti tirikutambisa mari padambudziko." Chokwadi amai awa vaipopota. Manje mwana wavo ndaisambomusunungura nyangwe zviitasei.

Vakaramba vachitaura pafoni paya vachinetsana zvavo ndakateerera. Chemusi uyu pakataurwa mashoko zvekuti dai ndaiva pedyo ndaipihwa kana micheka mitatu. Baba vaKudzi ndiwo vaingopererwa nemashoko pafoni wavakushaya zvekupindura. "Ndakugara ndakuudza ndiripano kuti ukasauya handina basa newe. Ndazviona kuti hauna hanya nemwana vako unongoda mukadzi chete. Manje ndavakufambira nyaya yacho ndoda kuti mwana abve musango adzoke kumba." Apa vamwene wangu vakanga wavakuda kundiparira.

Nyaya dzavo dzekuda kufamba idzi dzaisazondiperera mushe nekuti ndaizosara ndiri pachena. Manje ndakanga ndavakuzviziva saka zvaisazobudirira. Ndaiva nezvombo zvangu zvekurwisa saka ndakanga ndakatogadzirira. Hurukuro yakazopera apo baba vaKudzi vakazodambura runhare.

Vakabva vaenderera mberi nekugeza hembe apo ini ndakabva ndapinda mumba. Ndakanga ndavakuda kutotanga basa rangu randakanga ndakadanwa ndikadaira. Ndiro basa raiita kuti hukuru hwangu huonekwe. Ndakakiya musuwo wemba yangu yekurara kuitira baba vaKudzi vaigona kuzongosvika vachipinda.

Ndakaburitsa girazi rangu ndichibva ndatanga kuona zvaiitika kumusha. Ndakaona ambuya vaKudzi vachibuda muchivanze chavo apo vaiteverwa mumashure memuzukuru wavo Shamiso. Ndakaramba ndakavatarisa vachifamba rwendo rwavo apo ndakaona vachipinda pamwe pamba. Ndipo pandakaona pamba apa pachibuda mumwe murume aiva nezvichena. Vakambokurukura kwakanguva apo ndakazotora tsono.

CHAPTER 32

LINDIWE

Ndakanga ndagadzirira kubaya munhu wangu apo ndaitarisa kuti ndobaya papi. Ndakanga ndatoongorora ndikaona kuti muchinda wenguwo chena uyu akanga anenyaya uye aizoiti bvuu kunaambuya. Ndaiziva kuti akangodaro ndiye aizoita zambuko raKudzi.

Ndakanyatsoona kuti ndikamubaya nechepamoyo ndinenge ndapedza basa. Ndakabva ndatomubaya pagirazi iroro apo ndakaona achidonha pasi aripakati pekutsanangura. Ndakaramba ndakatarisa pagirazi riya ndichiona ambuya nemuzukuru vabata muromo munhu angoti zii akarara pasi.

Apa ndakanga ndapedza basa manje apo ndakazozviudza kuti vakada kuonesesambuya iwawa mdinovaendesa zvekare. Kuendesa munhu kwaisambonditorera nguva nekuti simba racho ndakanga ndinaro. Ndichipedza basa rangu ndakadzokera panze apo ndakaona baba wemwana wavakuyanika mbatya.

Ndakabva ndatooneka ndichiti ndirikuda kunoona Maidei pane zvandaida kumba kwake. Nenguva isipi ndakanga ndatosvika pamba paMaidei. Ndakasvika nekugogodza pamusuwo pake semunhu akanga arimumba. Ndakagogodza katatu asati apindura apo akazodaidzira kuti ndipinde. Ndakabva ndapinda apo ndakaona akagara achinakidzwa hake nedrama raiitwa pachivhiti vhiti.

"Tipei tinzwe kwakamira sei asahwira. Ndoziva kuti kwaunouya kudai kunenge kunenyaya." Yakanga yatova tsika yangu kuti kana ndichienda kwaMaidei ndinenge ndinenyaya.

"Ko dzingagoshaikwa here nyaya nhai asahwira. Rwendo rwuno nyaya dzedu ndedzekungokurira vavengi chete." Apa ndaitaura ndatogara pasi pedyo nepaiva naMaidei. Iye akanga achiteya nzeve manje ambosiya zvekuona drama rake.

"Nhai Lindiwe nyatsotaura zvinonzwika, asi pane mumwe wavadonhedza zvekare zuva ranhasi." Akabyunza Maidei avakuda kunzwisisa zvakawanda.

"Ko ndinotadza nei hangu ini ndakapihwa simba racho. Mbuya vaKudzi vafonaka pafoni yemwana wavo vachida kuziva kuti achiri kuuya here kuzoona mwana vachibva vaudzwa kuti ndarambidzwa. Iyewo pachokwadi ndamurambidza saka vazoti wavakumbiedzawo kufamba kune vanobatsira." Ndakambokosora mbijana apo ndaida kuzoenderera mberi nekutaura.

"Vataura zvakawanda pamusoro pangu asi handina kuita hangu basa nazvo. Pazondivhundutsa ndepavati wavakufambira nyaya dzacho kune vanobatsira saka ndanga ndotya kufumurwa ndichibva ndananga pagirazi rangu." Ndakambotura mafemo apo Maidei akandibyunza kuti ndazoitasei.

"Ndavaronda kwavanga vachienda apo ndaona vachisvika pamba pemumwe muporofita saka ndamubaya netsono aigona kuzovhura zvakawanda. Kutaura kuno ndapedzisira kutarisa pagirazi akati zii akarara pasi." Maidei akamboshamisika achinzwa mashoko andaitaura aya.

"Saka vatova mambo wemumusha kaiwe nekuti wese anoda kusimudza musoro hapana zvaachakwanisa kukuita. Anenge anetsa unenge uchidonhedza muvhu, simba rakadaro ndoridawo ini." Ndakamboseka hangu mashoko aitaurwa naMaidei panguva iyi. Aigoshaya simba rakadaro sei ari iye akandiratidza kwasekuru Kashiri.

"Iwe Maidei usada kundinzwa, ndiwe ungarishaya here simba rekuita zvaunoda uri iwe vakandiratidza kumuzinda kwasekuru. Ndiweka unenge uchitoziva mishonga yakakura kudarika yangu." Takamboseka tese apo akazondiyeuchidza chimwe chinhu. Sekuru vakanga vakandipa mhiko yekuti ndigopota ndichiuya kuzosimbisa mishonga.

Pachokwadiwo yakanga iringuva yakuti nditombovashanyira pamazuva aya nekuti zvakanga zvambondifambira. Apa ndaitoda zvekubva navo makuseni rigodoka tozorarira husiku hwese. Ndakanga ndisisanyare kunozvipa kwavari nekuti ndaiziva kuti vakausimbisa apa zvinenge zvapetwa.

Takambokurukura kwechinguva pamwe nekuronga zuva rataizoenda kwasekuru Kashiri. Tapedza hurukuro ndakabva ndaoneka zvangu ndichidzokera kumba kwangu.

MBUYA VAKUDZI

Vazukuru wangu Kudzi naShamiso ndaivada zvakapfuurikidza zvekuti ndaisada kuvashaya pedyo neni. Kuuya kwavakaita vachisiiwa kumusha moyo wangu vakafara nekuti ndaiva nechishuvo chekugaravo nawo.

Dambudziko rakazotanga musi vakatanga Kudzi kupenga. Chokwadi mwana kungotanga kupenga zvisinganzwisisike. Baba vacho vanenge vakadyiswa chete chokwadi kurambidzwa kuuya kuzoona mwana vako ari padambudziko nemutorwa manje ndakamuudza pafoni ipapo kana ane nzeva dzekunzwa akanzwa. Ndakazobuda hangu ndoenda kwamadzibaba Gadhirosi kunotsvaga rubatsiro.

CHAPTER 33

MBUYA VAKUDZI

Madzibaba Gadhirosi akanga ari muporofita wemandiriri aizivikanwa nzvimbo dzakapoteredza. Ngoni dzaiti dzamubata aikunhongera kana tsono yakavigwa pasi pemvura. Matambudziko mazhinji aibata vanhu munzvimbo dzakapoteredza aisvika achiperera panamadzibaba Gadhirosi.

Ndaiva neshungu dzekuti baba vaKudzi vange varipowo kuitira mangwana vaizozivawo chakanga chapengesa mwana wavo. Manje nemudzimai wacho anenge munin'ina wasatani zvakaramba. Ndakagara mdazviona kare kuti mukadzi uya raitova dombo chairo kuri kuoma kwemoyo.

Kunyangwe zvazvo zvakadaro ndakanga ndisisina kana basa navo wese nyangwe vakasauya kumusha kwehupenyu hwese. Vakanga vatozviratidza kuti pakati pedu patova nerusvingo vamwe nevamwe wavakuzviitira zvinhu zvavo wega.

Chandakanga ndavakuda kubatsira mwana kuti asaramba achingodzungaira musango. Ndaishuvawo kuti agova nehupenyu hunoyemurika manje vakaipa akanga amusarudzira hupenyu hwemusango.

Ndakabuda naShamiso apo aindiperekedza kwamadzibaba. Akanga achiri mwana mudiki nekure asi ndaingofara nekuva kwake paizotaurwa tsanangudzo namadzibaba. Mumwe musi anogona kunge airondwawo saka nyaya dzacho dzaibva dzangoburitswa ipapo.

Takafamba kwechinhambwe apo takabva tasvika pamba pamadzibaba. Musi uyu takaona pasina kuzara zvapanosiita kuda zvakanga zvakamirira isu musi uyu. Pakanga pasina kana munhu madzibaba vakanga vakatozvigarirawo mumba mavo. Ndakagogodza musuwo wavo apo ndakanzwa tsoka dzaifamba kuuya kuzouvhura.

Ndipo pandakona madzibaba Gadhirosi apo vakanga vavhura musuwo wemba yavo. Havana zvavakataura zvizhinji kunze kwekutiudza kuti tinogara pakasowe kavanoitira basa ravo kaiva pamba apa. Handina kupikisana nawo ndakangonanga kwakanga kwarehwa ndakatungamidzana naShamiso wangu.

Nenguva isipi ndakaona madzibaba vachiuya vakapfeka nguwo dzavo chena. Ndaiziva kuti kana vashonga nguwo dzavo idzi vanenge vatotanga basa uye vanenge vasisadzore tsvimbo. Vakatanga kuimba vhesi ravo iro raivapinza pamweya rainzi Gabhorona tipe mwenje. Vakatanga kudzana dzana pasi ndikaziva kuti pane zvakanga zvavakuitika mavari.

Vakaramba vachiimba apo inzwi ravo rakanga ravakuita kunge parikuimba vanhu vakawanda. Ndakazonzwa wavakuimba rimwe vhesi rekuti Joshua igamba rehondo ndichibva ndaziva kuti basa ratotanga. Aichiona chete muroyi iyeye nekuti murume uyu aibata basa sezvaakatumwa. Akazouya pedyo neni apo akanga avakuda kutaura nyaya yake.

"Amai ndineurombo nedambudziko rakuwirai asi ndinoti musarase tariro nekuti vatinovimba naye mukuru. Ndinoda kuti musazvidye moyo nekuti pamasvika pachipatara uye hapana anobuda pachipatara asina kupora." Madzibaba vakambonyarara apo vaiita kunge vane zvavaiteerera. Vakazoenderera mberi nenyaya yavo.

"Ndirikuona murikuzvidya moyo nemwanakomama atetereka nesango nekuda kwamuvengi asi kudenga kwanditi kundiso iripo asi panenyaya." Vakambomira kutaura apo ndakanzwa wavakuimba rimwe vhesi. Iyi yaiva tsika yamadzibaba Gadhirosi kuti kana vachiporofita vaiimba padiki padiki.

"Amai ndine kuoneswa kwandirikuitwa ndichinzi muvengi haasi vekure asi atori mumusha. Muvengi uyu ane chinangwa chaainacho pahupenyu hwemhuri yenyu iripano nhasi uno kureva kuti yakatarisana nekuparadzwa." Ndakaramba ndakateerera madzibaba vachitaura nhau yavo.

"Endererai mberi zvenyu madzibaba, nyaya yamurikutaura ndirikuinzwisisa shungu dzangu ndedzekuziva kuti munhu wacho ndiani." Pachokwadi ndakanga ndatononokerwa nekuziva mhandu yangu uye munhu iyeye aizochiona. Madzibaba vakaenderera mberi nekutaura.

"Nguva yakwana amai asi ndoda mumbodzikamisa hana amai. Munhu uyu haasi wekure saka ndinoda kuti hasha dzimboita shoma." Ndakabva ndamivimbisa kuti ndaizodzikama nyangwe akava ani zvake. Ndakanga ndatova mechidokwa dokwa chekuda kuziva kuti muroyi wepedyo iyeye ndiani. Akabva aenderera mberi nenhau yake apo ndakanga ndateya nzeve dzekunze zvese nedzemukati kuti ndinyatsonzwa kuti mhandu iyi ndiani.

"Amai ndine mukadzi wandirikuoneswa asina kumira mushe...." haana kuzopedza kutaura mashoko aya apa akabva awira pasi. Zvakanga zvatoipa panguva diki iyoyi. Ko chii chakanga chavakutora nzvimbo zvekare. Munhu anga achitaura zvakanaka ongodonha abva atoti zii akadaro.

Ndakapererwa zvakushaya kuziva kuti ndoitasei nezvandakanga ndatarisana nazvo. Munhu wacho anenge akanga ane simba nekuti asati ataurwa akanga atodonhedza munhu. Ndakazonoshevedza mudzimai vake kuti tiite maonerapamwe.

CHAPTER 34

MBUYA VAKUDZI

Mudzimai vake akashayawo kana remuromo achiona murume vaka akangorara muvhu asingakwanisa kana kuvhura maziso. Akairidza mhere mwana wemunhu anenge aitoona rufu rwemurume vake ipapo. Izvi zvakaita kuti mamwe machinda emumusha asvike pedyo. Pakazosungwa ngoro nemadhongi apo madzibaba vatakurwa kuenda kuchipatara.

Chakava chishamiso mudunhu rese nekuti madzibaba vakanga vasati vamborwisa hondo inovakurira. Kaitova kekutanga kubva vachitanga basa raMwari kureva kuti muvengu uyu aitova nesimba rakawanda uye aitogara achitironda.

Manje zvaizobudirira here zvekuti Kudzi adzoke kana kuti akanga avakutounda nesango zvachose.
Ndakazobvawo pamba apa ndakasuva nekuda kwezvakanga zvaitika. Hapana chinhu chinorwadza sekuti unenge uchida kunzwa chinhu pachinenge chavakuda kutaurwa vakachimirira munhu wacho abva angoita zvekuwira muvhu zvatisinganzwisise.
Ndakazofamba zvishoma nezvishoma ndakananga kumba naShamiso wangu.

LINDIWE

Mazuva akafamba ikawa mwedzi ndichingorarama hangu zvandinoda. Rudo rwakaramba rwuchiwedzera pakati pangu naJoel vangu sezvo pakanga pazouya kamwe kamwana kamukomana. Takabva takapa zita rekuti Kupakwashe sechipo chakanga chabva kunashe. Mwedzi yakaramba ichifamba tikasvika pakupinda mugore.

Kumusha takanga tisisatsikeko uye ndini ndaitopa sarudzo yezvekuita mumba. Baba wekwangu vaisaita chinhu vasina kundisuma ndini ndaitova nematomu ababa. Kwasekuru Kashiri ndakanga ndopota ndichienda mwedzi wega wega ndichinosimbisa mushonga wangu. Apa ndipo pandakanga ndoda njere dzaShamiso manje paakanga ambodadisa pakanga pakwana.

Njere idzi ndaimboda kudzipa Kuda asi ndakazofunga kudzipa Kupakwashe nyangwe zvazvo akanga achiri kasvava. Shamiso ndaisada kumunyanyira ndaida kungomupa denda remusoro chete. Ndakamutarisa pagirazi mumwe musi apo akanga achibva kuchikoro. Aitofamba neshamwari dzake vachitaura nyaya dzavo vachiseka. Ndipo pandakati rega ndishandise mukana uyu ndoziva kuti basa ndinenge ndapedza pavana awa.

Ndaizongoziva kuti chasara kuisirwa imba muzita remwana wangu nemimwe midziyo yogovaniswa vana wangu wese neni wacho. Ndakabaya girazi riya apo ndakananga paiva nemusoro chaipo apo akabva aubata. Ndakaziva kuti zvaita ndafamba chimwe chikamu. Ndakambotsvaga kwaiva naKudzi uyo akabva angobuda pagirazi riya.

Ndakamuona ari munerimwe sango akagara hake apo bvudzi rakanga roita sengundu. Chokwadi mwanakomana akanga achipenga. Ndakazorangarira kuti ndakanga ndisati ndapedza naShamiso apo ndakatora hari yangu ndichideketera.

"Iwe Shamiso kubva nhasi uchava dofo. Njere dzaka ndatora ndapa mwana wangu hauchina chako. Ndakusiira denda remusoro iro rauchatakura kwehupenyu hwese. Ndizvo zvazvinoita haungawaneka zvese vangu mwana asina." Ndakapedza kutaura mashoko aya ndichibva ndadzosera hari yangu panzvimbo payo.

Ndakanga ndavakuziva kuti zvabudirira sezvakamboitika pakutanga. Mwana wangu Kuda akanga atova shasha kubva pandakatorera Kudzi pfungwa dzake. Ndizvo zvaizotokura zvakaita Kupakwashe uye ndaizodada naye mazuva ese ehupenyu hwangu.

SHAMISO

Hongu kuchikoro ndaienda hangu asi ndakanga ndisina kusununguka mumoyo mangu. Hapana pandaizosununguka ndichienda kuchikoro kana ndakagara pamba ndichiziva kuti pane weropa rangu ari musango. Ndaigara ndakasuwa ndaitoswkawo kana ndataurirwa zvinosetsa.

Ambuya vakamboda kufambira nyaya dzaKudzi asi zvakazosvika pakuunza hurwere panemumwe muporofita akanga azvipira kubata basa rekuponesa Kudzi. Ndakabvuma zveshuva kuti hondo dzemweya dziriko nekuti zvandakaona zvaikunda ngoma kurira. Chakandifadza hacho ndechekuti madzibaba vakazomuka uye vaitoti vachine basa hombe panaKudzi neni asi vaida kutanga vambosimba.

Mumwe musi ndakanga ndichibva hangu kuchikoro ndine shamwari dzangu Martha naEunice. Ndidzo dzaiva shamwari dzangu dzepamoyo uye ndidzo dzaindinyararidza panguva dzekuchema.

Taitokurukura hedu nyaya dzinimboitika kuchikoro apo taiseka zvekuti ndaimbokanganwa nhamo. Tiri pakufamba kudaro ndakazongonzwa musoro vangu kuita kunge ndatemwa nedombo. Ndakacheuka kuti ndione akanga arikanda asi handina chandakaona.

CHAPTER 35 SHAMISO

Ndakaramba ndakatarisa ndichiti pane vandichaona asi kwakanga kusina. Ndipo pandakati rega nditarise dombo racho rakanga randitema asi ndakarishaya. Martha naEunice vakanga vongonditarisa vachishaya kuti chii chirikutora nzvimbo.

Ndipo pandakateerera muviri vangu ndichibva ndanzwa musoro kurwadza. Ndainzwa uchiita kunge urikuda kudzurwa panzvimbo yavo apo ndakanga ndisisaone zvirikure.

"Ko chii chirikuitika Shamiso, tanguri takutarisa hasi hatisi kunzwisisa zvirikuitika pauri." Akabvunza Martha apo Eunice akabva atsinhirawo. Pakanga pasina chekuwanza nekuti dzaiva shamwari dzangu dzepamoyo.

"Musoro wangu vasikana. Pane chinhu chanditema asi handina kuona kuti chii uye kuti chapotserwa nani. Musoro vangu vabva vatanga kurwadza kutaura kuno handisi kunyatsoona uye simba ririkupera." Shamwari dzangu dzakatarisana dzichishamisika nekuti zvandaitsanangura zvaiva nemunhu pasi.

Vakatendeukawo vachifunga kuti vachawana dombo asi hapana chavakaona. Vakambofunga kuti ndirikuita zvekuseka zvandinosimboita asi ndaitova pachokwadi. Ndakazongonzwa simba rese risisipo uya handina kuzoziva kuti chii chakaitika.

Chandinorangarira ndechekuti ndakazongoona ndiri kuneimwe nzvimbo yandisingazive. Pandaifamba paisatsikika paiva neminzwa yemipangara chaiyo. Ndaingonzwa inzwi raiti shinga uchasvika chete minzwa yavakutopera. Ndakangozviudza hangu kuti rega ndibaiwe asi zvanga zvisina kujairika. Zuva raipisavapo ndakambotsvaga mvura yekunwa ndikaishaya.

Maitova mugwenga chaimo musingawaniki mvura yekunwa. Ndipo pandakaona Kudzi achifambawo achidzungaira mugwenga imomo anenge aisaziva kwaanoda kuenda. Ndipo pandakati rega ndisvike paari nditaure naye.

"Ko nhai mukoma Kudzi, murikuitei kuno." Ndakabvunza ndine chinangwa chekuda kuziva kuti sei achidzungaira musango imomo. Akamboeredza misodzi panguva iyoyo.

"Ndinoda kufamba kuenda kunenzimbo irikumberi uko ine huswa hwakasvibira asi nzira handichaiona."
Akapindura Kudzi ane misodzi pamatama.

"Saka uchaitasei manje ndanga ndichida hangu kufamba newe zvimwe ndinoiwanawo pairi nzira yacho." Akazunguza musoro vake irinzira yekuramba apo akabva ati nditungamire. Ndisati ndafamba kubva ipapo ndipo pandakanzwa mutsindo wemunhu aifamba kumashure kwangu.

Ndakaona mumwe murume akanga akura zvekuti aigona kupeta baba kaviri. Ndakamutarisa chiso chake ndichibva ndaona vasina kusiyana nababa. Ko akanga achidei kwatakanga tiri? Mubvunzo wandakangozvibvunzawo apo murume uya akanga azomira nesu.

"Musatya zvenyu vana vangu, inguva chete isati yakwana asi kumberi kune chiedza. Mungatsika minzwa nhasi uno asi pamberi apo muchatsika goridhe. Ndingatadza kukutungamirai panguva ino asi pamberi apo ndichakuratidzai nzira. Parizvino ndichiri mubishi kugadzirisa matare acho kuti tione kufamba." Ndakateerera mashoko aya apo ndakadzamirwa ndikatadza kuburitsa kana izwi kutaura.

"Chifambai mushe vana vangu, mugopota muchidongorerawo madzibaba Gadhirosi kumba kwavo. Vane chekuita pahupenyu hwenyu mufunge asi inguva chete." Murume uya akabva angonyangarika. Ndakamboramba ndakamira ndichidzeya mashoko andakanga ndichangobva kunzwa.

Ndakazobata Kudzi apo takatanga kufamba tichitsika minzwa iya. Yaibaya minzwa iyi asi chaingodiwa kusvika kwatinoenda. Ndakaona Kudzi asara akati handingambofama rwendo rwakadai ndipo pandakabva ndapepuka apo ndakaona kuti ndairota. Ndakatarisa nzvimbo yandakanga ndiri ndikashaya kuti inoitwa nezvei. Ndakaramba ndichitarisa zvinhu zvakandikomberedza ndichida kuti ndisangane nechinondipa mhinduro yekuti ndirikupi.

Ndakazokwanisa kuona chitambo chaibva paruoko rwangu chichienda mudenga maiva nekamwe kanenge kagubhu kane mvura. Zvinhu izvi ndakambozviona paTV mumadrama anomboitwa apo ndakabva ndaziva kuti zvinowanikwa muchipatara. Chokwadi ndimo mandakanga nditori

Chandakanga ndozvibvunza ndechekuti ndakauya sei muchipatara macho. Ndakanga ndichine mibvunzo yakawanda mupfungwa dzangu yaida mhinduro kusanganosira nezvandakanga ndarota. Zvisinei musuwo vakavhurwa apo ndakaona mukadzi aiva nezvichena achiuya kwandiri. Akasekerera akanditarisa ndikashaya kuti aionei.

"Makorokoto vamuka zvekare mwanasikana, vanga vakarara paurere ipapo nguva refu tanga tisisina tarisiro." Ndakavhunduka ndichinzwa mukadzi uyu achitaura mashoko aya.

CHAPTER 36 SHAMISO

"Ko ndakambonyatsouya sei muno?

Chimbonditsananguriraiwoka nekuti hapana kana chandiri kunzwisisa ndiri murima." Mukadzi uya akangosekerera achibva anditi zorora. Panguva iyoyo akabva atobuda achindisiya ndega. Ndakashaya kuti zvaainditi zorora obva aenda ndiko kutondipindura kwacho here.

Ndipo pandakatanga kurangarira zvese zvakaitika ndichibva kuchikoro neshamwari dzangu Martha naEunice. Ndipo pandakanzwa kuti musoro wangu vakanga usati vapora. Vakanga uchitoita kunge urikuda kubva panzvimbo pavo zvekuti ndakatomboridza mhere nekurwadziwa.

Ndakaona mukadzi uya wezvichena adzoka achimhanya apo akasvika achibvunza chaitora nzvimbo. Ndakabva ndamuudza kuti musoro wangu apo akabva atora rimwe jekiseni randisina kuziva kuti nderei achindibaya naro. Akadzokorodza zvekare kundiudza kuti ndizorore achibva aenda hake. Ndakanzwa marwadzo aye achienda mbichana mbichana apo asina kupera zvavo ese.

Kunyangwe zvakadaro hazvo ndangariro dzangu hadzina kupera. Ndakanga ndichiri kuda kuziva kuti chii chakaitika kubva paya pandakapedzisira kunge ndine shamwari dzangu. Ndichiri kurangarira kuti paya ndakanga ndatemwa ndikashaya dombo racho asi ndakazopera simba. Zvakazoitika mberi ndozvandisingazivi kunze kwekusangana kwandakazoita naKudzi nemurume uya kunyika yezviroto.

Idzo hope idzi dzakanga dzichitondikanganisawo ndaive mwana mudiki asi apa ndaitoda mhinduro. Ndaizomirira kuuya kwaambuya pamwe ndivo vaigona kundipindura. Mukadzi wezvichena uya ndakanga ndatomuona kuti haandiudze aingokoshesa kuzorora chete asingatarise kuti moyo wangu vakatorembera kuri kuda kunzwa zvakandiunza muno.

Ndakazoburitswa mundangariro nemusuwo vakavhurwa apo ndakasimudza musoro kuti ndione aipinda. Ndakashaya kuti ndonyatsoitasei nemufaro wandakawa navo ndichiona ambuya wangu vachipinda. Muviri wavo vakanga vadzikira zvandaiona ini mwana mudiki dzinenge pfungwa nendangariro zvaivadya.

Vakasvikomira pandakanga ndakarara apo vakatora kanguva vakanditarisa. Zvinenge zvaitovashamisa kuti ndadzoka zvekare panyika ndiri mupenyu. Ndakazoona misodzi ichidonga kubva mumazisi avo. "Chokwadi Mwari vakanaka muzukuru wangu, mwedzi wese ndichifamba kuuya kuno netsoka ndichiona usingatsukunyuki. Nhasi ndinofara nekuti ndanzwikwa kuchema kwangu." Ndakavhunduka ndikaita kunge ndichadonha pandakanga ndakarara. Mwedzi vakanga vakawandisa ndisingaone kubuda nekunyura kwezuva. Ndakaerekana ndaya kueredzawo misodzi.

"Saka ndakauya sei muno nhai ambuya, ndimi mungatondiudza nekuti mumwe mukadzi ambouya muno akwpfeka zvichena aramba kundiudza angonditi zorora." Gogo vakambonyarara kwechinguva apo vakazotanga kutaura.

Ndipo pandakaziva kuti ndakasvika kumba ndakabatiranwa neshamwari dzangu Martha naEunice. Saka vanhu vairevesaka kuti munhu unogona kungodonha munzira zvehupenyu zvikarova. Dai pakanga pasina shamwari dzangu idzi ndingadai ndiri mupenyu here kana kuti ndaingofira munzira. Ndaizovatenda hangu nerimwe gore handizive kuti ndaizovatenda nei. Ndakangoita kamunamato kekuti tizorarama tese kwenguva refu tisazosiyana.

Mukadzi wezvichena uya akazopinda apo akabva atanga kukurukura naambuya. Ndakamboda kuteerera zvavaitaura asi hapana chandakanzwa. Ndakazongozviudza kuti ndezvevanhu vakuru rega ndisiyane nazvo.

MBUYA VAKUDZI

Chokwadi chaicho vana vakauya vakatakura Shamiso handizive kuti ndinovatenda nei. Nezera ravo zvakanga zvisiri nyore kutakura munhu kubva kwavakanga vachitaura kusvika pamba. Idzi dzaitova mhepo chete nekuti vana awa vakadiudza kuti pane chakatema Shamiso asi haana chaakaona.

Ndinodavira kuti chakarova Shamiso ndicho zvekare chakarova Kudzi manje nerimwe zuva zvaizobuda pachena. Vakuru vakataura wani vakati rina manyanga hariputirwe uye chisingaperi chinoshura. Ndakanga ndakangomirira kuzobvuma kuti tsumo idzi ndedzenhema padzaizoona chokwadi charamba kubuda uye ndakudikana pakuti hutano hwevana hudzoke.

Ndakakumbira ngoro kunemumwe wavavakidzani wedu sezvo yepamba pangu yakanga yakafa. Ndakabva ndanzi ndaizoperekedzwa nemwana wepo kuenda kuchipatara nekuti ndega zvaisaita. Akasvika akapihwa mubhedha apo ndaipota ndichienda kunomuona.

Tariro yakanga yapera apo ndakaita mwedzi wese ndichinoona mwana asingamuke. Mumwe musi ndakasvika kuchipatara ndikaita kunge ndakanga ndiri kurota.

CHAPTER 37

MBUYA VAKUDZI

Ndakaona Shamiso akamuka achiratidza kuti akanga ava nenguva. Ndakazvitswinya ndichifunga kuti ndiri kurota asi ndakanga ndakatomuka. Ndipo pakadzoka ndangariro ndava kufunga nguva yese yandakafamba kuuya kuchipatara uku pasina chaichinja.

Baba wavo vakanga vachingodya nyika rutivi nemukadzi wavo kuHarare vana vachitambura nehurwere. Ndipo pandaidemba muroora wangu akamedzwa nenyika uyu aiva nemoyo vakanaka. Kungoti hazvaigona kumanikidza nguva dai aivepo zvimwe dai paisava nezvese izvi.

Muviri vangu vakanga vapera makumbo orwadza nekukwidza ndichidzika mazuva ese. Ndakanga ndaneta zvekuti ndakanga ndava pedyo nekuudza samatenga kuti ndazvitadza ini. Zvakanga zvandiomera asi kungoti samatenga vanenge vachiona zvavo.

Vanoparidza vanobva vataura kuti paunogumirwa ndipo paunotangira uye ndakazoona chiri chokwadi. Ndakava nemufaro mumoyo mangu ndichiona mwanasikana akavhura mazino chiri chiratidzo chekuti hupenyu hwadzoka.

Akandibvunza kuti akanga auya sei muchipatara apo ndakabva ndamutsanangurira zvese. Ndakazoona mukoti akanga achirapa Shamiso apinda achibva anditora kuti timbotaura tiri padivi. Airatidza kuti ane nyaya yakakosha yaanoda kutaura. Akazoshamisa muromo vake kuti ataure.

"Ambuya ndinokutendai nerudo rwamakaratidza kumuzukuru muchimushanyira kusvika nhasi azomutswawo kudzoka kuupenyu. Ndinongoti makorokoto mwana amuka kunyangwe zvazvo asingabudi nhasi moyo unombosununguka." Mukoti uya akataura nechiso chaisekerera. Ndakabva ndati rega ndipindurewo semunhu akanga asununguka.

"Mwana wangu ndinototenda iwe vakanga uchishanda usingazorore kuraramisa muzukuru wangu uyu, unoti dai aizorasikirwa nehupenyu ndaifarira kupi. Mwari vagokuropafadza vakupe zvaunoshivira muupenyu hwako nekuti vashoma vanemoyo vakanaka sevako." Ndakataura ndichitenda mukoti uya akabva achinja chiso chake izvo zvairatidza kuti pane imwe nyaya yakakosha yakanga yavakuda kutaurwa.

"Asi ndinehurombo nechinhu chimwechete pamwanasikana wenyu uyu, Patakaongorora takaona kuti denda remusoro riripo asi takatadza kuona kuti rakakonzerwa nei. Akataura mukoti uyu apo akambozorara achida kuzoenderera mberi zvekare.

"Takaedza nepese patinogona kutsvaga chikonzero asi michina yedu yaiti hapana dambudziko.

Tichamboramba tichiedza asi ndinoda kukurairai chinhu chimwechete kana muchinditendera." Ndaitoda kunzwa zvaaida kutaura zvacho saka ndakati rega ndimuudze kuti aenderere mberi.

"Vakasununguka kutaura hako mwana wangu ndakateerera. Ko ndimika madhokotera acho tinofanirwa kutoteerera imi kuti zvifambe." Ndakataura apo mukoti uya akabva aenderera mberi nenyaya yake.

"Pakuongorora kwataiita chirwere ichi tichishaya mhinduro pane mumwe muono vandakazoita. Ini ndinoenda kukereke ndosaka ndakasara nemuono iwoyo. Dai maikwanisa kuwana vanobatsira maporofita imwe nguva angapona nekuti anogona kuita dambudziko rekuzoramba achipera simba achidonha zvichikonzerwa nedenda irori. Kungotaurawo zvangu amai nekuti ndinoziva mhepo dzinosairirwa matinofamba umu uye ndinodaira kuti ndizvo zakaitika apa sezvo zvainzi akaita kunge atemwa." Apa mukoti akanga ataura chokwadi chisingaputse hukama.

"Ipapo vataura idi mwanangu, ndichatomboona mumwe madzibaba wemumusha medu asi akanga achidzimbikana mazuva apfuura ayo." Ndakazomuvimbisa kuti nyangwe ndikashaya iyeye ndaizotsvaga mumwe anozvikwanisa. Takazopedza hurukuro yedu apo takabva taonekana mukoti achibuda matakanga tiri. Iniwo ndakambosara ndichiona Shami apo ndakamuvimbisa kuti ndaizomutora mumazuva mashoma aitevera. Ndakazobudawo ndavakunanga kumba uko kwaiva chinhambwe chemakiromita aiverengeka.

Munhu akanga ari mumusoro mangu ndimadzibaba Gadhirosi asi ndaitya kukuvadzisa munhu waMwari kechipiri. Manje ndiani mumwe wandaizowana kunze kwake iye vandaivimba naye. Ndakazoona ndavakutosvika pachiteshi chemusoro wenzou ndikaziva kuti ndakanga ndafamba rwendo rwurefu. Pakanga pangosara chinhambwe chakati kuti apo ndaizosvika pamba pangu.

Mazuva akafamba ndakangomirira kubuda kwaShamiso muchipatara. Kudziwo ndaingonzwa vamwe vachiti varikusangana naye mumasango epedyo imomo asi akanga ava kutyisa kutarisa nechimiro chaakanga ava nacho.

Ndipo pandaiti ndikaenda ndichida kumutora ndaimushaya. Ndaishaya kuti chii chaiitika nekuti imwe nguva ndaitoudzwa kunzi ari nzvimbo iri pedyo chaipo nemisha asi nyangwe ndiende panenge pachitaurwa ndichimhanya ndaisamuwana. Ndakazongosvika pakuzviudza kuti Mwari vachaita kuda kwavo kana nguva yacho yakwana.

CHAPTER 38

LINDIWE

Mazuva akafamba akava makore ndichingorarama hangu samambokadzi. Ndakanga ndisina chinondidya moyo sezvo ndaiva nesimba rekuita zvese zvandinoda mumba umu. Vana vangu vakanga vachikurawo apo Kuda akanga atova gwaro rechishanu. Kumusha vakanga vasisazive tsoka yangu sezvo ndakaguma kutsikako ndichinosiya vana.

Kana zviya zvaimboita baba vaKudzi zvekutumira chikafu nezvinodiwavo naambuya kumusha ndakanga ndatozvimisa. Murume rudzii anongoramba achiendesa zvinhu kwaamai vake yakanga yavanguva yekuendesawo zvakapetwa kuhama dzangu kutsiva paaimbochengeta hama ndisati ndapinda mumusha mangu.

Hapana aindimisa vaitoita zvekundikumbira kuti nzwirawo amai vari kumusha tsitsi. Kwasekuru ndaipota ndichienda kunosimbisa mushonga ndichidzoka apa ndakanga ndavakuzviita pamasvondo maviri ega ega. Murume weshamwari yangu Maidei aingouyawo kamwwchete pamwedzi saka tsoro dzangu zhinji dzaibudirira ndina Maidei. Nyaya yakanga yasara imwechete uye ndakanga ndavapedyo kuigadzirisa. Ndaingoverengera asi makore akanga afamba. Imba yakanga yavakufanirwa kuiswa muzita remwana wangu neimwe midziyo ndozivawo kuti yava muzita rangu. Chimwezve ndechekuti ndakanga ndodawo mota yangu yekufambisa kwete kungonamirana nemota yaMaidei pese.

Kana baba wekwangu vaizotadza kutenga mota ndaizotora yavo kuti vangware. Ndivo vaizofamba netsoka kuenda kubasa ini ndofamba ndakagara. Mumwe musi baba wemwana vakasvika ndichangorara vachibva kubasa kwavo. Vakadziisa chikafu chavo wega sezvavaisiita vachibva vadya.

Vakazouya kuti varare apo ndakabva ndaona uri iwo mukana wekutaura nyaya yangu. Mumwe misi ndaigona kuzozvidemba ndava kumarinda nemakore ese andanga ndagarisana nemurume uyu ndisingamuudze nyaya yangu.

"Ko nhai baba wemwana munombofungawo here nezvemhuri yenyu itsva iyi Kuda naKupa kuti kana mukanzi hamusisipo nhasi vanosara vachiitasei." Baba wevana vakaratidza kusanzwisisa zvandakanga ndichitaura. Vakabva vanditi ndinyatsotaura nyaya yangu zvakanaka apo ndakazotsanangura ndava nehasha. Murume rudzii anoda kuti ndirambe ndichidzokorodza chinhu chimwechete.

"Imi baba imi mundikwanire manzwa. Kana ndichitaura ndoda munhu anoteerera. Ndirikureva kuti papfuma yose iripano vana wangu vane mugove here uye ini ndinawowo here. Ndoda mujekese nekuti handingangogara pano ndichizoita mombe yemashanga nevana wangu musisipo." Ndakataura mashoko aya ndichibva ndamirira mhinduro.

"Ipapo usatye mudzimai wangu, pfuma yese iripano yagara inosarira iweka nevana wese. Izvo usatye kana ndikanzi handichipo nhasi midziyo iripo ndeyako zvese nevana." Pakunzi ndezvangu nevana paibatanidzwa vana Kudzi naShami zvinova zvandaisada.

"Manje baba wemwana mukataura nemuromo pasina kana gwaro rinotaura kudaro panonetsa. Munogona kungotaura zvekuda kundifadza asi ndichizosara ndichitambura ndega. Ko taidii kungoisa midziyo yacho mumazita evana neni zvogadzirwa magwaro aripamutemo ndoziva kuri murikurevesa chokwadi." Apa ndakanga ndavabata baba ava zvekuti vakambotora nguva vasina kutaura.

Vakazovimbisa kuti taizvigadzirisa patinowana mukana. Ndakabva ndavaudza kuti imba inyoreswe muzita rakuda apo ndakashama ndichinzwa kuti pakanga pakaiswa Kudzi naShamiso kare. Ndiwo mashura andakanga ndisingade kaaya ekuti munhu anopikasa zvandinenge ndichitaura.

Ndakaita kunge munhu abudirwa nemudzimu apo ndakanga ndazokwidza izwi kunge munhu ari kushevedzera musangano. Ndakapopota zvekuti kana makonzo aifamba mumba umu akatombomira achitya. Kana imbwa dzaihukura mudzimba dzevavakidzani dzakatombonyarara dzinenge dzakanga dzatopusiswa nenzwi rangu.

Ndakabva ndatoraira baba vakudzi kuti mazita avakanga vaisa paimba iyoyo aifanirwa kuzonobviswa nekukasika poiswa Kuda naKupa uye ndakanga ndisingade kupindurwa. Baba vaKudzi vakazongobvumawo sezvo vakanga vasina simba rekuramba vane nharo.

Ndakabva ndasimudza nyaya yekuti ndoda kutengerwa mota apo ndakanzi pakanga pasina mari inokwana. Manje ndakanga ndavakuzotora yekuendesa kubasa iyoyo vaizoona zvekuita kuti vasvike kubasa. Kana vaizodzoka usiku kubva kwavanomboenda vaizorara kubasa yomukira kukwira mabhazi kuseni.

Vakamboda kuita nharo nemota yavo vachiti ndiyo yairerutsa rwendo asi vairambira kumunhu asiriye manje. Neni vaitozoisiya chete. Ndakabva ndatora kii dzacho vaitoziva kuti chapinda mumaoko angu hachichatobuda. Takazorara hedu husiku uhwu mushure mekunge tapedza kurongera vana wedu.

CHAPTER 39

LINDIWE

Kuseni baba vaKudzi vakamuka vachigadzirira semazuva ese. Vachipedza ndipo pavakauya kwandiri wavakuda kii dzemota. Mashura chaiwo andakanga ndava kuitirwa nababa awa kuita kunge vasina kunzwa zvandakanga ndataura.

"Inga wani ndakataura kuti mota ndatora kusvika matenga imwe, handimbomuwanzirii baba wemwana motoenda kumabhazi muchenjera kunonoka muchinetsera kii dzemota." Ndakataura ndichitorambisisa nekii dzemota. Ndakazoona voenda apo vakanga vaona kuti hapana chekuramba tichiitisana nharo.

Ndakasara ndikaita basa rangu repamba semukadzi akabvawo kunevanhu. Ndichipedza ndakabva ndanoona asahwira wangu Maidei ndichimbomuudza nyaya yakanga ichangobva mukuitika.

Semazuva ese aitosimbisa kuti ndizvo zvakanaka kwete kuvharika meso ndiri panepfuma ndozoyeuka bako ndanaiwa. Zvechokwadi pana Maidei ndakanga ndakapihwa shamwari nasisi natete zvese ipapo. Ndiye akanga andivhura meso kubva pakutanga. Ndakazomuudza zvese zvandakanga ndaronga apo ndaizoda kuchinjisa mazita emba ndichiisa evana vangu. Maidei akabva atondisimbisa kuti zvese zvakanga zvakanaka uye ndaifanirwa kuzviita nekukasika.

Takazoonekana zuva ratocheka nyika apo ndakazoswera hangu ndakagara pamba. Mazuva akafamba rikava svondo zvinhu zvichingofamba zvakanaka. Mumwe musi baba vaKudzi vakamuka varipo pamba apo ndakati dzawira mutswanda. Ndiyo yakanga iringuva yacho yekugadzirisa zvinhu saka ndaifanirwa kurova simbi ichapisa.

Takagadzirira kuseni tichibva tatanga rwendo rwedu. Taizoenda kumahofisi ekanzuru yeguta reHarare kunova ndiko kwataizonoitirwa zvataida. Ndini ndakanga ndichityaira mota apo ndakanga ndakaisa baba wemwana padivi. Ndakanga ndisina rezinesi asi ndaiva nesimba rinokunda mapurisa kana ndaizosangana navo munzira.

Ndakaityaira mota apo ndakazoona tasvika pamapurisa anomira paLongcheng plaza tichangobva panoradzikwa varwi werusununguko. Mota yedu yakabva yamiswa apo ndakati rega nditevedzerewo mutemo sezvinoita vamwe. Mupurisa uya wekundimisa akabva angosvika nekubvunza rezinesi rangu rekutyaira.

Ndakangomutarisa kumeso achibva atanga kubvunda kunge akanga akatarisana kumeso nerovambira.
Ndakazoona ondikumbira ruregerero achibva andirega ndichienda. Ndaizoramba ndichivatenda chete sekuru Kashiri uye ndaivatenda nekuramba ndichienda ikoko ndichinorara navo. Ndivo vakanga vandiita mambokadzi apo ndakanga ndisina mukuru mberi kwangu.

Ndaitoda mutungamiri wenyika chaiye zvese nemauto ake. Zvisinei ndakazoona tavamudhorobha apo takabva tasvika pamahofisi ataida. Takasvika tichitambirwa neuno mukadzi munaku akanga akapfeka maboni boni emaziso. Takatsanangura zvataida kuitirwa apo asina kunonoka kutanga basa rake.

Akambotora nguva achibaya baya pamuchina pake apo akazondipa gwaro raida kunyorwa. Ndakabva ndaisa zvese zvaidiwa pagwaro riya apo ndakabva ndaisa mazita aKuda naKupa sevaridzi wemba. Ndichipedza kuita zvese zvaidiwa ndakabva ndadzosera gwaro riya.

Ndakanga ndamirira kuti ndinzwe chikamu chaizotevera. Ndipo pandakabva ndabvunzwa kuti vana vakange vane magwaro ekuberekwa here ayo avakanga vasina. Ko zvese izvozvo aizvidii zvekare akanga avakuda kukanganisa tsoro dzangu. Ndakabva ndaudza mukadzi uya kuti ndakanga ndisati ndavatoresa wese uye ndakanga ndiri munzira kufambira nyaya dzacho. Akabva ashamisa muromo vake kuti ataure.

"Hapana hapo chakaipa amai, nyaya iripano ndeyekuti ndavakumbochengeta gwaro ramanyora iri nekuti kana pasina magwaro anoratidza kuti vana vane mazita amatipa aya ndiwo vana wenyu hatikwanise kuenda kumberi." Mukadzi uyu aindishura chete ainyatsondiziva mushe here. Ndakamboda kumutuka asi ndakazozvidzora ndichibva ndasarudza kutaura naye zvakanaka

"Saka manje? Hamukwanise kungopedzisa here tozouya nemagwaro acho amunoda pandinovatoresa." Ndakataura ndakaisa musoro parutivi ndichinzwisa tsitsi.

"Zvinhu izvi zvine jeri mukati amai, imi chingouyai nezvandataura chete ndoita basa rangu. Kana tapfuura chidanho ichocho tinenge tisati tapedza zvekare. Vana vanozobvumirwa kuva varidzi wemba pavanotora zvitupa zvavo. Ndinovimba kuti mandinzwisisa."

Akataura mukadzi uya apo zvaitowedzera kundibaya pamoyo.

Ndakambomubvunza kuti kana baba vacho vaizoonekana nenyika vana vasati vatora zvitupa zvaizofamba sei. Haana kunonoka kupindura akabva atondiudza kuti mazita vakanga vanawo saka vaizotangira ipapo. Takazooneka tichibva tatangisa rwendo rwedu rwekudzoka kumba.

CHAPTER 40 LINDIWE

Munzira ndaingoridza ridza tsamwa semunhu akanga asina kubudirira kupedza basa. Kamukadzi kaye kanenge kaitova nemushonga sei kakandipfavisa kudaro. Ndingadai ndakapenga kana kudonhedza munhu asi zvese izvozvo zvakazouya mupfungwa ndavakuenda kumba.

Ndakazongozviudza kuti ndichatora magwaro ekuberekwa aidiwa acho ndozomirira kutorwa kwezvitupa asi ndichiziva kuti vana vangu wava pakanaka.

Ndakanga ndatogadzirira kuti tichipedza kuchinjisa mazita chete ndaibva ndatoendesa munhu. Ndaitofanirwa kuvatoresa magwaro acho nekukasika kuti baba Kudzi vagare vakasika kuonekana nenyika.

Ndakazosvika kumba apo ndakabva ndambozorodza nyama baba wevana vachibika. Mazuva akafamba apo ndakafambira nyaya dzemagwaro aidiwa. Izvi zvaisada nguva refu zvaingoda mari chete. Ndakagadzirisa zvese zvichibva zvabudirira sezvandakanga ndichida. Ndaizodzokera kukanzuru kuya ndava nezvakakwana zvaidiwa.

Apa ndakadzokera ndega sezvo zvaidiwa baba Kudzi zvakanga zvavako kare. Ndakabva ndatogadzirisa hurongwa hwese apo ndakabva ndasiya imba yava mumazita evana vangu. Mukadzi uya akabva andiudza kuti nyangwe ndakanga ndichida kuzochinja mazita aya zvaikwanisika kunze kusvika wava nezvitupa. Kana wava nezvitupa ndipo pavaizozvisarudzira pasina ini.

Ndakazobvako ndichifara kunge gudo ranhonga roro mubani. Ndakanyatsotenga iri huku chaiyo kupemberera zuva iri apo ndaizorirangarira mazuva ese. Ndakanga ndasarirwa nebasa rimwechete iro randaingodira maminitsi chete kuti ndiripedze.

MADZIBABA GADHIROSI

Nguva yakanga yareba mhuri yekwanaShamiso ichitambudzwa nerima. Zvinhu zvaimbosvika pakundibata kuti sei vanhu vari kutambudzwa ava ini muporofita ndiripo.

Pakanga patodarika makore matatu kubva paya pandakarwara ndiri pakati pekubatsira mhuri iyi. Pamabasa ose andaibata ndichibatsira vanhu ndakanga ndisati ndambosangana nehondo inondirova zvandakaitwa apa. Manje Mwari vandinonamata havakotsire ndaitozviziva kuti mumwe musi gava richadambura musungo.

Pandakaona makore afamba ndichingotyira nyama yangu ndakambobatikana. Chokwadi mwana wemumwe munhu arikudzungaira ari musango ini ndiripo. Hondo yobva yauya ichitambudza mumwe wacho nedenda remusoro ndakangotarira chete. Ndakaona zvisina chimiro chakanaka ndichibva ndazviudza kuti ndavakunobata basa randakatumwa panyika. Kana ndaizofa ndiri pakuribata Ishe vaizondirangarirawo naizvozvo.

Aiva masikati apo ndakatora nguwo dzangu dzekunamatisa. Handina kukanganwa tsvimbo yangu apo ndakabva ndaoneka mudzimai wangu ndichimuudza kuti ndavakuenda kumazivandadzoka. Mudzimai wangu aiziva kuti kana ndadai ndavakuenda kuhondo uye ndaisadzoka kana isina kupera.

Ndaigara kuGova uko kwaiva chinhambwe chisina kunyanyokura kusvika pamba pambuya vaShamiso. Ndakafamba ndichiimba mavhesi akasiyana siyana munzira apo ndaiitira kuti mauto agare ari pedyo.

Kazhinji ndaisangoimba mahara ndaitoziva kuti mauto edenga anenge akandikomba. Rwendo rwacho harwuna kumbondiitira rwurefu apo ndakaona ndavakuteremuka ndichibva pachiteshi chemusoro wenzou. Ndakateremuka paya apo ndakafamba chinhambwe chisina kukura. Ndakazoona ndasvika pamba paambuya waShamiso.

Handina kumbovapa nguva yekuti tikwazisane ngoni dzakanga dzatondibata kare. Ndakatanga kuimba zvekuti madziro akanga onzwika kudairira. Ndakazoona papinda vamwe madzimai maviri vandaibata navo ndikaziva kuti ndava nevatsigiri.

Ndakabva ndavaraira kuti vaimbe vhesi rekuti Joshua igamba rehondo. Mauto edenga akanga agadzirira kubata basa apo ndakabva ndanobata Shamiso musoro. Ndakaramba ndichiteura ndichikumbira mauto edenga kuti amuitire nyasha. Ndakazongonzwa inzwi raitaura munzeve dzangu richiti apa vapedza asi basa rasara ndorakakura.

Pachokwadi basa rakanga rasara ihombe uye raitoda kuti paimbwe mavhesi ehondo zvakasimba.
Ndakatanga kuoneswa zvese zvakanga zvakaitika kuti vana vatambure kudai. Ndipo pandakaziva kuti amai wavo vaivachengeta vari kumarinda vakanga vakavharirwa muchizarira. Mweya vasekuru vaKudzi vaimboedza kunovasunungura asi paishaikwa nzira.

Ndakabva ndatenderwa kuti ndivhure nzira ndisati ndashevedza Kudzi. Ndakaita muteuro vacho sezvandakanga ndarairwa apo ndakanzwa inzwi raitenda kubata basa kwandakanga ndaita. Ndipo pandakazonzi ndibude panze ndakabata mbiya yangu ndichidana zita raKudzi. Ndakabva ndaita zvandakanga ndichirairwa nengoni.

CHAPTER 41

MADZIBABA GADHIROSI

Ndakaramba ndichimudana sezvandaiudzwa nengoni ndakabata mbiya yangu. Ndipo pandakanzwa inzwi riya richiti ndirovere mbiya pasi uye yaifanirwa kubva yatsemuka. Ndakairovera pasi ichibva yatsemuka sezvandakanga ndaudzwa.

Ndichipedza ipapo inzwi rakabva randiti nditenderere pamusha apa katatu kuti pagokomberedzwa nemauto edenga. Ndichipedza kutenderera ndakabva ndaudzwa kwaibva nehondo yaikanganisa vana awa ndichibva ndanzi ndinongedzere divi racho netsvimbo yangu. Iyi yaitova tsvimbo yemoto chaiyo kana tasvika pabasa raMwari.

Ndakainongedzera kwandairairwa apo ndakazorairwa kuti ndiikande mudenga yonowira pasi. Ndakaita saizvozvo ndichibva ndanzwa inzwi raitenda.

Pasina nguva ndakaona muchinda aipanda pachivanze achimhanya kunge arikudzinganiswa. Muchinda uyu akanga ane tsvina yairatidza kuti yava nemakore uye bvudzi rakanga rakura zvakapfuurikidza. Muchinda uya akasvika nekupfugama pandaiva ndiri panze paya ndipo pandakabva ndaziva kuti ndiye Kudzi vacho.

Akatanga kueredza misodzi akapfugama kudaro apo mdakabva ndamunyararidza. Basa rakanga ravakuda kutevera ndiye akanga ava kufanirwa kuribata.

KUDZI

Ndakaeredza misodzi ndiri pamberi paMadzibaba apo shungu dzakanga dzandibata. Ndakanga ndangopepuka ndiri musango handizive kuti chii chaitora nzvimbo.mbatya dzekuchikoro dzandaiva ndakapfeka dzakanga dzabvaruka bvaruka ndikashaya kuti chii chaizvo chakanga chichitora nzvimbo.

Ndiri pakati pekubatanidza ndipo pandakanzwa kurira kwehwamanda nenzwi raidaidza zita rangu randainzwira kure. Ndakabva ndatosimuka ndichibva pandakanga ndiri paya apo ndaitonzwa kuti ndirikunhuwa tsvina yemakore. Ndakabva ndatoona kuti ndakanga ndiri kuTongosienda saka mufambo vakanga usina kunyanyokura kusvika kumba.

Ndakamhanya ndisingatarise kuti munzira mandakanga ndichimhanya munaani. Ndakateremuka materu akubva kuTongosienda ndichienda pazvitoro zvepaGova apo ndisina kumbomira. Nenguva isipi ndakanga ndatosvika pamba ndichiona panemumwe muporofita aibata basa. Ndipo pandakabva ndapfugama pamberi pemuporofita uyu.

Pakazomboimbwa vhesi rekurumbidza apo vanhu vaipemberera chiitiko chakanga chichangobva kuitika. Pachipedza kuimbwa madzibaba vakazoti vakanga vane nyaya dzavakanga vadzidziswa nengoni. Ndakateererawo kuti ndinzwe zvavakanga vachizoda kutaura.

"Chekutanga ndinoti rufaro kwamuri. Ndinoda kutenda Mwari varatidza simba ravo nekuponesa vana vatinawo awa. Ndinoda kuenderera mberi ndichitaura kuti yakwana nguva yekuparadza kurikubva dambudziko. Ndine urombo newe Kudzi nemakore avakatora vakavhiringidzwa njere asi kudenga kunaMwari vane nyasha. Newe Shamiso ndinoda kutenda Mwari vakarangarira." Mashoko amadzibaba aya akambondibata pamoyo ndichibva ndambodonhedza misodzi yeshungu. Chokwadi zvaisava nyore kurarama nguva yakareba kudaro ndirimusango ndichipenga. Ko ndaizorarama sei makore zvaakanga afamba ndiri musango ndisingaendi kuchikoro. Madzibaba vakazoenderera mberi nenyaya yavo.

"Ndoda kuti Kudzi ubate tsvimbo yangu wonongedza divi reHarare. Kana tadaro tinenge tangomirira kuzonzwa zvinobvako." Vakataura madzibaba ndichibva ndatambidzwa tsvimbo iya. Ndakanongedza divi reHarare sezvandakanga ndarairwa. Ndakanongedza katatu ndichibva ndadzosera tsvimbo.

Tichipedza mutambo uyu madzibaba vakabva vaoneka. Takazovimbisa kuti taizovashanyira kusowe kwavo nemusi wesvondo apo taida kupupura vamwe vachinzwa. Ndakazodziisirwa mvura kuti ndigogeza sezvo ndaitomboda kana awa rese kuti tsvina ipere.

Ndichipedza kugeza ndakaona patobatwa jongwe iro rakanga rava kutoundurwa. Mbuya vakabva vandiudza kuti vakanga vabatira ina naShamiso. Ndipo pandakaziva kuti Shamiso akanga atamburawo nedambudziko remusoro pandakanga ndiri musango. Ndakabvuma hangu kuti kunevanhu vanoroya zvemandiriri.

Ambuya vakazopedza kubika kudya kwedu tichibva tatanga kutandara hedu tichidya. Ini ndakanga ndakapedzisira kuziva kuti kunodyiwa kare. Tichipedza kudya takabva taenda kunorara. Ndakasvika muimba yangu yekurara yakagadzirwa semazuva ese. Hope hadzina kunonoka kuuya apo ndakaona ndatosvika munyika yezviroto.

Ndipo pandakaona ndiri munzvimbo yandaimborota apo ndakaona ndavapedyo nenzvimbo yandaimboratidzwa naamai vangu kuti ndinofanirwa kusvika ikoko. Amai vangu vakabva vabuda nerumwe rutivi apo vainyemwerera. Vakaramba vachifamba zvishoma nezvishoma apo vakapedzisira vasvika pandakanga ndiri.

CHAPTER 42

KUDZI

Takatarisana kwekanguva apo ndakanga ndamirira kunzwa kuti amai vanoda kutii. Nguva zhinji ndaiona vakasuwa asi apa vakanga vachisekerera. Vakazoshamisa muromo kuti vataure.

"Nhasi ndinofara mwana wangu nekuti ndasunungurwa. Ndavakuzokutungamira kunosvika kumafuro manyoro kwandaishuvira kuti usvike. Madzibaba vabata basa uye ndinotendawo mweya vasekuru vako vabvuma kuuya kuzondisunungura. Kubva zvino usatya nekuti ndava newe." Ndakaramba ndakanyarara ndichidzeya mashoko andakanga ndichangobva kunzwa.

"Saka ndichaitasei nguva zvayakapera ndichitetereka nesango, zviroto zvangu zvakaenda musango." Ndakabvunza ndava kutoeredza misodzi. Amai vangu vakabva vandipindura.

"Usazvityire hako mwana wangu nekuti kumberi kune huchi nemukaka. Ndaifanirwa kukutungamira makore ese aya asi zvakakona n'anga murapwa achida kurapwa. Ungadai uchiverengwa pane vamwe asi zvakaramba nekuda kwemuvengi." Vakambomira kutaura apo vakambokosora.

"Kunyangwe zvazvo ndakatadza kukutungamira kusvika pandinoda handina kupera tariro. Ndava kukutungamira neimwe nzira yavanga usingatarise. Tambira bhuku randakabata iri." Ndakabva ndatambidzwa bhuku raipenya zvekuti vaifunga kuti igoridhe. Ndichitambira bhuku riya ndakabva ndarairwa kuti ndicheuke ndione.

Ndakaona amai vaKuda vachichema vakakomberedzwa nemoto. Vakachema zvinosiririsa apo zvairatidza kuti moto vakanga wavakusvika pavari kuti uvaparadze. Ndakaramba ndakatarira apo ndakazocheuka zvekare ndanzwa inzwi raamai vangu. Ndipo pandakaona madzibaba Gadhirosi vamira padivi pedu.

Vakatendwa naamai vangu nebasa guru ravakanga vabata. Amai vangu vachipedza kutenda vakabva vandivimbisa kuti vaizoramba vakanditarira kusvika kumafuro manyoro kwandakanga ndananga. Ndakazotanga kufamba namadzibaba Gadhirosi ndichibva pavari apo ndakazopepuka.

LINDIWE

Ndakanga ndisisina nguva ndigere nababa vaKudzi apo ndaitoona rinda ravo. Ndaingomirira kuti vaite rwendo rwekure chete zvozongonzvi vakaita tsaona. Zvaizoita kuti ndisare nemaoko akachena nekuti tese tinoziva kuti tsaona dzinoitika.

Ndakatanga kuvabikira chikafu chinonaka chandaisambovabikira apo ndaiziva kuti yakanga yavanguva yekuonekana. Ndakabva ndachinja maitiro zvekuti baba wemwana vaitomboshamisika. Zvese zvekuvapopotera pese pese zvakanga zvapera.

Mumwe musi ndakanga ndakarara apo ndakabva ndatanga kurota. Ndakaona mumwe murume akanga akapfeka zvichena apo ndakabva ndamuziva. Ndiye muchinda uya vandakambobaya pagirazi aripakubata basa raMwari. Akanga akangobata tsvimbo yake sezvandakambomuona akaita apo akabva ainongedza kwandiri.

Ndakaramba ndakatarira apo ndakaona murume wechikuru nemukadzi uya wekuiswa mubhodhoro. Ko munhu wandakanga ndavharira muchizarira akanga abuda sei? Ndakazvibvunza ndakatarira kudaro. Nenguva isipi vakanga vatosvika pandakanga ndiri apo amai vaya vakabva vatanga kutaura.

"Humambo hwenyu hauchina nguva amai, ndatouya kuzohuparadza hudzokere kwahwakabva. Ndine urombo hangu nekuti ndirikuona marwadzo nekuzvidemba pamberi apa." Ndakabva ndapepuka ndichishaya kuti chii chaitora nzvimbo. Vanhu awa vaitondishura chete. Ndakaburuka pamubhedha ndichitarisa bhodhoro rangu ndichibva ndangoona rakavharwa semazuva ese.

Saka yakanga iri nyaya yekutyisidzirana chete manje hapana wandaizotya. Ndaitozomira nesimba kana pane aizondirwisa kuti ndiwire pasi. Iye madzibaba uyu akanga avakuda kuonesesa manje akanga achafira izvozvo. Apa ndaisamudzokorodza zvandakamuita zviya zvekumunyengerere nekuti aizoenderera.

Yakanga yava nguva yakutora mweya vake ndonouzorodza kumarinda. Munhu wepi anoda kuhakira nyaya dzaasingazive kuti dzakatangira kupi nenyaya yekuda kungonzi munhu waMwari. Apa ndakanga ndatogumbuka zvekuuraya mhuri yese kubva kuna baba wevana ndouraya naambuya zvese nevazukuru wavo. Madzibaba ndaibva ndamubatanidza zvekuti musi wacho kwaitozoita mariro embiri.

Ndakamuka kuseni ndine mufaro vandaitadza kutsanangura. Baba vaKudzi vakanga vatomuka vachindifonera kuti vaizosimuka kubva kuZambia masikati. Ndakangodairawo kuti ndokuonai mauya asi ndaiziva hangu kuti vaiperera munzira.

Ndakazoswera hangu naMaidei ndichimuudza nyaya yangu achindisimbisa kuti zvakanga zvakanaka.
Ndakazodzokera kumba apo ndakafonera baba wemwana vachiti vakanga vayambuka pamuganhu kupinda muZimbabwe. Handina kuda kutambisa nguva ndakabva ndananga kugirazi rangu. Ndakatora hari yangu ndichibva ndambodeketera.

CHAPTER 43

LINDIWE

Ndakadeketera kwekanguva apo ndakati rega ndichinanga pagirazi rangu. Ndipo pandakaona mota yaityairwa nababa vaKudzi ichiteremuka pamateru akanga akakura ndikaona uriwo mukana wekupedza basa. Nemamhanyiro ayakanga achiita vaitopafa chete baba awa.

Ndakatora tsono yangu ndichibva ndabaya vhiri rekumberi iro rakabva raputika. Gonyeti rakabuda mumugwagwa waro apo ndakaona rapinda kwaiva nemota dzaienda kwaraibva. Ndakambosiya girazi ndichibva ndambojamba jamba kufarira zvandakanga ndabva kuita.

Pandakadzokera pagirazi kuti nditarise zvakanga zvazoitika ndakaita kunge ndichadonha nekutya. Panzvimbo pekuti ndione kana mota yaparara ndakabva ndaona pachibuda madzibaba waya. Madzibaba uyu akanga avakuda kutomera muswe.

Manje akanga asinganetse ndakabva ndatora tsono kuti ndimubaye. Pandakatarira pagirazi ndichiti ndimubaye ndakabva ndaona asipo. Ndakatanga kutoona vanhu vane zvichena vakabata mapfumo. Pavanhu ava hapana vandaiziva asi ndakati rega ndimbozama. Pandakada kubaya netsono simba rakabva rapera mumaoko. Ndipo pandakanzwa izwi raiseka richindiudza kuti unoda kurwisa mauto edenga. Mauto edenga kudii kwacho munhu aitaura manzwi aya aitondipengera chete.

Ndakaona madzibaba vadzoka zvekare apo ndakati dzawira mutswanda sezvo ndakana ndakatobata tsono mumaoko. Ndichida kuti ndibaye pagirazi zvekare ndakaona pasisina munhu pavakubuda varume wezvichena waya. Pakarepo ruoko rwangu rwakabva rwatozvimba zvekuti ndakanga ndisisagone kana kubata.

Ndipo pandakati rega ndimbodzokera kuhari yangu ndimbodeketera zvekare nezita ndichirwisa madzibaba pamwe nekutsvaga kuti zvakanga zvazofamba sei kunababa Kudzi. Ndakatora hari ndichibva ndatanga kudeketera. Ndakaona jira rakanga rakavhara hari iya rava kupfungaira hutsi.

Ndakashaya kuti chii chakanga chavakutora nzvimbo sezvo ndakanga ndisati ndambozviona. Kubva ndiuye nehari iyoyo ndakanga ndaingoziva kuti inenge yakavharwa nejira uye ndaiita zvandinoita pasina chiutsi chinobuda. Ndakaona jira riya raita zvekubvaruka zvekuti ndakanga ndokwanisa kuona zvirimukati.

Ndipo pandakaona kuti zvinhu zvachinja ndoti kuzvimba ruoko tsoro yangu yobva yaramba kubuda zvekare. Chiutsi chakazopedzisira chazadza imba yese yandakanga ndiri apo chakanga chichikachidza. Ndakazovhunduka ndichiona muhari muya muchibuda musoro werovambira mhenyu yakanga yakagadzirira kuruma.

Ndakatarisana nenyoka iya kumeso apo ndakaona kuti mazino ayo akanga akafanana neemunhu. Handina kuzoziva kuti chii chakazotora nzvimbo.

BABA VAKUDZI

Chokwadi kugara naLindiwe kwaitoda murume anemoyo murefu. Mukadzi iyeye aitonga zvekuti wega vainzwa parere moyo. Ini ndaizodzoka ndokurirwa nerudo mukadzi iyeye ndaimuda nemoyo wese.

Ndakatosvika pakutorerwa mota irinyaya yerudo chete. Chinhu chaimbondibata ndechekuti ndakanga ndakurambidzwa kuenda kumusha kunoona vana vangu vakanga vari mumarwadzo. Ndaizongobvuma zvaanenge atonga kuti ndichengetedze rudo rwangu pakati pake neni. Kana ndiro ndaisuka akandigarira kunyangwe mabasa ese epamba ndaiita akarara achiti anoda kumbozorora.

Mumwe musi ndakabuda ndichibva ndaenda kuZambia nemota yebasa. Rwaiva rwendo rwurefu apo ndaizoita mazuva maviri ndiriko. Kazhinji ndaiziva kuti ndikabuda nebasa rekuZambia mota yangu yainodzoka yakatakura. Ndakagara mazuva maviri kuZambia kuya apo mota yangu yakanga yagadzirira kudzokera Harare.

Ndakasimuka muZambia ndichibva ndatangisa rwendo rwangu. Ndakavhetemesa mota apo ndakaona ndasvika pamuganhu wenyika nenguva isipi. Ndaizorara ndichifamba apo ndaizosvika muHarare kwaedza. Ndakaityaira mota apo ndakaona ndava kuteremuka mamwe materu aitotyisa. Ndipo pandakanzwa ruzha rwekuputika apo ndakabva ndaziva kuti mota yangu yakanga yaputika vhiri.

Ndakarwisana nayo apo yakanga yazoyambuka kuenda kudivi remota dzaiuya kwandaibva. Mota yacho yakanga inenharo yaitoda vakuru vanofamba najesu. Ndakatanga kuteremuka ndichienda nedivi iroro apo ndainzvengana nedzimwe mota kuti ndisazodzirova.

Ndipo pandakazoerekana ndava musango apo ndakanga ndanangana nemuti. Ndakanzvenga muti uya apo ndakatadza kunyatsobata mota zvakanaka. Kutadza kwandakaita kuibata zvakanaka zvakabva zvakonzera kuto irare nedivi. Ndizvo zvandakapedzisira kurangarira.

CHAPTER 44 BABA VAKUDZI

Ndakazoona ndava muneimwe nzvimbo apo ndakaona baba vangu vari nechekure. Vakatanga kufamba zvinyoro nyoro vachiuya kwandakanga ndiri. Ndipo pandakazoona vasvika pandaiva.

"Mwana wangu zvese zvaiitika zvapera, wavaiti mudzimai vako yakanga iri mhandu asi vaisazviziva. Nhasi uno ndofara kuti upenyu hwako hwavakudzokera pekare. Ndinotenda kuti iye mukadzi uyu anga achida kukutorera hupenyu akundikana saka uchararama kusvika Mwari vati zvakwana. Ugorarama munyasha mwana wangu." Ndakaedza kubatanidza mashoko aitaurwa nababa awa asi ndakanga ndichigere kuziva nyaya dzacho.

Baba vakazondipa komichi yakanga ine mvura vachibva vanditi ndinwe. Ndichipedza kunwa ndakabva ndarutsa zvinhi zvitema zvandisina kuziva kuti zvii. Takakurukura kwekanguva apo baba vangu vakazondioneka vachiti wavakunozorora. Vakabva vandiudza kuti vakanga vamutswa nemhandu yandaigara nayo iyo yavaiti yakanga isina moyo wekubereka. Panguva iyoyo vakabva vanyangarika vachiti vapedza basa.

Pakarepo ndakabva mdapepuka apo ndaiedza kubatanidza zvandakanga ndichangobva kurota. Mashoko aitaurwa nababa vaimawana kupi iwo varere kumarinda? Mubvunzo wandaingozvibvunzawo apo ndakazoona ndiri munzvimbo yandisingazive. Ndakatarisa zvakanga zvakandikomberedza apo ndakazoona kuti ndirimuchipatara.

Ndangariro dzakazodzoka apo ndakazoziva kuti ndakapedzisira kuita tsaona nemota yekubasa uye hapana chimwe chandakazoziva kubva ipapo. Ndakatanga kunzwa marwadzo mumakumbo andakazofungidzira kuti ndiwo akanga akuvara.

Ndakazotsveta yetsaona padivi apo ndakanga ndava kubatanidza zvandakanga ndarota. Baba vangu vari kumarinda havo asi apa vakanga vachireva idi. Mukadzi uyu akanga ari satani chaiye manje ndichibuda muchipatara aichiona. Zvandakarutsa kuhope ndiye akandidyisa chete manje aizonodyisa mai vake ava kumba kwavo. Pava paya ndipo pandakaona chiremba achiuya apo akafara kuona ndakamuka.

Akabva andiudza kuti ndaizobuda muchipatara svondo rinotevera sezvo ndakanga ndisina kunyanyokuvara. Ndipo pandakabvunza kuti mudzimai wangu akambouyawo kuzondiona here apo zvainzi nhare yake yakanga isingaite. Ndakabva ndafunga hangu kuti baba vairevesa zvese zvavakanga wandiudza kuhope.

Mazuva akanga achifamba apo svondo rakazokwana. Ndipo pandaizobuda muchipatara. Sezvo ndainzi hapana kana hama yangu yakambouya kuzondiona ndaizoperejedzwa kumba kwangu nemota yekuchipatara.

Mota yakavhetemeswa nemuchinda aiityaira akananga Cold comfort. Muchinda wacho ndakanga ndamuudza mafambiro ataizoita iye chake kwakanga kwava kungotevedzera. Nenguva isipi ndakanga ndatosvitswa pamba pangu. Ndakaburuka mumota yekuchipatara iya apo vakati vanondisiya ndapinda mumba.

Ndakavati vasazvinetse havo sezvo vakanga vatobata basa hombe rekundisvitsa pamba. Ndakafamba ndichipinda pamusuwo apo mumba macho makanga makanyararwa kuratidza kuti hapana aripo. Ndakambofunga kuti zvimwe Lindiwe akarara ndichibva ndananga kuimba yekurara. Ndakangoona iri nzvimbo chete kureva kuti Lindiwe akanga asimo mumba umu.

Ndakabva ndambobuda panze kuti ndimborohwa nemhepo ndichiti zvimwe ndingadzoka ndikamutsvagazve. Ndipo pandakaona mumwe mukadzi muvakidzani wedu achifambisa achiuya kwandaiva. Ndakamumirira kuti asvike apo ndakaziva kuta anogona kunge ane nyaya. Ndakatarisa chiso chake ndichibva ndaona kuti akanga asina mufaro. Akazoshamisa muromo vake kuti ataure.

"Makasimba here baba vaKuda mudzimai wenyu akangodonha mumba umu saka ndakamutakura ndikamuendesa kuchipatara cheWestview Kuwadzana." Ndakapindwa nechando ndichinzwa kuti ndizvo zvakanga zvaitika. Ndakabva ndatora mukana iwoyo kuti ndibvunze kana pane zvaizivikanwa nemukadzi uyu pakurwara kwaLindiwe.

"Saka monoreva kuti akangodonha here haana kumwe kurwara kwaakanga anako here pakuswera kwaakaita musi vacho vaakadonha." Ndakabvunza apo mukadzi uya akambotora nguva akanyarara. Ndakaongorora pfungwa dzake ndichibva ndaona kuti ane zvaaiziva asi aisada kuzvitaura.

"Ini hangu kutaura chokwadi hapana chandinoziva, ndingakunyeperai kana ndikati ane zvaakambondiudza akanga akatozvisimbira." Ndakazongozviudza kuti chokwadi ndichachiziva chete nekufamba kwenguva. Vakazonditi ndiwo vakanga vachichengeta Kuda naKupa apo ndakavatenda nemoyo wavo vakanaka. Ndaizodzoka ndichivatora ndabva kuchipatara.

Takazoonekana nemukadzi uya apo ini ndakabva ndapinda mumba. Mota yakanga iripo saka rwendo rwakanga rwuri nyore. Ndakatsvaga paiva nekii dzemota ndichibva ndadziwana. Pandakada kuti nditsvage dzimwe shangu pasi pemubheda ndipo pandakaona mashura.

CHAPTER 45 BABA VAKUDZI

Ndakatombafunga kuti ndirikurota apo ndakabva ndamboedza kumuka. Chokwadi ndechekuti zvandaitoona zvakanga zviripo. Ndakambobuda panze kwechinguva ndichiti zvimwe maziso akarohwa nezuva anodzoka avakuona zvakanaka. Ndakangodzoka ndichiona zvakangodaro.

Vamwe vangada kuziva zvandakanga ndichiona asi zvinotoda kushinga kuzvitsanangura. Pakanga pane bhodhoro dzvuku randakatadza kunzwisisa kuti raiiswa chii. Handina kugumira ipapo ndakaona chimwe chihari chaipfungaira mukati. Chairatidza kuti changa chambovharwa pamusoro asi chakanga chavhurwa nechinhu chaipfungaira.

Ndakazopedzisira kuona girazi iro raiva nhema pamusoro rine ruvara rwutsuku kumashure. Zvokwadi mukadzi uyu akanga akatakura zvinorema. Zvese izvi ndakashaya kuti zvakanga zvichishandiswa chii.

Ndakabva ndatoziva kuti zvinhu zvese izvi zvaishanda pandiri. Ndakanga ndava nemibvunzo mizhinji yaizoda mhinduro kubva kunaiye Lindiwe. Aitofanirwa kuti andipe mhinduro dzinondigutsa. Ndakatora zvinhu zviya ndichibva ndazvidzosera pandakanga ndazviona. Ndakatora kii dzangu dzemota ndichibva ndabuda panze. Ndakamutsa mota yangu ndichibva ndatotanga rwendo. Ndakaityaira mota ndakananga paKuwadzana kunoona aimbowa mudiwa wangu. Ndotaura ndichiti aimbova mudiwa wangu nekuti panguva iyi ndakanga ndamurasa pamoyo pangu.

Nenguva isipi ndakanga ndatosvika paWestview iyo yaiva padhuze nezvitoro zveKuwadzana 2. Apa ndaitenderwa kouna murwere wangu chero nguva sezvo chaisava chipatara chehurumende. Nenguva isipu ndakanga ndatoratidzwa maiva naLindiwe.

Ndakatadza kuzvitenda kuti ndiye Lindiwe wandinoziva. Akanga atondichinjira nguva diki iyoyo. Chiso chacho chakanga chakazvimba zvekuti chakanga chava kutyisa kutarisa. Ganda rake rakanga rawedzera kuita dema kuita kunge munhu arumwa nenyamafingu.

Kunyangwe zvikanzi munhu anorwara izvi zvakanga zvakanyanya. Chiremba wandakanga ndinaye akaona kushamisika kwangu apo akandiudza kuti zvidiki zvandakanga ndaona. Akabva aita wekufugura muviri wese apo ndakaita kunge ndichatiza nezvandakaona. Lindiwe akanga avakuita kunge munhu atoora ari mupenyu kudaro. Maoko akanga akazvimba kuita matanda kana ari makumbo handichatauri. zvigunwe zvaisatombooneka kuti zvakanga zviri papi.

Ndakaramba ndakamutarisa ndichishaya kuti ndotanga nenyaya ipi. Ndakashaya kuti ndotanga nekumuudza yezvandakanga ndaona kumba here kana kuti ndomuudza kuti haachina mugove mumba mangu. Ndakazongozviudza kuti ndichamuona kumba zvimwe ndikangomurangaridza chete kuti ndinenyaya yangu naye yakamumirira paanopora.

Ndakazongomukwazisa zvangu semunhu wandakanga ndaona. Akadaira kumukwazisa kwandakanga ndaita achibva atanga kueredza misodzi. Handina kuzoziva kuti yaiva misodzi yekuchema marwadzo here kana kuti yekuchema zvivi. Ndakazoerekana ndabvunza mubvumzo wandakanga ndisina kutarisira kubvunza panguva iyoyo.

"Chii chakaitika, asi vakarohwa nemagetsi?"
Ndakabvunza ndakatoguta nehasha zvekuti dai
pakanga pasina chiremba pedyo ndaitombomugogodza
musoro iwoyo unofunga zvekuuraya. Misodzi yake
yakaerera apo akabva azondipindura.

"Nyaya yacho yakakura baba wemwana, inoda ndazorora nyama dzangu dzisisarwadze uye inoda imi madzikamisa hana yenyu." Zvaitaurwa nemukadzi uyu zvaitonzwisa hasha kungoti ndaizodzoka ndozvidzora chete. Chiremba uya wandakanga ndauya naye akazonditora kuti timbokurukura pedu tega.

"Saka baba munoreva here kuti hamuzivi chakawira mudzimai wenyu? Ndanga ndakateerera muchibvunza kuratidza kuti makanga musingagare kumba naye." Chiremba uyu aitondipengera chete. Aindibvunza mibvunzo nhando yakadaro dai aiziva kwandakanga ndiri aisambodaro. Ndakazongoti rega ndimutsanangurire zvakwandakanga ndiri.

"Chiremba nyaya yacho yakakurisa zvekuti ndinogona kuita zuva rese ndichiitaura. Kutaura kuno ndabva kuchipatara nhasi ndototenda Mwari vakandichengeta. Ndakabuda pakanga pasingabudike asi nhasi ndiripano." Ndakaudza chiremba uya apo akanga azoteya nzeve kuti anyatsoteerera.

Ndakamuudza basa rangu apo ndakamutaurira kuti nguva zhinji ndinogara ndiri musango nebasa. Ndakamutaurira zvese zvekubva kwandakaita kuZambia apo ndakazosangana netsaona munzira mushure mekunge ndaputikirwa nevhiri remberi. Ndipo paakazonzwisisa kuti zveshuwa ndakanga ndapona murutsva.

Chiremba uya akazondiudza kuti dambudziko rakanga rina Lindiwe rakanga rakaoma uye raitoda nyasha dzaMwari. Ndakazongozviudza kuti hameno chero zvavanenge vaita chikuru ndechekuti ini ndakanga ndararama. Ndakazoudza Lindiwe kuti ndine nyaya hombe yaida mhinduro apo ndakabva ndaoneka.

CHAPTER 46

LINDIWE

Nyaya yekuteerera Shamwari yakanga yazondiparira ichindisiya ndirimuna taisireva. Maidei ndaivimba naye panezvese zvandinoita ndisingazive kwazvaizondisvitsa. Akanga ari shamwari yepamoyo saka hapana pandaizotadza kuteerera zvaanotaura.

Ndakabvuma hangu kuti vakuru vairevesa pavaitaura kuti chinobhururuka chinomhara. Zviya zvekuti ndinoswera ndichipengereka ndichiita zvandinoda nekudzungaidza mwanakomana wevaridzi zvakanga zvapera. Ndaimbozviita Mwari mazuva aya asi tsumo iya inoti chisingaperi chinoshura yakazoshanda.

Dzakanga dzangova ndangariro kuti ndakambotonga asi nguva yacho yakanga yapfuura. Zviya zvekuti ndine girazi rinoona munhu ari joni dzakanga dzangova nhoroondo. Ndakanga ndavakutotarisana nehupenyu hwakanga hwavapo panguva iyi.

Dzaingova ndangariro ndiri muchipatara apo ndairangarira zvandakapedzisira kusangana nazvo. Zvinhu zvacho zvaitonetsa kutaura nezvazvo uye zvainyadzisa kuudza munhu kuti ndizvo zvandasangana nazvo.

Ndakanga ndichiri kurangarira ruoko rwangu rwuchizvimba ndakabata tsono. Ndakarangarira zvekare ndakabata hari yaipfungaira chiutsi chaikachidza izvo zvakanga zvisati zvamboitika pese pandaiishandisa. Ndakazosara ndine mubvunzo wekuti pandakaona nyoka yakatarisana neni chii chakazoitika.

Muchipatara mandaiva hapana aikwanisa kundipa mhinduro nekuti hapana akanga aripo ndichiita zvinhu zvangu. Asika ndakangomuka ndava muchipatara kureva kuti pane akauya neni. Izvi zvaitoreva kuti munhu akandiunza muchipatara akaona zvese.
Ndakazopepuka mundangariro ndichiona mumwe murume akapfeka zvichena.

"Amuka here chiremba?" Ndakanzwa inzwi rechikadzi richibvunza apo ndakaita sendinoriziva. Mukadzi akanga achibvunza akazoswedera pedyo mushure mekunge audzwa nachiremba kuti ndakanga ndamuka. Ndipo pandakaona kuti ndiMaidei.

Ndakatanga kueredza misodzi ndakamutarisa apo ndakanga ndava nechigumbu chake pamoyo pangu. Ndiye aindifurira kutamba nemadhaka ipo pasina mvura yacho. Ndaizomageza nei madhaka acho ini ndiri mugwenga musina mvura. Takatora nguva takatarisana pasina aitaura nemumwe. Zvinhu zvacho zvaitonetsa kuti anotanga kutaura nemumwe ndiani.

Kuti ndinyatsotaura naMaidei zvaida tiri vaviri saka ndakabva ndakumbira muchinda wezvichena uya kuti ambosuduruka. Haana kumboita nharo nazvo akabva atoenda panze. Ndipo pandakabvunza Maidei kuti ndakanga ndauya sei muchipatara uye kumba kwangu kwakanga kurisei.

Maidei akatanga kunditsanangurira zvese zvaakaona. Aiti akanzwa mhere kamwechete izvo zvakamuvhundutsa. Ndipo paakauya achimhanya apo akaona ndakarara pasi ndichifemera kure. Ndipo paakaona zvinhu zvangu zvandaishandisa mabasa erima zviri padivi apo akawonawo nyoka yerudzi rwerovambira ichibvira.

Nyoka yakazongobvira ikapera apo hari yakaramba ichipfungaira sezvaakaona ichiita. Akazotora zvinhu zvangu achibva arongedza kuitira kuti pasava neanozviona. Ndipo paakabva anditakura kuti ndiuye kuchipatara. Ndakazosununguka hangu ndanzwa kuti vana vane anotarira

Ndakazomuudza hangu chokwadi kuti ndakanga ndava nechigumbu chake pamoyo pangu zvekuti nekuti ndiye akanga andipinza muna taisireva. Dai pasina iye zvimwe ndaidai ndisina kuwirwa nenyatwa iyi. Hameno kuti ndaizomuregerera here Mwari ndiwo vaiziva. Takazoonekana apo takazovimbisana kuti tichaonanazye kana Mwari atendera.

Mazuva haana kumira kufamba ndirimo muchipatara imomo. Ndipo pandakashamisika mumwe musi ndichiona baba vaKudzi vachipinda muchipatara. Ndakavhunduka nekuti ndaifunga kuti zvavakanga vaita tsaona pagirazi paya zvakanga zvarova. Saka zvairevaka kuti kurwara kwesw uku zvaitobva pakubondera kwandakaita pakuuraya baba awa.

Mabvunziro akaita baba vaKudzi kuti chii chakaitika akandityisa nekuti vaitoratidza kuti vakagumbuka. Vanenge vane zvavakanga vaona kumba kana kuti vane zvavakanga wanzwa. Manje zvakanga zvisingapindurike izvi ndakangovaudza kuti nyaya yacho inoda nguva.

Chokwadi nemarwadzo andakanga mdinawo zvairema kutsanangura nyaya yakadaro. Zvaitoda ndaporandisina panorwadza ndichiziva kuti ndakasimba muviri wese. Manje nekuzvimba kwandakanga ndakaita ndaigona kuzowedzera marwadzo panyama yangu ndikaswera ndaenda kwamupfiganebwe.

Pava paya baba vaKudzi vakazooneka wavakuenda kumba. Pane shoko ravo rimwechete randakasara ndine mubvunzo naro. Vakanditi vakanga vane nyaya yavaida kutaura uye panyaya iyi paitoda mhinduro inobva kwandiri. Inyaya ipi iyoyo yainzi inoda mhinduro kubva kume murwere akaita seni? Ndakazvibvunza hangu ndava kuedza kubatanidza nyaya dzacho.



A story by: Evidence Katiyo

Contact:0774278203

0717031924

Facebook: Evie Katiyo books and stories

Note: Some of the contents in this publication are fiction and emotional. That's life as you come across the good and the bad. It's a journey and nobody knows the destination. Stay tuned.

CHAPTER 47 NARRATOR

Mazuva akafamba Lindiwe arimo muchipatara pasina kana chaichinja. Chiremba akanga azokanda mapfumo pasi nekuti chirwere chacho chaitoda musiki anoona pakahwanda. Ukaona chiremba anembiri akanda mapfumo pasi wobva vaziva kuti zvinenge zvisina kumira mushe. Chiremba akazosvika pakuudza baba vaKudzi kuti dambudziko iri vakanga varishayira mushonga kureva kuti Lindiwe akanga ava kumirira nguva yemusiki.

Sezvo chiremba vakanga vati dambudziko varitadza vakaraira baba vaKudzi kuti kana zvaigona vaimbofamba kune vanobatsira zvimwe vaiwana mhinduro.

Baba vaKudzi vakangobvuma zvekuti vabve ipapo asi mumoyo mavo maitova nehondo. Lindiwe akatakurwa achibva anosiiwa kumota yababa vaKudzi. Iye vacho aitotyisa kutakura nekuti ganda rake raiita kunge ririkuda kubvaruka.

Mota yakavhetemeswa nababa vaKudzi yakananga kuCold comfort kunova ndiko kwavaigara. Nenguva isipi vakanga vasvika. Rakava basa kuti baba vaKudzi vasimudze mudzimai wavo izvo zvakaita kuti vashevedze Maidei. Vakabatsirana kutakura Lindiwe uya vachibva vanomuhadza pasofa. Muimba yekurara akanga asisadiwe nababa vaKudzi nekuti akanga asisina mugove imomo.

Baba vaKudzi havana kuda kutambisa nguva sezvo nguva yemibvunzo yakanga yatokwana. Vakabva vatotangirira mibvunzo yacho mumba imomo Maidei asati aenda izvo zvakabva zvatomutadzisa kuenda.

"Chii chakaitika amai Kuda, paya vakandivimbisa kuti uchandiudza ndikati zvimwe urikunyara chiremba saka chitaura tinzwe nhasi." Vakabvunza baba vaKudzi apo mhinduro yacho yainonoka. Apa Maidei akanga angonyarara akapusa achishaya kuti opindurira mumwe vake here.

"Mukadzi wamunoona agere apo uyo ndiye honzeri yezvese izvi. Chimiro chandinacho nhasi uno ndiye mukadzi iyeyi." Maidei akaramba akanyarara achishaya kuti oti ndizvo here kana kuti opikisa.

"Iwe handina kuti honzeri ndiani ndati chii chakaitika ndoda mhinduro. Zvehonzeri inyaya yemumwe musi iyo." Baba vaKudzi vakanga vakatodya rasha dzvuku chairo raida kuti vambonwa mvura inotonhora. Vakanga vasiyana nezvavakanga vari mazuva avaitongwa. Lindiwe akaramba achikakama apo baba vaKudzi vakabva ipapo vachinanga muimba yekurara. Vakangonanga pasi pemubhedha vachibva vatora zvinhi zviya zvavakanga varongedza vachiitira kuzobvunza muridzi wazvo. Lindiwe akaita kunge hana ichatsemuka achiona baba vaKudzi vachidzoka kwaakanga ari vakabata hari nebhodhoro dzvuku pamwe negirazi.

"Ndinoda mhinduro zvekare apa, taura tinzwe." Baba vaKudzi vakataura vachitsveta zvinhu zviya pamberi paLindiwe. Zvinhu zvacho zvaitonetsa kutsanangura zvaida kushinga. Lindiwe naMaidei vakanga vangotarisana kuda vaitaurirana nemaziso kuti hona nyaya iya yazotiparira.

Lindiwe akazozvipira achibva asarudza kurondedzera zvese zvakaitika. Akataura zvese zvekufurirwa naMaidei kuti mwana wemutorwa haabatwi sezai zvinova zvakaita kuti atange kushungurudza vana. Baba vaKudzi vakabva vaziva mazuva acho apo vakashamisika kuti zvakanga zvabva nekunaMaidei.

Akaenderera mberi apo akarondedzera mabatiro aakazoita mushonga kuri kuda kuti ateererwe iye mumba. Zvese zvekurara nasekuru Kashiri haana kuzvisiya akazvitaura. Baba vaKudzi vakambonzwa kunge vabaiwa pamoyo nebanga apo vakambobuda panze zvishoma vachibva vazodzoka.

Lindiwe akataura zvese zvaakaita kudzungaidza baba vaKudzi pamwe nekuzopengesa Kudzi. Baba vaKudzi vaingobata muromo apo Maidei akanga ava kueredza misodzi akateerera zvaitaurwa nemumwe vake. Akazopedzisira nekutaura kuti musi waazosangana nedambudziko akanga agadzirira kuuraya baba vaKudzi osara nepfuma iyo yakanga yava mumazita evana vake.

Ndipo paakakundikana zvichibva zvamudzokera. Izvi zvekawedzera hasha dzababa vaKudzi avo vakabva varovera chibhakera patafura. Vakangoburitsa nhare yavo ipapo vachibva vatofonera ambuya vaKudzi kumusha. Vakabva vatovaudza kuti vakwire bhazi vauye kuHarare. Baba vaKudzi vakatozoshamiswa vachiudzwa kunzi Kudzi haachapengi uye Shamiso musoro vakapora.

Vakabva varairwa kunzi vauye wese apo nguva dzakanga dzisati dzapera. Bhazi raizopfuura zuva ravakuda kunyura apo raizoenda kuHoya rozodzoka richienda kuHarare. Raizodzoka nguva dzaenda saka vanhu vairibata richiri kuenda.

Sekurairwa kwavakaitwa vakakwira bhazi nevazukuru wavo apo vakarara vachifamba rwendo. Vakazosvika muMbare kuseni apo vakaona vatomirirwa nemota. Mumota ndimo makatanga hurukuro yezvese zvakanga zvatora nzvimbo. Vakazosvika havo kumba pava paya.

Lindiwe akazotongwa nyaya yake apo vabereki vake vakanga vashevedzwawo kuti vazozvinzwira. Sezvo akanga azvikanyira ega baba vaKudzi vakazoti havakwanise kugara nemunhu akadaro izvo zvakazoita kuti atakurwe nehama dzake.

Kudzi kubva pakadzoka pfungwa dzake akamboomerwa achifunga kuti aizoenda kuchikoro zvekare here. Akazorangarira bhuku raakapihwa kuhope akaziva kuti raiva nechirevo. Akangotsvaga bhuku rake rekunyorera nechinyoreso achibva atanga kunyora.

Ndipo paakaziva kuti akanga ari shasha panyaya dzekunyora mabhuku apo akabva atoenderera mberi nekunyora. Nyaya iyi akaisvitsa kuna ambuya vake avo vakaita kunge vachabata denga nekufara.

Pavakazoshevedzwa Harare akanga anyora zvitsauko zviviri apo akati aizonoripedzisira kuHarare kwaakanga ava kuenda.

Shamiso akangoti achisvika Harare akabva atotsvagirwa nzvimbo mugwaro rechinomwe nyangwe zvazvo akanga agumira mugwaro rechitatu. Aitoita kunge avanenguva ari mugwaro rechinomwe iroro zvekuti vadzidzisi vaitomurambira kuti akanga ava nemakore asingazivi musuwo wechikoro.

Nekunerimwe divi Kudzi haana kumira kushandisa chipo chake chekunyora.

Baba vake vakazenge vamutengera laptop kuti zvimuitire nyore pakunyora. Ndipo paakazofunga kutaura nemachinda ekuMambo press avo vanotsikisa mabhuku vari kuBulawayo. Akaudzwa zvese zvaidiwa izvo zvakanga zvisina kumuomera. Ndipo paakatsikisa bhuku rake rainzi Makata ane minzwa. Bhuku iri raimudzora mundangariro apo aizorangarira mazuva aakararama ari muutapwa.

Bhuku rakatanga kutengwa muzvikoro zvekuti vaiita basa rekutengesa vakanga wava kutoshanda nehusiku kuti vakwanise kukwanisa mabhuku aidiwa. Gore rakatozosvika pakupera apo akanga azotenga imba yake kuFairview iyo yakaganhurana neRuwa tiri mumugwagwa unoenda kwaMutare uchibva kuHarare.

Akanga aionawo mubepa apo yaishambadzwa neweSteward bank vanowa ndiwo vakanga vari varidzi. Gore iroro akabva atenga mota yake izvo zvakanga zvava nyore kuti afambe kuenda kwaanoda.

Shamiso akatozonyora bvunzo akakunda wese vaakasvika vari pachikoro. Hurumende yakabva yasarudza kumutora apo akanzi aende pachikoro chaainzwa kuda. Akazosarudza kuenda paQueen Elizabeth iyo yaiva muHarare.

MAGUMO

Kutaura kuno baba vaKudzi vari kugara nemhuri yavo pasina chinovashungurudza. Zvevakadzi vakazosiyana nazvo sezvo vana wavo vakanga vakura uye vakanga wavakugona kuzviriritira. Vakazosvika pakusiya basa apo vakazotenga bhazi iro ririkutakura vanhu kubva muHarare rakananga kwaMutare. Kudzi hupenyu huri kumufambira parizvino atotsikisa mabhuku akawanda arikutarisira kuvhura chitoro mwedzi unotevera. Shamiso akazotoenderera mberi nechikoro kutaura kuno ari paUZ arikudzidzira zvemutemo sezvo arikuda kuzoita gweta. Nhamo yaakaoneswa yakaita kuti ade basa iri kuitira kuenzanisa avo vanotambudzwa vawanewo hupenyu hwakanaka.

Ambuya vaKudzi vakazovakirwa zimba zihombe pamusha pavo vachibva vaisirwa zvese zvinodiwa nemunhu anorarama hupenyu hwemudhorobha. Vakabva vatengerwa mota pamwe nekutsvagirwa mutyairi wacho.Lindiwe kubva paakatakurwa haana kuzombobvira apora. Hupenyu hwakatomuomera arikutokungura kuti vakafa vakazorora zvavo. Maidei ndiye akazodzingwa memurume vake mushure mekuzivikanwa kuti akanga afurira Lindiwe kuputsa imba yake. Ndizvo zvirikuitika pamhuri dzese idzi.